

Lib
Antony L. B. d. l. a. e. l. e.
h. d. l. o. t. h. a. d. e. n. D.
h. a. p.

AUREUM
PHILOSOPHIÆ
SÆCULUM.

A U R E U M
P H I L O S O P H I E
S E C U N D U M



Franciscus Stampart. ad Vivum pinxit Viennæ.

Wolf delineavit. Monachij.

Johann Georg Wolfgang Sculptit Augusta.



AUREUM
PHILOSOPHIÆ
SÆCULUM
IMMORTALIBUS



PRIMI
AUGUSTI
ROMANORVM ET HVNGARIÆ
REGIS,
ARCHIDUCIS AUSTRIÆ, &c. &c.
HONORIBUS CONSECRATUM.

S E U
NATALIS EIDEM SÆCULI
INVENTA, PHÆNOMENA, & EXPERIMENTA
PHILOSOPHICA

CONCERTATIONI PUBLICÆ EXPOSITA
AB ILLUSTRISSIMO DOMINO,
D. ANTONIO, RVPERTO, CHRISTO-
PHORO FUGGER, S. R. I. COMITE
IN KIRCHBERG ET WEISSENHORN, &c.
PRIMO SUI CURSUS DIGNISSIMO
PHILOSOPHIÆ MAGISTRO.

AUTHORE AC PRÆSIDE
P. PETRO PFISTER, SOC. JESU, PHI-
LOSOPHIÆ PROFESSORE ORDINARIO ET NUNC DECANO.

I N
CÆSAREO-ARCHIDVCALI VNIVERSITATE
OENIPONTANA

A N N O
LEOPOLDI M. CÆSARIS

A L R E U M
 ILLI O S O P H I E
 S A C U L U M
 I M M O R T A L I B U S
 P R I M I
 A L L C U S T I
 R O M A N O R U M E T H I N G A R I E
 R E C I S
 A R C H I D U C I S A U S T R I E , G C G C
 H O N O R I B U S C O N S E C R A T U M
 I N T A L I S I D E M S A C U L I
 I N V E N T A , I N K N O W N M E N T A , & E X P E R I M E N T A
 P H I L O S O P H I C A
 C O N C E P T I O N I S S U A L I S E X P O S I T A
 S I B I A L L U S T R A T I O N E D O T T O R I S
 D A N T O N I O R A P P E R T O C H R I S T O
 P H O R O F U G G E R , S A I C O M I T E
 I N K I O C H B E R G E T V R S S E N S I O R I A
 E L I M O C O M I T E S D I G N I S S I M O
 A L L G O T T I E M A G I S T R O
 A L L R O S E M C P A S S I D E
 P E T T O T R I S T E R , S O C I E T U M P H I
 L O S O P H I A P R O F E S S O R E D O C T O R I S
 C A S A R E O A R C H I D U C I A L I V N I V E R S I T A T E
 G E N E V A
 L E O P O L D I M C A S A R I S
 G E N E V A
 G E N E V A

JOSEPHO

PRIMO,

AUGUSTO.

REGI


ROMANORUM,

ET

HUNGARIÆ,

ARCHIDUCI AUSTRIÆ, &c. &c.

AVREA SÆCVLA.



Vod Sibylla de Cæsare Augusto vaticinari visa est, **AUGUSTE REX**, illud in Regia Tua Majestate vel primùm impletur, vel iterum renovatur. Postquam enim coronatus ille Julij Cæsaris Nepos Templum Jani, quod tempore Pacis claudebatur, tempore verò Belli patebat, bis laureatis clavibus obseravit; tertiâ demum vice illud iterum occludens, Saturnia Regna, ac Sæcula aureo vitæ stamine contexta, renascenti velut mundo cum Pace universali restituit. Bis etiam **REGIA TUA MAJESTAS** idem Templum conclusit, Pace hîc Carlovvitzij Regnis Tibi Hæreditarijs; ibi Rysvvicki Romano Tuo Imperio redditâ. Jam verò, quem alium Primæ Tuæ gloriosissimæ Expeditionis bellicæ fructum vel sperare, vel exoptare possit universus Orbis, quàm Pacem non tantùm omnibus Linguis ac Populis communem, sed etiam omnibus Sæculis coævam? Oraculum hîc de futuris non aliud consulimus, quàm Regiam Tuam Effigiem, in quâ Austriacæ Domûs immensa aliàs Gloria, universa Majorum Tuorum decora collegit; absoluto paulò ante auspiciatissimam Tuam Nativitatem quarto Imperij sui Sæculo, à Rudolphi I. in Im-

Imperatorem inauguratione. Mihi proinde Clementissimam veniam dabis, si eandem Effigiem, tot Sæculorum laborem, Orbis admirationi exponere; ac Jani speciem indutus, geminas Tuas claves præmeferre audeam, quarum unâ Bellum, solis Victoriarum Tuarum Annalibus conscribendum, Supremus ipse Invi&issimi Cæsarei Exercitûs Imperator, aperuisti; alterâ verò, post Pacem eidem Tecum Triumphali Currui impositam, Jani Templum occludes, nullo ampliùs Marte referandum.

Ita argumentatur ipsa etiam Peripatetica Philosophia, quæ ex propria sua fortuna communem totius Orbis colligit, receptis Athenis, atque adeò sua Peripato, Anno eodem, quo in Regem, Hungariæ scilicet, primò consecratus es. Ne igitur mireris, si mea quoque Philosophia in tenui hoc libro, quem Romanæ Tuæ Aquilæ pennis subjeci, reliquis Scientijs & Artibus acclamet:

HIC AUREA CONDET SÆCULA,

suam nimirum supereffluentem felicitatem in alienæ quoque aureæ Sortis vaticinia derivans. Et profectò nullum aliud Philosophiæ Sæculum tam felix, faustum, fortunatumque illuxit, quàm quod Tibi Natale, tot illam Inventis, ac Phænomenis, dubias hæctenus Sapientiæ naturalis Quæstiones illustrantibus, ac novis circa quæcunque Substantiarum genera Experimentis, tam abundanter beavit. Quapropter, cùm eadem mea Philosophia Te ab alijs Vniuersitatibus, jam, ut Romanorum, jam, ut Hungariæ Regem, modò, ut Maximum Austriacæ Domûs Incrementum proponi conspiceret, Te totum sibi vindicare proposuit; præcipuos Nominis ac Gloriæ Tuæ radios totidem Operis sui Partibus interea delineando, usque dum illam animaturus sit dignus AUGUSTI præconijs

SPIRITUS, ET QUANTUM SAT ERIT TUA DICERE FACTA.


Huc

Huc enimverò mea quoque hætenus collimabant Vota
ac Studia, ut optatissimam aliquando occasionem nancisce-
rer, publicis Tabulis contestandi, quod cum primo lacte
mihi instillatum, ac in imaginibus Progenitorum meorum
ubique vivis coloribus expressum, menti meæ profundissimè
infixeram; subjectissimum nempe affectum erga gloriosissi-
mam Austriacam Domum, qui mihi, Parentibus meis, ac to-
ti meæ familiæ, ipso, quo vivimus, Sanguine, magis est
hæreditarius. Indulge igitur unicum, quo Orbem recreas,
obtutum primis his meis **SACRATISSIMÆ TUÆ**
MAJESTATI litandi conatibus; atque clementissimè
concede, me, meamque Familiam, tot à Majoribus Tuis
acceptis gratijs, ac Favoribus Tuam, devotissima Obsequia,
sicut erga illos, ita erga Te quoque, pro totius sui Hono-
ris, Votorum, ac Contentionis metâ præfigere.

AUGUSTÆ MAJESTATIS
TUÆ

Humillimus Clienſ

Antonius, Rupertus, Christophorus
Comes Fugger.



INTRODUCTIO.


Ria sunt, quorum à me ratio reddenda in ipso Operis limine videtur. Inprimis scilicet, cur erudita maximè Argumenta, relictis abstrusioribus, assumpserim, per Academicas Dissertationes, ac Discursus Peripateticos enucleanda? Fatebor candidè; partim, ut illis obviarem, qui amœnas & utiles quæstiones à Physiologicâ Medicinâ vel operatrice Mathematicâ præreptas; ad Philosophiam verò arrosa jam ossa sine carne & succo projecta esse calumniantur; partim, ut manifestum fieret, Philosophiam non ita ornamentis domi natis destitui, ut omnem pulchritudinem à Penicillo, vel Scalpro, aut extraneis Disciplinis mutuari cogatur: quamvis tractanda à nobis materia etiam utilitate alteri cuicunque anteponenda sit, cum Philosophiam, quæ ab investigatis experientiarum causis ortum traxit, iisdem medijs conservari oporteat; nec minorem illa difficultatem secum afferat, cum Theoriam, in quâ fundatur, supponat, ac eandem vicissim necessario Inductionis robore confirmet.

Vel agite, Dogmatici Philosophi, qui universalis Scientiæ persuasionem tumidi, nihil vobis, quod discatis, nihil, quod dedoceamini, superesse creditis; proferte Sententiam de rebus opinione vestrâ minutissimis: cur nix figuram hexagonam exhibeat? atque inter septem diversas de illâ assertiones indubitata, quarum ibi nulla est, seligite. Præterea dijudicate inter tres scintillationis Stellarum causas, quas etiamsi simul in unam compingatis, solido intellectui non satisfacietis. Addite modum certiores, quo aranea ab uno pariete in oppositum sua fila transvehit, ubi nec venti, nec impetûs impressi beneficio nodum solvetis; & ita de alijs naturalibus experientijs discurrendo, quæ, ut Hipponensis Philosophus de subtili Temporis definitione enuntiavit, si nemo ex nobis quærat, quid & cur sint, sciuntur; si verò inquirentibus illarum causæ explanandæ sint, nesciuntur; vel certè apparent Oedipi tam rari, ut neque ad Dialogum sufficiant.

Alterum, cujus reddenda ratio est, circa dictionis formam versatur. Antequam tamen mentem hinc meam plenè exponam, juvat afferre, quod Aulus Gellius de Aristotele mortis jam proximo recenset; illum nempe à Discipulis suis, lecto Magistri circumfusus, interrogatum, qualem Peripati Presidem ex duobus præcipuè, Menedemo scilicet atque Theophrasto, quorum unus ex Insulâ Rhodo, alter è Lesbo ortum traxerat, ipse sibi subrogaret, vinum Rhodium & Lesbium petiisse, ac gustato utroque, Lesbium, tanquam sapidius, sibi præplacere testatum esse. Id ubi dixit, ait Gellius, nemini fuit dubium, quin lepidè simul & verecundè Successorem illa voce sibi, non vinum delegisset. Is erat à Lesbo Theophrastus, homo suavitate insigni linguæ pariter, atque vitæ. Itaque non diu post, Aristotele vitâ functo, ad Theophrastum omnes concesserant; quo ipso ultimæ suæ voluntatis testimonio Aristoteles totam posteritatem Philosophicam docere voluit, nec sibi sermonis suavitatem desipuisse, quam Interpretum & Commentatorum barbaries, ac aliæ temporum injuriæ ex Philosophi libris haud parùm abstulerunt. Vnde opportunissimum censui, à vi quidem Syllogisticâ nec latum unguem deflectere, Scholasticam verò, ut vocatur, methodum intra publicas tantum Praelectiones coercere, quas aliorum more absque novo cultu typis mandare, laboris fuisset maximum compendium, sed non ad gustum Aristotelis, cujus vestigijs usque ad aras insistere, veram philosophandi libertatem existimo; si autem illius Authoritas desit, meritò de talis farina Theisibus exclamari posse, quod de Platonis Scholâ dici consuevit, quando Aristoteles, Philosophiæ Platonica tunc Auditor, fortè absuerat: Deest Philosophus veritatis. Ubi paucis adverto, me in citando Aristotele ordinem Librorum ac Capitum juxta Græcæ Sylburgianæ Editionis formam ubique sectatum esse, tanquam accuratam & à primâ origine minùs alijs dissenteantem.

Tertium denique præsentis Introductionis caput veniam à benevolis Lectoribus expectat, quam modicis typi erroribus indulgere, vel hoc cuique satis persuaserit, quòd subitaneus destinati Typographi obitus menda in distans, ut ita loquar, emendare compulerit. Favete igitur, quotquot oculo has paginas dignabimini, ac vestris etiam lucubrationibus Philosophiam Peripateticam sartam, tectamque conservate. Sicut enim juxta Romani Sapientis effatum, multum egerunt, qui ante nos fuerunt, sed non peregerunt; ita pariter, ut idem omnes Scientiarum Cultores alloquitur, nec ulli nato post mille Sæcula præcludetur occasio, aliquid aduc adjiciendi.

ELEN.



ELENCHUS
SEQUENTIUM DISSERTATIONUM
A C
DISCURSVVM.

IN PRIMA PARTE.

| <i>Dissertationes.</i> | <i>Discursus.</i> |
|--|---|
| I. De admirando Telescopij Invento. | I. Quo stabilium Colorum à luce distinctio vindicatur. |
| II. De Famosâ Morlandi tubâ. | II. De artificiosâ Soni intensione. |
| III. De pretioso Philosophorum Lapide. | III. De Auro Chymico. |
| IV. De utilissimo Thermometro. | IV. Quo Semi-Atomistica Rarefactionis ac Condensationis Hypothesis evertitur. |
| V. De Mobili perpetuo. | V. De Metu Vacui. |

IN SECUNDA PARTE.

| <i>Dissertationes.</i> | <i>Discursus.</i> |
|--------------------------------|---|
| I. De Phænomenis Terrestribus. | I. Quo vera Philosophi de Terræ motibus doctrina eruitur. |
| II. De Phænomenis Aqueis. | II. De difficillimo Maris æstu. |
| III. De Phænomenis Aereis. | III. Quo Naturæ & Artis Ostenta à Præstygijs fecernuntur. |
| IV. De Phænomenis Igneis. | IV. Quo Astrologiæ Proscriptio renovatur. |
| V. De Phænomenis Cælestibus. | V. De malè conciliato Tycho- nis & Copernici Systemate. |

IN


IN TERTIA PARTE.

Dissertationes.

- I. De novis circa Hominem experimentis.
- II. De novis circa Bruta experimentis.
- III. De novis circa Plantas experimentis.
- IV. De novis circa inanimatas Substantias experimentis.
- V. De novis circa Monstra experimentis.

Discursus.

- I. De controversâ humani Sanguinis pericyclofi.
- II. De Panspermiâ animatâ.
- III. De Physicâ Vegetabilium analysi.
- IV. De arcanis Mixtorum effectibus.
- V. De Harmoniâ Universi.



Approbatio Theologica.

Neximio hoc Opere, cui sorte invidenda Clementissimè concessum est, sub Augustis Auspicijs Invicissimi Romanorum & Hungariæ Regis JOSEPHI I. primam Expeditionem bellicam gloriosissimè adornantis, in Arenam Academicam, & Lucem unâ publicam prodire, nihil omnino orthodoxæ Fidei, aut bonis Moribus adversatur. Certant verò in illo pro debita singulis excellentiæ Palma subtilis Ingenij felicitas, & profunda Doctrinæ soliditas; tam selecta, quam rara Eruditio; perspicua, amœnâque in Argumentis difficillimis Facundia; plurimum Scientiarum Unio, ac præsertim Theoricæ Philosophiæ cum Experimentalis desiderata hucusque Compositio, ita, ut quidquid Novatorum Antesignani ad labefaciendas celebriores Aristotelis Sententias excogitaverunt, hîc pro Peripatî fulcro nova Arte adaptetur, Dignissimæ proinde sunt hæ Aurei Sæculi Reliquiæ Luce & Applausu publico, ad erudienda & oblectanda ventura etiam Sæcula; simul ad singularem Illustrissimi D. D. Comitæ ac Defendentis Honorem, qui omnibus, quæcunque maximæ Profapiæ Indolem commendare possunt, Dotibus toti nostræ Universitati constantissimè præluceat, ac Ornamento est singulari; cûmque pretiosa etiam Picturæ ac Cælaturæ Ornamenta accedant, Opus hoc ex omni parte redditur perfectissimum. Ita censeo

Joan. Baptista Halden è Soc. JESU;
SS. Theologia Doctor. & Prof. Ord.
Sacra Facultatis p.t. Vice-Decanus.

Approbatio Philosophica.

Aureum hoc Philosophiæ Sæculum titulo, quem præsert, unde quaque respondet. Nam & Philosophicos eruditissimi Sæculi Fructus ingeniosâ methodo complectitur, ac principis metalli dotes egregiè imitatur; ab Augusto Patrono splendidum, doctrinâ solidum, rationum pondere grave, selectâ eruditione ad curandos alienæ ignorantie morbos efficax. Proinde jure suo lucem publicam postulat, & Eum natum est Propugnatorem, in quem præter summæ Nobilitatis prærogativam omnia reliqua Virtutis, Ingenij & Doctrinæ ornamenta copiosè adeò confluerunt, ut Illustrissimus hic Pugil Ethicæ ac Naturalis, hoc est, universæ Philosophiæ pretiosissimum Compendium dici mereatur. Ita censeo

Romedius Visintainer Soc. IESU, Philo-
sophiæ Prof. Ord. loco Decani.

A U R E I
P H I L O S O P H I Æ
S Æ C U L I

P A R S I.

S E U
I N V E N T A P H I L O S O P H I C A
A D


J O S E P H U M I.
R E G E M
R O M A N O R U M.

A U R E I
PHILOSOPHIE
S E C U N D U M

P A R S I
INVENTA PHILOSOPHICA
2 2

JOSEPHUM I
R E G E M
R O M A N O R U M







AUGUSTE REX



Si maximorum Principum Symbola ab Heroicis eorundem factis occasionem, materiam, ac pretium derivarunt; quid de Tuo dicam, **AVGVSTE REX**, quod unicum Corona ac Sceptro Tuo dignum est, quia Populos omnes **AMORE** complectitur, hostes omnes **TIMORE** avertit; unicum, quod totius Orbis applausus sibi sponte conciliat, quia Nominis ac Vultûs Tui radijs illustratum; unicum denique, quod gloriosissimum tibi Spectaculum exhibet, dum Animi Tui ideam Tibi ipsi proponit. Verùm triumphalis hæc tessera paribus etiam meritis comparata est, duobus nempe conflictibus, **AMORIS** uno, altero **TIMORIS**. Priorem sustinuisti Anno natalis Tibi Sæculi nonagesimo, quando concordia Principum Electorum Suffragia Te in **ROMANORVM REGEM** electum, **LEOPOLDO** Parenti Tuo ac Imperatori Maximo
Suc-

Successorem non minorem destinarunt, eò nobilio-
retrophæo, quò magis liberæ voluntates sola dedi-
tione vincuntur. Altera pugna cum hostibus fuit,
sed quos Coronationis tuæ nuntius fati prostravit,
utpote qui longissimi moliminis bella à tot retrò an-
nis intexuerant, ut illam unam præverterent. Nec
omine caruit supremi Cæsareorum Exercituum ac
Lotharingæ Ducis eodem anno obitus, ut scilicet
communem ob illud funus Romani Imperij luctum
spes de victricibus Tuis armis concepta abstergeret.
Implevit hanc Tuæ hætenus Martiæ indolis fama,
qua absens etiam militares Tuas Copias ad Palma-
rum messem animasti, atque depicta in certantium
animis Regiæ Tuæ generositatis imagine de laurea-
tis antea hostibus triumphare docuisti. Hoc autem
anno famam & omina superavit Augusta Tua Præ-
sentia, quam dum Romano Imperio indulgere de-
creveras, illa sola Rhenum ac Danubium, plus quàm
numerossimo exercitu, firmasti. Iamque Tuis
in castris stabilia figit tentoria obsecundans Tibi
Fortuna; jam Victoria Tuis sub Insignibus militat,
in quibus conversa ad se mutuò Aquilarum capita
uniendum in Te rursus Orientis ac Occidentis Im-
perium augurantur; Orbe utroque hîc ad Roma-
nos Fasces æternam Tibi fidem stipulatis manibus
jurante, ibi à bellica Tua Virtute, quam tota Pallas
non fati exprimit, aureæ Pacis oleam meritò
sibi promittente.



PARTIS I.
CAPUT PRIMUM.
DISSERTATIO ACADEMICA
^{DE}
ADMIRANDO
TELESCOPII
INVENTO.




Uemadmodum visus humanorum Sensuum princeps est, & velut corporis intellectus; ita instrumentum illius usibus destinatum ante reliqua Philosophiæ inventa collocari mere-
tur. Quamvis itaque prima Telescopij rudi-
menta fortunæ debeantur, dum scilicet circa annum M. DC. VIII.
artifex quidam Hollandus una manu lentem convexam tenens,
alterâ concavum speculare vitrum oculo applicans, improvise
notavit, apparentem objectorum magnitudinem maximo au-
gmento excrecere. Nihilominus admirandæ hujus machinæ
consummata præstantia Galilæo de Galilæis Academico Floren-
tino verè Lynceo adscribi debet. Hic enim opticos tubos tan-

2 DISSERTATIO DE TELESCOPIO.

ta arte elaboravit, & subtilis Philosophiæ ratiocinio ad tam sublimem perfectionis apicem eduxit, ut qui prius tubi Hollandici vocabantur, deinde velut solius Galilæi partus, Galilæi etiam ipsi compellarentur.

Ostendet igitur Sæculum à reparatâ Salute decimum quintum Christophori Columbi Anno M. CCCC. XCII. & Americi Vespuccij Anno M. CCCC. XCVII. immortale inventum, novum videlicet Orbem ac deprehensos post columnas Herculis Antipodas. Major est Sæculi decimi septimi gloria, utpote quod, superatâ nubium & fulminum patriâ, per vastissimum ætheris mare in vitreâ velut Telescopij nave adeò se expandit, ut novas Insulas, novosque montes in globo Lunari, umbras ac maculas in Illustrissimo Planetâ, in cæteris errantibus Stellis continuum lucis à Sole transfusi fluxum quasi & refluxum, denique in Firmamento tot veluti novos incolas, quot in Galaxiâ, Pleiadibus & Orione recens conspecta sidera detexerit; verbo, per Telescopium, ut mutui fæderis caduceum, tam arcta cælestis cum terrestri orbe commercia firmata sunt, ut humani oculi pupilla, plus quàm crySTALLINA Archimedis Sphæra omnes astrorum motus circumferat, atque dum in tabulis Geographicis multæ adhuc terræ incognitæ designantur, tota tamen cælestium plagarum amplitudo optici hujus instrumenti magisterio innotescat; quo etiam impletum jam videtur illud præfagi Philosophi Senecæ vaticinium, ita de cælo loquentis: *Aliud hæc ætas; aliud, quæ post nos subibit, aspiciet.*



DISCURSUS PERIPATETICUS
Q U O
STABILIMUM COLORUM
A LVCE DISTINCTIO
VINDICATUR.



*O*ccasione Telescopij feliciter inventi placet celeberrimam hac atate de gemino illius objecto controversiam subijcere, an nempe colores, quos veros, reales, & stabiles appellamus, à qualitate lucis vario modo reflexa aut refracta distinguantur? Lucem enim substantiam esse, incredibilius longè est, quàm colores ex lumine componi; ut discursus iste, Atomistas fortius, quàm ceteros Adversarios stringens, palàm faciet. Et quoniam discursum Peripateticum in ipsa tituli fronte præferimus, necesse est, Aristotelis de coloribus mentem inprimis explorare. Duplicem itaque locum reperi, in quo Philosophus suam in hoc negotio sententiam haud obscure aperit. Primus est in libro de Sensu & Sensibili. ubi c. 3. Pythagoricos refutans, qui colores cum superficie corporum identificabant, mox subjungit: etenim color in termino corporis inhabitat, sed nequaquam terminus corporis est, quamquam eandem esse naturam, quæ extra & intra coloratur, putare oportet. Quid hîc dicent Adversarij, qui ad variam partium corporis texturam, plexum & ordinem confugiunt, si dissimiles rerum equali lumine attractarum colores explicare compellantur? deinde si corpora juxta Aristotelem extra & intra colores imbibunt, quomodo Solares radij candidum intus ebur efficient, qui tamen in contraria hypothese vehementer reflecti debent, ut luculentam ebori albedinem concilient? Alter locus è libro de Color. depromitur. Ibi enim Stagyrita c. 3. asserit, mixtos colores tribus modis evenire, quorum ultimus est ex subjectis coloribus, à quibus lucem reperiuti contingit. Unde sic infero. Hi subjecti colores non sunt lux, cum ista à memoratis coloribus reflectatur ac reperiatur; neque sunt superficies corporum, ut ex superiore textu colligitur; nihil itaque esse possunt præter qualitates à luce reflexa aut refracta distinctas. Eodem in libro c. 1. recensentur tres nigredinis species, quarum prima est, cum planè, quod videtur, suâ naturâ

nigrum est. Hinc ita *Adversarios* impugno. Prima species opponitur ab *Aristotele* reliquis speciebus nigredinis vel privativa, quæ, ut loquitur *Philosophus*, speciem præbet nigri; vel apparentis, cum rara & exigua lux à corporibus resilit. Admittenda igitur est alia species nigredinis cujusdam positiva. Sed hæc constitui nequit in tenuitate lucis, vel hispidâ corporum superficie, cum exinde tertia species resultet. Consequens proinde est, primam nigredinis speciem in *Aristotelis* Scholâ qualitatem esse à luce quoquomodo terminatâ differentem.

Porro coloris *Stabilis* à luce diversitatem auctoritate illâ confirmo, ad quam ipse *Aristoteles* in gravissimis *Philosophiæ* difficultatibus appellat, utpote sine magno rationum pondere nunquam deferendam. Communis hæc est humani generis præjudicatâ opinione, velut bile oculis suffusa, aut prætenso certi coloris vitro, à veritatis conspectu non impediti persuasio, quâ rubicundum sibi quilibet in intimis venis sanguinem salire, fulvum in reconditis montium cavernis aurum, candidum verò in obseratis arcis argentum delitescere; *Aethiopem* *Europæo*, fuliginem *Alabastro* etiam profundâ nocte in coloribus opponi absque ullâ erroris suspitione judicat; quâ lactis & atramenti liquores eodem vase terminatos, vel *Saccharum* & nitratum pulverem in minutissimas partes pistillo intra mortarium contusos, ac meridiano simul soli objectos extremè discrepare, nec manè primum ovem albescere & corvum nigredine indui, vel per umbram opinatur; quâ demum in *Sacrâ Hostiâ*, licet non expositâ, albedinem, sicut formalem ejusdem *Hostiæ* saporem superesse credit, fide sensus defectum supplente. Quapropter si *Adversarij* nostri contra *Copernicanam* terræ revolutionem à communi omnium iudicio valida argumenta deducunt; si insuper aliarum qualitatum & præcipuè quantitatis naturam ex Augustissimo *Altaris* mysterio stabiliant; licebit & nobis sumpto ab *Adversarijs* telo eosdem impetere. Neque *Poëtas*, quorum illi carmina in causa suæ patrociniū afferunt, & utinam in concinnandâ de coloribus fabula non imitarentur, audire detrectamus. Si enim in *Parnasso* rebus nox abstulit atra colorem, ibidem quoque nocturno frigore: alba ligustra cadunt. Nempe *Poëtico*, quisquis nobis adversus es, vel eodem *Marone* monitore, nimium ne crede colori.

Sed seriò agendum, & ex ipsis coloribus, quos apparentes vocamus, in hærens rebus stabilium colorum qualitas eruenda. Tres itaq; pro-

proprietates inuenio, quæ fixos colores ab evanidis discernunt. Ante omnia enim color apparens certum Luminaris situm desiderat, quo variato & ipse diversam Scenam exhibet. Sic iris, quam Optici primariam vocant, in quinque versicolores arcus distinguitur, rubicundum scilicet, flavum, viridem, ceruleum & purpureum; vivaces omnes ac generoso quasi penicillo expressos. Iris verò secundaria, seu cujus centrum non amplius reperitur in linea recta transeunte per centrum Solis & oculum spectatoris, colores refert languidos, horumque seriem prorsus inversam, cum radij Solares tam reflexi, quam refracti post decem graduum ab iride primaria distantiam jam multum debilitentur. Altera colorum apparentium proprietas est, quod si oculus illos ex latere, aut diverso sub angulo intueatur, aliud etiam spectaculum hauriat. Sic prisma vitreum triangulare per solares radios à propinquo speculo polygono exceptos Stellas in pariete depingit. Si verò idem speculum magis removeatur, umbratiles Stella in diversi coloris gemmas abeunt; unde tertia eorundem colorum proprietas consequitur, quod nimirum varij sint, transeuntes & caduci. Ita columbarum colla & nubium expansa innumeros trahunt à Sole adverso colores, qui tamen in sua origine, progressu & interitu continuam vicissitudinem patiuntur; dum intera Iris in tabula fixis coloribus depicta, vel parietis, in quo vitrum trigonum ludit, albedo, aut alarum in columbis candor, turbato etiam Luminaris & oculi situ eandem propè coloris intensiorem constanter retineant. Quare cum ipsi Adversarij gravitatem ac levitatem à temperamento primarum quatuor qualitatum distinguant, quia scilicet, mutatâ vehementer illâ temperie, non equaliter mutatur gravitas & levitas, ut abundè elucet in ferro candente; cur nihilominus ijdem formalem coloris permanentis rationem in luce constituunt, cum hac longè magis variatâ stabiliter tamen marmor Parium albeat, Smaragdus sit viridis, rubeat minium & crocus flavescat?

Intelligo, quid respondeant. Fundamentalem, ajunt, colorem variari; id est, partes ejusmodi corporum diversâ inter se symmetriâ conjugari; hinc simile lumen aliter reflexum vel refractum aliter quoque spectatorum oculos afficere. Enim verò, dum Adversarij corporum partes tam scitè connectunt, in suis interim responsis malè sibi coherent. Si enim ex illis queratur, cur aurum tam vegeto colore fulveat, reponunt, lucem à constipatis illius metalli partibus violenter repelli, ac versus oculum reverberari; quando autem de coctæ can-

crorum crusta rubedine interrogantur, respondent, particulas crusta, admixto praesertim sale, vel affuso aceto, minutim concidi, separari ac disijci, quasi verò tunc vires non perirent ad lumen validè reflectendum, quæ tamen necessaria forent ad tantum rubedinis incrementum. Rursus, inquiunt, Chamaleontem pro varietate subjectorum, quibus illud animal insidet, varios sortiri colores, cum sua pelle, instar laminae cornea pellucidæ, species cujuscunque coloris excipiat, & speculi more ad oculum transmittat. Vera hæc quidem est in nostra hypothese responsio, qui colores permanentes, & horum species à lumine distingui docemus. At eadem ratio non militat pro Adversarijs; quamvis enim lux certum colorem in subjecto Chamaleonti corpore inducens ad ipsius etiam Chamaleontis pellem reflectatur; quid juvat similitum radiorum appulsus, si alia sit partium corporis in Chamaleonte, & subjecto, cuius ille ad decipiendos venatores colorem induit, dispositio ac figura? Neque Microscopium, quo contraria sententia Patroni variam corporum texturam explorant, refugimus, cum vitreus etiam hic iudex pro nobis decernat. Sumamus enim aliquod tribus lentibus instructum, & rubri inprimis, postea nigri crinis particulam eidem applicemus. Ecce! æqualis in utroque deprehenditur partium magnitudo ac proportio, sub æquali angulo æqualibus radijs representata. Unde igitur tanta colorum diversitas? cur remus ob refractionem, quam in aqua patitur, fractus videtur, hi tamen crines ob similem in utroque refractionem non iisdem etiam coloribus tincti comparent? Deinde nigri marmoris frustillum cum aliquot atramenti guttis; mox candidi marmoris partem cum lacte sub æquali situ & radiorum copiâ comparemus, quanta non emicat atramenti cum lacte, candidi cum nigro marmore in superficie similitudo, in coloribus tamen diversitas; palpabilis, opinor, à cæco illo, quem Robertus Boyleus refert in sua experimentalis historiæ colorum c. 3. n. II. colores solo tactu distinxisse; ubi dissimulanda non est nova Adversariorum secum ipsis pugna: fatentur enim memoratum cæcum, licet ille acutissimo tactu pollens, chartis etiam pictis luserit, difficillimè colorem album à nigro discriminasse, cum ambo corporibus asperis & inæqualibus adhæreant; quo non obstante mordicè tenent, corporum in superficie similitudinem, similitum quoque colorum esse fundamentum.

Sed ipsa etiam vitra colore stabili imbuta ad Microscopij lucem examinemus. An pergent hinc defendere Adversarij, quòd vitrum rubrum in superficie magis differat à vitro viridi, quàm à vino rubro
vel

vel purpurâ, cui effato ipse tactus, inermis & armatus oculus, ac omnis à sensibus hausta notitia manifestè refragatur? Ac quoniam de Opticis experiētijs loqui incepimus, accedit ingens Sententia nostræ robur ex mira imaginum Anamorphosi. Quantumvis enim infamosâ illâ & à Scriptoribus passim adumbratâ Cardinalis Montalti tabulâ directè visâ amœnissimus campus omni rerum varietate spectabilis; è latere verò atque ex certâ distantia puncto coronata frondibus humani vultûs imago emicuerit; nihilominus sub diversis radijs, picturam maximè transformantibus, ijdem tamen colores erant, qui jam in campo virebant, jam hominis vultum amœna viriditate coronabant, cui experimento contrarium omnino in opposita colorum Hypothesi evenire debuisse vel prima Opticæ rudimenta demonstrant.

Gemina modò difficultas adhuc superanda occurrit. Prima versatur circa causam productivam qualitatum, in quibus colores stabiles sitos esse affirmamus. Idcirco Adversarij confringunt vitra, liquores in spumam agitant, vinum aqua vel oleo tartari miscent, radunt cornua, saponem diluunt, rosas & lilia distillant, ut incognita nascentium inde colorum causa nos possint redarguere. Bene est; & nos varij coloris pannum aut chartam malleo contundimus, nigra marmora ad æmulum speculi nitorem promovemus, carbones simul & candida ova, recentes & distillatos Armenia flores, eadem tamen utrobique forma spectabiles liquores intra & extra pellucidas ampullas, varij coloris vitra viscoso gummi illita jam Aurora, jam altissimo Soli, jam Lunæ decrescēti exponimus; neque tamen mutato licet partium nexu, & lucis jam obliqua, modò perpendiculari incidentia colores proportionaliter immutatos animadvertimus. Interroga deinde ipsosmet Adversarios, quæ causa juxta illos diverso modo partes corporum ordinet, in conos erigat, aut in retia quasi vel subtilissimas laminas extenuet, & ita illapsæ lucis radios aliter colligat ac combinet? an color fundamentalis, seu aptitudo corporum ad lumen certo modo terminandum? sed in adductis exemplis scabrities instar acicularum pungens in tersam ac complanatam, densitas in raram, opacitas in perspicuam figuram transit, & sic omne formalis coloris fundamentum collabatur, necesse est. Deinde quis in contraria sententia visibiles rerum species in obscuram cameram per Opticum tubum intromissas ijdem propè coloribus depingit, licet subiecta superficies sit diversissima, nimirum tela vel lignum, murus albus, aut nigra charta? Respondeo itaque ad causæ nostræ tutelam diversa re-

8 DISCVRSVS DE COLORIBVS.

rum temperamenta, ut saporis, soni & odoris, ita colorum quoque varietatem introducere; & sicut mutata temperamenti parte forma tamen substantialis mixti eandem gravitatem vel levitatem in ferro ignito conservat aut reparat; ita assero, antiquos colores, alterata licet corporum temperie & dissoluto partium vinculo eiusdem formae virtute non raro consistere, vel certè iuncta commixtorum corporum temperamenta ad novi coloris genesin conspirare. Caterum non ubique colores novos emergere existimamus, tales etiam generantur. Nam saepe oculi colores diversos quidem, sed arctè adhaerentes eosdem reputant; aut in colorum permixtione novos prodire credunt, cum tamen separatione facta cuique liquori & corpori nativus redeat color; saepe intermedia aëris aut aquae particula dissectis acriore succo corpusculis, vel coniuncti realibus ob peregrinam aliquam tincturam ascititij colores novum aliquod coloris genus tamdiu effingunt, donec heterogeneae partes ad fundum subsidant, vel dissipentur, ut iterum in confusis saporum vel odorum speciebus retorquetur; subinde succus, qui velut sanguis per florum venulas serpebat, exarescens aut violentè expressus vividum colorem subtrahit; saepe denique ipsius medij, per quod obiecta intuemur, & ideò nunc pallidam, nunc rubicundam Lunam credimus, affectio visui nostro illudit.

Interim verò Adversarij nondum acquiescunt, sed nova difficultatis imagine superfluam turbam, & soli numero conflando aptas esse permanentium colorum qualitates pronuntiant, cum lux diversis modis terminata experientijs omnibus maiore compendio satisfaciat. Ita profectò, supervacaneum dici meretur, quod ad plurimos naturae fines medium est omnino necessarium. Qua enim à scaturigine distinctionis omnis, ordinis, ac pulchritudinis fons, colorum scilicet varietas derivabitur? quae vis sensitivam facultatem ad obiecta praesertim remotiora indifferentem vicarijs speciebus determinabit, si causa harum productiva, seu qualitas diffusiva sui per spatium lucis beneficio perspicuum deficiat? localem enim partium figuram certa radiorum copia vel paucitate affectam neutro munere fungi posse, cæci etiam testimonio monstravimus. Nempe lumen sola conditio est, & necessarium ad propagandum colorem quasi vehiculum, quae ipsa inter utrumque necessitudo Adversarijs occasio fuisse videtur, illa, quae simul sunt, idem esse dicendi, atque distinctas à luce stabilium colorum qualitates penitus eliminandi, quas tamen hucusq; ab exilio vindicatas in Peripatum ac rerum naturalium Rempublicam restituere conati sumus.



CAPUT SECUNDUM.
DISSERTATIO ACADEMICA
DE
FAMOSA MORLANDI
TUBA.



I condignâ famæ tubâ aureum, de quo sermo nobis est, Sæculum celebrari deberet, melior fanè inveniri haud posset, quàm quæ anno illius Septuagesimo ab Academicis Societatis Regiæ in Angliâ, ac præcipuè à clarissimo viro Samuele Morlando primùm inventa, ac varijs deinde formis constructa est. Quamvis enim ipse jam Aristoteles, in libro de Secretis ad coronatum suum discipulum Alexandrum, cornu aliqujus ad multa Stadia percepti mentionem facere dicatur, quo inflato ac versus omnes plagas converso Pellæus Heros exercitum Orbis domitorem vel dispersum collegerit, vel in aciem dispositum ad prælia & triumphos ita animaverit, ac si singulis militum præsens loqueretur. Nihilominus Morlando integer debetur honos, cùm majoris planè laudis non sit, rem primò invenire, quàm eandem injuriâ temporum deperditam proprii ingenij solertiâ humano generi restituere; præsertim si nulla

prioris artefacti memoria cuiquam amplius inhæreat, vel illud inter Aulæ arcana sepultum publici nunquam juris evaserit.

Porro tubæ hujus utilitas tam magna est, quàm multiplex. Illius namque beneficio subita Architalassi imperia ad integram classem absque emissarijs lembis diffundi; amicus exercitus ab obsessis de maturando subsidio in linguâ aggressoribus ignotâ vel obscuris ex pacto notis edoceri; unius litui huic tubæ inserti clangore imminens exercitus, modico scolpo intra ejusdem instrumenti cavitatem exonerato tormentum bellicum simulari, dispersæ naves vel militum cunei, in procellosâ tempestate aut tenebris, consilio & ope contra naufragium vel hostiles assultus præmuniri possunt; quorum insigne specimen reliquit ultima urbis Tanger in Africâ sitæ obsidio, ubi cùm oppugnatores Mauri vallum aliquod à reliquo munimento ita reseculissent, ut nuntiis omnibus interclusus esset aditus; uterque tam valli, quàm munimenti Præfectus per eiusmodi tubas de suppetiarum necessitate, tempore & modo colloquebantur, & quidem in Anglico idiomate à Mauris non intellecto.

Par utilitati orietur delectatio, si talium tubarum artificio suavem Musicam ex dissitis locorum intervallis; Phonaſco nullo comparente, in libero campo adornes; si vocem è montibus ac sylvis tam fortiter reflectas, ut Echo, fugitiva illa Nympha, tandem deprehensa esse videatur; si præterea tubæ inexpertos aut immemores cursum sistere, & voce
quasi

quasi cælitus delapsâ ad frugem redire per jocum jubeas ; si demum ampliore orificio plateam publicam respiciente, arctiore verò in statuâ, linguam & oculos moventis, os immisso civium in compitis vel foro confabulantium voces, tanquam à statuâ procedentes, effingas ; qualem machinam fuisse credo, quam anno elapsi Sæculi octogesimo septimo Angliæ Regi pro viginti quatuor millium florenorum pretio oblatam Londinenses litteræ tunc perhibuerant. Quin ipsa Evangelicæ legis Aquila vatidici sui obtutus acumine tubam hanc designâsse nonnullis videtur, cùm diceret Apocal. 19. *audivi quasi vocem tubæ magnæ.* Magna illa profectò est, ac Philosophiæ inventis meritò annumeranda, utpote cuius peritissima manu construitur, & docto spiritu animatur.

DISCURSUS PERIPATETICUS
DE
ARTIFICIOSA SONI
INTENSIONE.

Vix tubam suam Morlandus primò inflaverat, cùm velut classicum insonuit ad nova Philosophorum certamina, quibus collisa inter se acutiora prioris Sæculi ingenia de soni tam intensi causâ contra ipsum tubæ inventorem Morlandum disceptabant, ut testis est præsertim epistola Anno M. DC. LXXII. Lugduni circa hanc controversiam edita. Haude equidem meum est, tantas lites componere ; interim, quæ opinio majore verisimilitudine nitatur, eò libentiùs enucleabo, quò ampliorem eruditionis apparatus hac materia subministrat.

Suppositis itaque, quæ Peripatetici de Subiecto, qualitate & propagatione soni tam realis, quàm intentionalis communiter ac solidè

statuunt; cum ab alijs jam sæpius recocta apponere non delectet; censeo primò, soni intensiorem inde proficisci, quòd ille sphericam sui diffusionem naturali indole affectans ad singula interna tubæ latera allidatur, & ita cum vocalibus radijs directis reflexos simul versus eandem plagam emittat. Testantur hanc intensiõis originem probata experientia; ut enim de carcere, quem Dionysij I. Sicilia Tyranni aurem dixerunt, inter Syracusarum latomias hodieum ex parte superstitem; de aulis fornicatis, specubus, cisternis, carvis Musica instrumentis & scalis in cochleam circumeuntibus, de tympano prope urbium mœnia pulsato, de fistulis pneumatici organi cylindricâ figurâ erectis, & acustico tubo surdastris adhibito conticescam; si speculi parabolici foco, ad quem sonori radij recurrunt, os opponatur, vox robusta prodit. Similiter de natatore quodam Panthotus Medicus recenset, illum in campanâ, ut vocant, urinatoriâ infra aquas descendentem cornu venatorium ibidem inflâsse, sed ob immanem ex omnibus campana punctis repulsum strepitum vertigine ac surditate correptum fuisse. Quis præterea nescit, lapillos aquæ injectos hanc in circulos extenuare, qui tamen saxorum aut littorum adjacentium obice impediti, ad principium fortiore impetu resluunt? vel, si ita placet, hydrargyrum vasi, instar tubæ in longitudinem extracto, infundamus; en! argentum vivum modico bacilli ictu contactum, plures circulos concipiet, centris in illâ linea sitis, quæ intra vas, velut axis extenditur. E contrario muri peristromatis tecti voces obtundunt, pluvia & nives campanarum clangorem minuunt, planities libero aëri exposita reciprocos sonos nunquam progenerat, frequens auditor contentam declamantis vocem propè elidit; cum nempe sonus his objectis elanguescens vel omnino absorptus reflecti amplius non possit.

Sed omni argumento potior est ille jocantis natura lusus, qui Echo, quasi offensa vocis filia, vel imago à Poëtis dicitur, rei tamen veritate nihil aliud est, quàm allapsi soni repercussio. Omitto hîc iterum trita geminata vocis exempla recensere, qualia in Cereris porticu, Cyzici turribus, Carentonijs columnis, Metellorum sepulchro, Cadurci mœnibus prope fluminis Obthi ripam, ac Ticini castro claruisse vel adhuc vigere asseruntur; ad duos tantum, Vesuvium, scilicet Campania & Carpatum Hungaria montes me converto, quorum ille post exoneratum ultimo ferali incendio craterem colloquia pastorum mirâ naturæ garrulitate repetere, vel uno cane latrante

venationis integra fremitum simulare incipit, sono ab effossis ad pluviarum deductionem canalibus intercepto, & iterum repercusso; in alterius verò montis ad ipsa penè Danubij ostia excurrentis vertice, si sclopus manualis explodatur, vel tenuis lapillus dissolvatur; mox strepitus effracto baculo initio similis per sylvas & valles ita circumfunditur, ut muralium tormentorum fragorem ac discurrentia fulminare ferens, integri montis ruinam cum innumeris vacillantibus saxis tracturus videatur, sono nempe ad vallium latera & sylvarum anfractus ubique impacto, ac inde turmatim quasi tumultuante, ut Bernardus Varenius in suâ Geographiâ affirmat.

Censeo nihilominus secundo, intensiorem soni provenire non tam à radijs reflexis primigenia vocis in tubam immissa, quàm ex eorundem radiorum collectione, quâ isti intra tubæ sinum cohibiti & è punctis diametraliter oppositis reflexi, duo semper latera conï saltem dimidiati efficiunt, usque dum in cuspide tandem associati, ibidem velut focum soni constituent. Paritas iterum est in catapulta flammâ, quæ nisi fistula ignivoma obstaret, à singulis nitratis granulis in spheram dispergeretur, illius tamen obstaculi ope in directum vibratur. Similiter in alembico seu distillatoriâ fornace vis flammæ ex igniculis oritur, qui libertatem nacti sparsim ab eodem fomite erumperent; uti non minùs contingit in lucernis ad opera encaustica adhiberi solitis, vel ardentibus cereis ad speculi parabolici focum collocatis, ubi luminosi radij, qui ultra speculi metam, quâ data porta, diffluxissent, velut à fugâ cohibiti parallelis lineis ad maximam longitudinem protenduntur. Et nunquid flumina ex angustis alveis & pontium fornibus majore celeritate ac impetu profluunt? nunquid argenteus præfertim America fluvius seu Solis amnis aquarum dulcedinem salso oceano ad centum quinquaginta passuum millia trans ostium invehi, quamdiu nempe cursus undarum dispersioni oppositus perseverat? Neque alia sanè causa afferri potest, cur Romani aqueductus sonum illis canalibus concreditum adeò olim propagaverint, cur tubæ figura, quò magis ad teretem accedit, vel in helicem aut spiram turbineatur, vocalior evadat, cur manus ori admota verbum furtivè insusurratum in clamorem vertant, salientes fonticuli altiore multo aquæ jactum ac fragorem edant, si aliena siphonum lege constricti, unitatem doceantur, cur denique natura ipsa in humanarum aurium æconomia exterius cartilaginem, conchæ instar, efformaverit; intus verò antrum, in quo veteres aërem insitum, seu congenitum repon-

bant, deinde aliam cavitatem, qua labyrinthus dicitur, ac denique tertiam specum, qua formâ cochleæ contorta in retinam, seu membranam illam desinit, cui nervus auditorius è cerebro inseritur, nisi ut hoc velut paradiſmate ad oculum appareret, quanta sit collecti soni ad intensionem procreandam efficacia?

Censeo denique tertio, nec reflexum neque collectum sonum intensionem suscitandæ sufficere, nisi phonici radij per impressum tubæ vocis impulsu recto tramite exporrecti spheram suæ activitatis longiore recta linea compensent. Nam sicut qualibet agendi virtus determinatos habet velut jurisdictionis suæ limites, intra quos secundum intrinsecæ virtutis mensuram in orbem seu globosum quasi spatium conformi difformitate operatur secundum impedimentorum vel adjacentium corporum naturam; ita dum vox tubæ concavæ inspirata secundo æris tremore provehitur, sonori, qui circumquaque per liberum ærem spargerentur, circuli via se dilatandi præclusa in constipatas lineas abeunt, sicut auri uncialis globulus in longissimum filum mallei ictibus extenditur.

Porro sonum in longitudinem dicto modo excrescere, documento imprimis sit funiculus, quo indicibus digitis utriusque manûs circumvoluto si aures obstruas, eoque ferreum instrumentum parieti vel alij duro corpori allidas, sonus ingens Erfordianæ campanæ haud absimilis per crispatum funiculum auditûs organo illabetur. Non minùs Architecti circulares fabricas & cryptoporticus tali arte construunt, ut verba in uno illarum angulo tacitè immurmura, in opposito angulo clarè resonent, quamvis nihil in spatium interjacente prodeat, ut celebre est Aula Mantuanæ decus; cuius iterum experientia ratio ex propagatione soni in longitudinem desumitur, juxta familiare exemplum submissæ vocis per navium malos, vel lenissimæ tactûs per longas perticas ad alterius aures trajectæ. Et quis non aliquando sensit tormentorum in remota aliquot miliaribus urbe explosorum bombos secundo alveo, tonitruum aut navalis prælij fragores ventorum turbine, tubarum clangorem per æreas undas, recta præsertim linea allabentem, vel aure ad terram applicata equestres copias ex longinquo deferri, non aliter ac Digbaeus ad triginta leucarum distantiam sensit, se ab odorosis marini roris effluvijs ad suspirata Hispaniæ littora suavi velut salute invitari?

Sola jam triplici huic Conclusioni deesse videtur Aristotelis auctoritas, quæ tamen in Peripatetico, qualem ubique profiteamur, discursu

~~scilicet~~ desiderari non debet. Opportune iterum geminus occurrit locus in 8. capite l. 2. de Anima, in quorum primo Philosophus asserit, quod Echo oriatur, cum aer factus unus ob vas vel locum, qui terminavit ipsum, atque dissolvi prohibuit, inde resilit, tanquam pila repulsus. In secundo verò loco analogiam soni cum luce instituens pronuntiat: nam & in sono perinde atque in lumine est. Unde ita concludo: pila lusoria in mutam lanam, vel cedentem ictui argillam incidens procumbit; à solido verò corpore retunditur, praesertim si inter duos muros alternatim subsultet. Lux etiam sui & caloris à se producti vim maximam exerit, si luminosi radij intra speculum collecti ad focus seu unionis punctum concurrant; aequali igitur passu, si Aristotelem sequi velimus, sonum reflecti ac colligi debere, sentiendum est. Deinde quemadmodum, si lucis radios à concavo & parabolico speculo collectos alio aequè parabolico, sed convexo ad focus applicito excipiamus, longissimam ustoriam lineam evibrari videmus. Itaque renovata cum luce analogia, fateamur oportet, vocalem quoque spiritum ex ipsa sui in longum directione intensiorem maximam concipere.

Verum huic ipsi vocis cum luce similitudini tenebras offundere alia experientia contendunt Adversarij dicentes, quod si speculum circulare vel ellipticum directæ voci opponatur, nulla Echo insonet auditori licet existenti in foco speculi; quod tamen eventurum illi censent, si sonus ad normam luminis reflecteretur. Equidem nostri propositi nunquam fuit, perfectam undeque lucis cum sono paritatem adstruere; cum illa in instanti, hic cum successivo corporum collisionum motu propagetur; & ita reliquam quoque inter hæc duo distinctorum sensuum objecta diversitatem admittimus. Sed quod præsens institutum attinet, afferant ipsimet prius rationem, cur duo in partes oppositas loquentes, & ad se invicem conversi se mutuò non percipiant, quin Joannes Bapt. Porta l. 19. Magia naturalis c. 1. exinde occasionem fabulae suæ hauserit, voces scilicet ita adversas ac longis canalibus intrusas ibidem intercipi posse & velut carcere claudi, suo aliquando tempore erupturas; non aliter ac nonnulli in Septentrionalibus plagis verba hyemali gelu astricta sub veris exortum rursus liquefieri comminiscuntur? Nempe ad sonum distinctè repetendum ea necessaria est repercussio, quæ directo similem aeris tremorem ad auditus organum iterata vice & illo demum tempore deferat, quo primigenij soni impulsus in acustici nervi fibrillis maxima ex parte eva-

nuit, ut sic redux sonus interjecta per brevem gyrum morâ separatim recipiatur, & idem auditus organum per similem iterum crispatis aëris tremorem percellat, quæ ipsa directæ ac reflexæ vocis clara successio sensibile temporis intervallum, ac notabilem locorum inter corpus sonans & objectum verba reflectens distantiam requirit. Imò objectioni huic ipsum jam Aristotelem, puto, respondisse, dum citato capite l. 2. de anima circa repercussionem soni ita locutus est: videtur autem talis sonitus fieri semper, sed non semper clarus efficitur. Pergit deinde Philosophus in lucis exemplo idem ostendere, sic inter alia docens: lumen enim semper refringitur, alioquin non fieret lumen ubique, sed essent extra locum eum tenebræ, quò radij Solis perveniunt. Verum non ita semper refringitur, ut umbram efficiat, quâ terminare locum solemus. An aliquid in rem nostram melius enuntiari potuisset? nempe, ut vox æmula redeat, non minima ex debitis conditionibus est talis mediæ ac termini dispositio, ne directæ vocis occursum retrograda sui vestigia oblitteret, ac priores partes ab ultimis à tergo urgentibus confundantur. Hinc Adversariorum experientiæ aliam inter Mathematicas delicias æstimatam oppono, qua non sine maximo omnium stupore Echo heterophona, seu verba à prolatis diversa & in alieno idiomate reddens ope duorum æqualem ferè loquelam habentium ita ordinatur, ut objectum resonans verbum ab unius loquentis statione allapsum alteri è regione posito, ac diversum quid interroganti pro responsione reponat, ubi vocis ad sensum reflexæ commovendum circuitus luculenter apparet.

Id tamen adhuc quari posse videtur, cur si circa Morlandi tubam res ita se habeat, non intra ipsum loquentis os eiusmodi repercussio ac collectio soni contingat, antequam ille vocem adeò intensam tuba inspiret? Verum difficilis solutio non est singula humanæ locutionis instrumenta oculo anatomico consideranti, quæ ad vocem vel simpliciter, vel simul articulatè efferendam necessaria sunt. Ipsa enim aspera arteria aërem semper reciprocantis, linguæ deinde, quæ plectri instar, ut Tullius loquitur, dentium fidibus verba modulatur; litterarum insuper, quarum aliquæ labijs primùm formantur, compositio apertè ostendunt, vocalem spheram organi naturalis impetu non ita iunctim vel in directum emitti. Caterum si pulmonum robori confisus etiam hæc præstare te posse contendas, redux mihi è bello Troiano tubicen eris, de quo Homerus iterum canat: Quinquaginta

quaginta alios æquas clamore, sonoque. *Hinc Morlandi tuba ab eodem ferrea vocis tubicine Stentorea vocata est. Per illam enim vox unius loquentis non confusa aut permixta confuso multitudinis simul vociferantis clamori vel Symphonico choro æquivalet, ad qualem effectum in Morlandi tubâ conspirant perpetua impulsa ac repulsa vocis successio, coeuntes adunatis viribus sonori radij, & horum denique per modum unius cuspidati soni ad longiorem lineam determinatio, è quibus ipsis fontibus artificiosam soni intensionem promanare, præsentis fuit Discursus argumentum.*



CAPUT TERTIUM.
DISSERTATIO ACADEMICA
DE
PRETIOSO
PHILOSOPHORUM
LAPIDE.



Er Philosophicum Lapidem hîc intelligimus pulverem vel oleum, aut tincturam quandam, quâ modica auri quantitas in magnam copiam augetur, vel disposita alieni mineralis materia in solidum aurum convertitur, ut proinde pretiosum hunc lapidem, gemmis omnibus anteponendum, multi secretioris naturæ Sigillum & virtutem auriferam, femi-


nali viventium virtuti similem, nuncupaverint. Nolim hic tamen communia jam illius præconia recinere, atque in medium afferre aurum Caligulae ex arsenico confectum, Arnoldi Villanovani aureas virgulas, Raymundi Lulli rosas & nummos auri puri & obryzi, Hetruriae clavum mediâ parte ferreum & mediâ aureum, Gregorij Friderici Electoris Moguntini novos aureos, quibus puriores ipsi monetarum Præfecti se nunquam vidisse affirmarunt; sed illud reticendum non est, quod Germaniae Ephemerides Medico-Physicæ ad Annum M. DC. LXX. Observatione XVII. referunt; nempe, cùm in publicâ disputatione Cornelius Martinus Antwerpiensis contra Philosophorum Lapidem in Academicâ Juliâ acriter insurgeret, aliquem ex Auditorum coronâ prodeuntem allato opportunè plumbo certam tincturam iniecisse, & ex illo metallo aurum cum omnium titillatione generatum adhuc calidum Cornelio porrexisset his verbis: *Solve mihi hunc Syllogismum.* Quare cùm Cornelius oblato auro non posset resistere, suam saltem sententiam in Alchymiae favorem mutavit.

Similis tincturae grano Ferdinandus III. gloriosæ memoriæ Imperator tres hydrargyri libras Pragæ in aurum conversas vidit, & aureum inde nummisma excudi iussit, in cuius unâ facie juvenis Solem radiantem loco capitis præferens, & sinistra manu Mercurij caduceum prætendens apparebat, cum inscriptione: *Divina Metamorphosis exhibitæ Pragæ XV. Jan. Anno M. DC. XLVIII. in præsentia S. Cæs. Maiestatis Ferdinandi III.* Atque ne Oeniponto longius abeamus, auctor est eruditissimus Anglus de Morcy, Ru-

DE LAPIDE PHILOSOPHORVM, 19

Rupertum Principem Palatinum Anno M. DC. LXII. Britanniae Regi insignem auri massam obtulisse, quales Oeniponti, in Tyrolis Metropoli, Alchymistae confecerint. Quis jam Saeculum decimum septimum vel ex hoc solo Lapidis Philosophici titulo aureum compellare dubitet; praesertim si Chymicum aurum in lance Peripateticâ nobiscum ponderaverit?

DISCURSUS PERIPATETICUS DE AURO CHYMICO.

ulgus, imò non parva etiam Litteratorum pars, dum aurum Chymicum nominari audit, subito ad Philosophicum Lapidem offendens; fumum venalem exponi, & oculis suis, ne illi egregiâ, si impostoribus Alchymistis placet, metallorum transmutatione in egestatis fodinam convertantur, providendum credit. Unde ad fidem nostrâ de Philosophico Lapide dissertationi adstruendam necesse est, Chymicorum Mastygibus obviare, qui aurum ab arte productum, velut illegitimum, & igne, quo genitum est, cum artifice suo damnandum, persuadere conantur. Atque ut levioribus confutandis supersedeam, ad quatuor praesertim capita reduci posse existimo, quaecunque in Alchymia dedecus spargi solent; gemina nimirum ex ipsis, ut in Scholâ loquimur, naturæ ac causarum visceribus, reliqua verò ex moralis Sapientiae dogmatibus deprompta.

A Physicis itaque exordium ducendo; metallum, inquiunt, cæterorum facile princeps, siue defecatam illius materiam, siue pondus, temperiem qualitatum corruptioni resistentem ac virtutem medicam consideremus, incertos natales & vagam causam sortiri non potest, sed patre Sole, matre verò terra; non à degeneri elementari igne in frigidâ Chymicorum culina progignitur. Possem hic tritum illud respondere, quòd ipsum purâ luce in cœlis Serenissimum, & extra Spharam suam alienorum corporum permixtione minùs qui-

dem illustre, idem tamen ubique elementum, ignis videlicet, primam in genere suo nobilitatem jure sibi vendicans, determinatam originis causam non habeat, cum modò alterius ignis actione, modò chalybis & silicis attritu, modò à Solaribus radijs in caustico speculo generetur; sed ipsum, repono, auri metallum certis nascendi legibus à naturâ non circumscribi, cum Aristoteles jam olim testatus sit in libro de mirab. Auscult. t. 94. circa Philippos in Macedonia metalla inveniri, quorum ramenta crescant dissecta, aurumque manifestò producant. Et t. 95. Circa Pæoniam crebris imbribus terrâ liquefactâ aurum, quod apyrum vocant, inveniri. Item in eodem textu: Ajunt & in Bactris Ozum fluvium glebas auri plurimas ferre, similiter & in Theodoronte circa littora ebullire aurum & alveo quoque deferri. Addit deinde Philosophus: In Pieria Macedonia fertur aurum non signatum in quatuor terræ hiatus defossum esse à Regibus priscis, ex quorum uno auri lamina palmi magnitudine excreverit. Lubet iam ita rationari: Aurum ex alio auro defosso succrescens vel ex aquis ebulliens, aut in liquefactâ terrâ superficie inventum nec ab eadem matrice, nec à calore procedit, à quibus aurum in profundis montium cavernis progeneratur. Hoc enim non tam æthereo ac suprema terra calori, quàm igni subterraneo ortum suum debet. Ille siquidem duros & asperos montes, quales auriferi communiter sunt, tam altè non penetrat, cum Solis radij mox iterum reflectantur & terra aliquot pedibus inferior nativum frigus retineat; ignis verò Subterraneus ab operarijs, præsertim intra Ungariæ Fodinas, eò intensior notatur, quò magis in profundum descenditur, calidis frequenter halitibus à terra centro sursum elatis, & circa Fodina parietes in variorum mineralium massam coagulatis. Ubi igitur in his & similibus exemplis eadem est activi caloris ratio, quam Adversarij necessitate indispensabili ad omne aurum requirunt?

Sed esto sanè, quòd cælestis calor, quin occulta etiam qualitatis à Sole in metallum sibi sacrum derivata influxus concurrere debeat, an non etiam illos ingeniosa artis industria extra telluris gremium auro suo poterit applicare? sique supremum infimi imperfectius est infimo supremi, an eidem arti deneganda est inanimis metalli, quamvis in genere suo præstantissimi, productio; quæ vivencia quoque, ut apes, pullos, & bombyces novit efformare, calore etiam vitali, quæ ova & semina excoquat: deficiente? sicut eiusdem artis opera fru-

fructus ac flores, intra cellas & calefactas cameras hyemali tempore generantur. Caterum in Aristotele adverto, quod metalla, utique ab auro diversa, inveniri asserat, ex quibus ipsum aurum per ramentorum sectionem, ab arte procul dubio factam, producat. Unde Philosophus, licet presentem materiam ex proposito non discussit, in nostram saltem sententiam inclinasse videtur; quidquid Adversarij Divum illius Commentatorem ad castra sua pertrahere contendant. Verum quo fundamento, colliget equus Lector ex 2.^a. 2.^a. q. 77. a. 2. ad 1.^{um} ubi Aquinas ita loquitur: Si autem per Alchymiam fieret aurum verum, non esset illicitum, ipsum pro vero vendere, quia nihil prohibet, artem uti aliquibus naturalibus causis ad producendum naturalem & verum effectum: sicut Augustinus dicit de his, quæ arte Dæmonum fiunt. En! Aristotelis interpres Angelus nihil prohibere insinuat, quin Ars, activas potentias passivis dæmonum more applicando, artefacta natura effectibus simillima producat. Addit verò S. Doctor in loco, quem paulo post ex Kircherò asseremus, Alchymiam esse saltem Angelis & Dæmonibus notam, quasi per particulam saltem innuere voluisset, eandem posse arti etiam humana innotescere.

Verum hic ipse labor, hoc opus est, instant Adversarij, ubi demum aureum illud filum sit, quo duce Alchymia ex tot opinionum de propriâ auri materiâ labyrintho se extricet, cum in illius etiam nomine vix ullus artificum cum altero consentiat, sed omnes velut ferram invicem trahentes, in oppositas partes discedant. Alij enim Mercurium in massam aluminis congelatum; alij hydrargyrum à reduce ad Arietem Sole diffusum; alij obviam & vix duobus terrancijs constantem materiam, ut ferri scoriam & commune arsenicum requirunt. At, quæso, quid hinc Philosophicâ sequelâ deduci potest, nisi centoculis tantum Argonautis concessum esse, aureum vellus surripere, vel pluribus etiam vijs Colchos navigari, verbo, summa auri per artem faciendi difficultas? Sicut enim natura horrente forinsecus & incultâ montium facie latentis intus auri, tanquam omnium malorum irritamenti, suspicionem avertere voluit; ita ars, natura Simia, imperitis & in suam perniciem hac quasi animâ mundi abusuris lapidem Philosophicum peregrina dictionis caligine abscondit, subtilis tamen ingenij face, & improbis vigilijs denique reperiendum. Accedit, quod Alchymista sæpius illius artificis more, quem Aristoteles citato libro de Mirab. auscult. memorat, in-

ventum à se modum aris cum stanno temperandi celatâ arte neminem docuisse, etiam ipsi artem suam eodem secum tumulto sepeliverint, ut proinde posteris idem semper de novo invenire coactis necessario evenerit, quod Philosophus in Epilogo l. 2. de Reprehens. Sophistarum affirmat; artes scilicet difficulter inveniri & facile perfici, cum principium illarum sit mole minimum, sed maximum virtute, tanquam omnia artis praecepta, velut in semine, complectens. Nihilominus cum Spagyrici intrinseca aliorum corporum principia ex partibus colligant, in quas ipsa corpora resolvuntur, quare similiter attemperatam auri materiam ignis beneficio elicere, & conditiones ad agendum necessarias longâ experientia expiscari non possint? quamvis concedendum ab omnibus sit, similem omnino materiam, aequali etiam operationis methodo adhibitam sperato tamen eventus saepe destitui ob diversum Solis aspectum aut alium aërem officinae aspirantem.

Hinc verò neutiquam consequitur, artis vires eò usque exporrigi, ut perfectiora etiam animalia intra pellucas Theophrasti cucurbitas valeat producere; cum nulla verosimili relatione constet, tale quid extra materni uteri locum unquam contigisse; concursus deinde ad prolem & organa illius perficienda necessarius suppleri, vel nutrimentum per vasa & venas umbilicales fœtui adaptandum aliunde subministrari non possit. Respondeant deinde ipsi Adversarij, cur metalla intra Struthionis stomachum in animatam substantiam transire permittant, Saturnum verò & Mercurium in solem converti negent ab arte, quae ipsis animantibus vitam & spiritum largitur? Ceterum male infertur, artem aurifactoriam non dari, cum Smaragdus in adamantem, argentum in ferrum transmutari nequeat, quemadmodum ridicule aliquis contenderet, feracem auri Peruviam inventam non esse, cum in America plagis terra Australis incognita adhuc delitescat, vel Geometriae analyses in dubium vocaret, cum tetragonismus seu circuli quadratura omnibus nondum numeris absoluta sit. Nempe ventura etiam Sacula novos habebunt fructus, quos sera carpere posteritas, & plurima modò incognita, aliquando palam fient, & in acta referri cupient.

Nunc ad moralia, ut vocant, argumenta deflectendo; Adversarij rursus Alchymiae aqua & igne interdicunt, tanquam in humana Reipublica perniciem nata, & ideò deaurato tantum fune remuneranda. Sed nunquid eadem manu gloriosa Germanorum inven-

inventa suffocarentur, Pyrotechnica scilicet & Typographia, cum illa contra Religionem saepe ac legitimos thronos fulminet, hac verò infamibus & haeresin olentibus libris publicam lucem inficiat? Imò nec novus orbis inveniri unquam potuisset, ne veterem scilicet abductis tot colonijs, ac tristibus naufragijs propemodum exhauriret. Utinam extra potestatis humanae limites jacerent, quaecunque in virtutis & morum damna nascuntur! nec fascina, philtrea, fictitia gemmae amplius forent, nec secula unquam miscuissent aconita noverca. Interim verò ipsi Adversarij, sui velut immemores, ex objecta nobis auri adulterini frequentia egregie in rem nostram probant, non omnia humano generi perniciose in impossibilium tribu collocari debere; quin praeclaras inde auri Chymici utilitates suggerunt, quòd illud à sincero auro vix discerni posse protestentur. O laudem vel ex iniusta infamiae nota singularem! aurum enim minerale rubiginem nescit, medica vi pollet, praesertim potabile redditum, humani commercij cos, longi sudoris merces est. Cum hoc itaque genuino & ad Lydium lapidem probato Chymicum aurum ubique convenit, in tenues laminas equaliter ductile, colore manus non inficiens, septimum etiam ignem ac ipsam cupellam sustinens, ut Cornaeus expertissimus Philosophus seipsum vidisse scribit; & tamen nulli commodo aut lucro sit, sed ex aureis montibus falso promissis misera tantum privati ac communis boni pestis erumpat? haud equidem negaverim, providè Legislatores prohibuisse, ne Alchymia passim exerceretur; cum vulgus majora viribus attentans, & sacra auri fame rabidum, si naturam flectere non posset, saepe Acheronta moveret, vel certè in crucibulo dilapidatum patrimonium cum cerebri simul non raro jactura decoqueret, ut nihil dicam de circumforaneis ciniflonibus, qui postquam Mercurium igne diu torserunt, illo denique in auras abeunte, clientes suos improvisa fuga, vel famem & gulam sibi ipsis laqueo frangentes deludunt, aut in justitiae stateram appensi, & minus habentes reperti furcarum sunt, appendices, ut jam olim Paracelsus doluit, unum sibi discipulum à carnifice abstractum esse, de reliquis etiam non sine gravi metu sollicitus.

Hinc Adversarij pro causa sua pronuntiatum existimantes, jure sibi videntur ita concludere; nimirum, cum tot è mendacijs compacti Alchymistae sola Cerbero offerenda verba & opibus emunctorum lacrimas cientem fumum vendiderint; procacis amplius animi

Et perfricta frontis non esse, reliquos etiam omnes dignitate, Scien-
 tia, virtute prestantes viros, à Martino del-Rio citatos (cujus
 tamen Disquisitionibus Magicis ipsi aliàs maximam fidem attri-
 buunt) tanquam inidoneos in presenti controversiâ testes rejicere,
 non quidem ut fraudum architectos, vel prestigiarium reos, sed tan-
 quam in arte tot difficultatibus obnoxia deceptos; cum præsertim æ-
 tatis nostra in perscrutandis natura arcanis Plinius, in artefactis
 Germanus Archimedes Kircherus verum ac non Sophisticum aurum
 ab Alchymia confici posse negaverit. Enimverò si ita licet argu-
 mentari, dicam Et ego, ex vituli cadavere non apes, sed fucos, ex
 basilica folio inter duos lateres incluso fictos scorpiones, ex felle equi-
 no in flumine suspenso umbratiles serpentes, ex Ægypti Et Chinen-
 sum furnis imaginarios tantum pullos erumpere. Dicam, ferrum
 in cuprum, Mercurium in argentum nova formæ introductione
 transmutari non posse, sed cupreas atomos hinc inde dispersas ob mu-
 tuam sympathiam se colligere, argentum jam prius latens à cæteris
 partibus liquatione secerni, aut fornacula furtim injectum ad ima
 vasis delabi. Dicam, arbores auri ramentis insignes Et metallife-
 ras vites, quæ juxta Monomotapa fodinas crescere memorantur,
 aniles fabulas esse; argenteam plantam cum quibusdam ramulis,
 quasi radicibus ex minera enatam, qualis Neapoli monstratur, si-
 milem tantum esse vero argento; aurum vegetabile, quod Scaliger
 in Macedoniâ olim seminatum fuisse recenset, ex nugis Et Græco-
 rum figmentis succrevisse, celebrem aureum dentem Vilna Anno
 M. DC. LXX. limâ ex lydio lapide per aurifabros examinatum,
 aurum tantummodo fucatum fuisse; vel si indisciplinata est ejus-
 modi pernegandi omnia libertas, Adversarij aliquando desinant
 contra testes à nobis allegatos excipere, cum levitatis non sit, in sua
 arte peritis credere; aut certè suspectum nobis esse deberet quodcumq;
 auri commercium, ne scilicet illegitimo igne editum pro metallo, So-
 lis Et terra sobole, ob simillimam utriusque indolem supponeretur.
 Kircherum verò quod attinet, accedant Adversarij Mundum
 subterraneum l. II. sect. 4. c. 2. de auro Chymico falso & vero. Ubi
 Auctor cum Divo Thoma ita loquitur: Alchymia quamvis sit dif-
 ficilis, non tamen est impossibilis, quod & nos dicimus. Eant
 jam Adversarij, Et quod nobis non vacat, ista Sacri Doctoris à
 Kirchero assumpta verba cum alijs utriusque textibus conciliare stu-
 deant.

Nihilominus ingenuè ab omnibus fatendum est, Pseudochymicos illos jure repudiari, qui sicut ova bombycina sub axillis excluduntur, & vermes intra modicum tempus in cerebro illorum nidulantur, ita aurum, metallorum Regem, ex nescio quo natura acerri-
mo aceto, virginis lacte, arbore vitæ vel aqua artificum manus non madescente faciliter se producturos, quin cum Augurello im-
mensi etiam maris undas in aurum se versuros jactitant: argentum si vivum tunc foret æquor; cum tamen re ipsa hi furum contuber-
nales baculos ad laborem adhibeant intus cavos & auro turgentes, vel carbones ex auri pulvere compactos cum metallis misceant, aut loco Mercurij personatum, ut vocant, Solem crucibulo infundant, non sine maxima contractum, Medicina & monetarum corrup-
tela. Ita est, Alchymia exquisitis experientijs, periculoso moli-
mine, ac magnis sumptibus comparatur, cum natura ipsa auro in-
tra montium matricem efformando subtilissimos minerarum spiritus & solertiam omnem impendisse videatur. At artem illam impossi-
bilem nec Philosophorum Principes censuerunt; aut nunquam in-
ventam esse, nec ratio ab auri natura vel moribus petita
convincit.





CAPUT QARTUM.
DISSERTATIO ACADEMICA
DE
UTILISSIMO
THERMOMETRO.



Sicut Pallas è Jovis vertice prodijſſe fingitur , ita non fabuloſè instrumentum frigoris & caloris incrementa menſurans, Thermometrum ſcilicet, ab erudito Drebellij cerebro, ut Reyherus proclamat, in Litterati Orbis lucem primò editum fuit. Alij quidem hoc honoris tribuunt Roberto Fluddo, ſeu à Fluctibus; qui tamen ſimplici aquâ, facile glaciem contrahente cum vitri etiam rupturâ, non verò vini ſpiritu uſus eſt. Alij adhuc antiquiora dictæ machinæ fundamenta eruderant. Interim certum eſt, Thermometra, ſive deinde Magdeburgica Ottonis Gericke, ſive Romana P. Athanaſij Kircheri, & Raphaëlis Magiotti, ſive Florentina celeberrimæ Lynceorum Academiae conſideremus, illa, inquam aureo, de quo ſcribimus, Sæculo ultimam manum accepiſſe, ſuperatis, quantum licuit, difficultatibus omnibus, quæ vel ab externi aëris affectione iſtis effectibus adverſâ, vel ab instrumenti fabricâ naſcebantur.

DISSERTATIO DE THERMOMETRO. 27

Duplex autem Thermometrorum genus est; unum rarius, in quo superioris sphaerae aer praevalens inclusum vitreo tubo liquorem crescente calore deprimit, & decrecente elevat. In altero verò nobis familiari idem liquor invalescente calore dilatatus per tubi collum assurgit, redeunte verò frigore densior redditus è collo rursus in globum subsidit. Quòd si artem pulchritudine gratiorem desideres, thermoscopium duplici spiritu Austriacos colores referente ita instruas, ut illud hoc gemino liquore jam instar fontium saliente, jam in oppositos globos infuso, utrumque impleat Orbem; vel alio elegantiae genere Apelles post tabulam lateat, id est, negotium sic adornetur, ut æmulus instrumenti index distinctos in circulo caloris ac frigoris gradus more horologij demonstret.

Unde maximi simul momenti commoda ad varios Disciplinarum fines profluent, Exinde enim Astrologia peculiare coelestium corporum influxus, Geographia climatum naturam, Optica aeris refractiones, Medicina liquorum & salium commixtionem ad inducendum debitum frigoris ac caloris temperamentum, Chymia statum cujusque rei eliquandæ terminum, Physica liquorum & corporum etiam solidorum in primis qualitatibus differentias depromet, ut leviores utilitates præteream, quas aliqui in coquendis ovis, vel pullis intra furnum excludendis se hausisse scripserunt. No-

stri tantum fori est, veriore raritatis à calore, & densitatis

à frigore introductæ modum Thermometri
judicio decernere.



DISCURSUS PERIPATETICUS
^{Q U O}
SEMI-ATOMISTICA
RAREFACTIONIS
^{A C}
CONDENSATIONIS
HYPOTHESIS EVERTITVR.



*S*emi-Atomisticam hinc vocamus illam Hypothesin, non quæ rarefactionem per expletas vacuitates, vel eductam novam quantitatem abolitâ jam opinione tradit, sed quæ plurimos hac ætate propugnatores nacta, lac, oleum, vel aquam igni appositam rarefieri docet per extranea corpuscula intra tenues lactis, olei vel aquæ meatus suscepta; eosdem verò liquores condensari, peregrinis illis corpusculis iterum ejectis. Sicut enim explicata modo Hypothesis Patroni in simplicitate minimorum elementarium ab Atomistis desleclunt, ita horum ritu circa præsentem controversiam differere videntur. Quod ut clariùs elucescat, audiantur ipsi Atomistæ de accenso in militari- bus cuniculis pyrio pulvere ratiocinantes. Totus, ajunt, qui apparet ignis, jam priùs in nitratis granulis latebat, sed interjectis quasi carceribus à se mutuò divulsus seditionem moliri ac stipatis manipulis ad inferendam obstaculis ruinam prorumpere non potuit; usq; dum admotus fomes effractis repentiè ergastulis captivas flammulas in libertatem asseruerit. Sibilant hinc nobiscum Adversarij, quos sub Semi-Atomistarum nomine isto discursu insectamur; ac imperceptibile esse exclamant, quomodo pulvis ex sulphure, carbonibus & nitro compositus tantam ignis copiam sinu suo absconderit; cur enim, si ita foret, ex nullo pulveris grano etiam per lapidem acutum contuso flamma emicuit? cur non levitas igni congenita, fumus, calor, streperus sonus inquilinum prodidit? cur minima scintilla à fune igniario delapsa carceres omnes violentè effringit, quorum nec unicum reserare valuerunt tot ignei spiritus in minimo granulo constipati?

Egre-

DISCVRSVS DE RAREFACTIONE. 29

Egregiè hæcenus Semi-Atomistæ pro Peripato decertârunt. Sed jam ad eorundem stragem pyrio pulvere utamur. Quæro itaque, dum tormentum bellicum exploditur, unde tanta sulphuris & nitri, vel potius ignis rarefactio oriatur? ubi aditus pateat heterogeneis corpusculis intra curulem machinam recipiendis? an per anterius illius orificium? at ibi erumpens globus objecta quasi portâ ferreâ resistit ac circumpositum aërem violento fragore elidit, ut vis etiam maxima alienum corpus in balistam intrudere frustra laboraret. An potius perforamen igniarium? at inde ignis profilit, & quò angustius illud est, ac aliorum corporum familijs recipiendis ineptius, eò magis Rarefactioni natum est, factumque. An denique per crassissimi metalli poros? at ipsi Adversarij perhibent, metalla tam lentè rarefieri obsuarum partium densitatem, ita ut Guilielmus Ayleworthus contraria nobis Sententia acerrimus propugnator in suâ Metaphysica Scholastica tract. 1. disp. 10. c. 1. asserat, ferrum decies millies aëre esse densius. Enimverò contrarium hîc accideret, si tot heterogenea corpuscula metallum subirent, & per consequens ferrum magis, quàm excitatum ignem immensa sui copia rarefacere deberent. Deinde, quo tam subtili terebro port illi, aliàs cuicunque dilatationi pertinaciter resistentes, intra ictum oculi aperiuntur? quis in circumsito aëre conscriptas repente atomorum turmas laxatis vexillis in novam stationem immittit, vel immissas cohibet, ne bipatentibus pororum claustris eadem via Thebis Athenas redeant? cur frigida ob antiperistasin extranea particula ignis, cujus postea quasi visceribus intimè insinuantur, virtutem non hebetant, calorem non refringunt?

Sed ad Thermometra redeamus, in quibus aqua per calorem elevata, & ob frigus iterum subsidentis hanc causam afferunt Adversarij, quòd scilicet liquor ab agente extrinseco calefactus apertis meatibus tenuiores halitus per vitri poros attrahat, & frigore constrictus eosdem rursus eliminet. Equidem ignoro, qualem huius responsi partem primò falsitatis redarguam? esto itaque, quòd densius etiam vitrum, hermeticè insuper clausum ac distillatos sæpius spiritus arctissima custodia retinens, poros tamen numeret; sed quomodo calor heterogenea corpuscula per illos attrahet, qui à Philosophis omnibus congregans homogenea, & dispellens heterogenea definitur? quis novus Prometheus nescio quam divina particulam aurea ab omni fece depuratam ac igni in concavo Luna similem repente

deferet, ut ista per vitri poros cribretur, vel ex Ulyssis utribus emissa, tempestatum phases demonstret; qualis profectò ætherea aura si adefset, præsentia suæ signum daret in spumâ, eluctantibus bullis, & diluti liquoris colore; vel contractis ex aëre vicino facibus turgida non posset amplius minimos poros subintrare, aut è contrario ampulla vitrea frigidissimo aëri exposita non difficulter succurreret, ne ob spiraculi defectum rimas ageret, vel quod non rarò contingit, penitus rumperetur. Deinde si Thermometrum utraque manu fortiter stringatur, ex templò turbatus liquor in altum se librat, quamvis vitri meatus à laxitate impediuntur, ac manus, unde nova corpuscula emigrare deberent, non tantum non vacuitate laborent, sed & ipsa intumescant; ut proinde necessarium non sit Adversarijs præterea obijcere lusorios folles, inflatos utres, liquecentem ceram, assatas castaneas, ebullientes ollas, epistomia ejecta, & ipsas, quibus suæ Hypothesis infirmitati mederi student, scarificatorias cucurbitas.

Accedat tantum Discursui nostro, qui agmen ducere debebat, Aristoteles. Hic 4. Phys. c. 9. ita decernit: quare & ipsa moles sensibilis non ideò extenditur, aut constringitur, quia materies aliquid insuper accipit aut abjicit, sed quia ipsa materies utrumque subire potest, quo fit, ut idem sit rarum & densum & utriusque materies una. Quæ verba nos ipsi in sententia nostræ patrociniū concinnasse videri possemus; adeò demonstrant, corpora rarefieri & condensari non per introsuscepta vel ejecta corpuscula, sed per easdem materiæ partes ob alteratum temperamentum jam magis extensas, jam magis contractas. Addunt alij ex eodem Philosopho receptos in omni scholâ Rari ac Densi conceptus, quòd scilicet illud sub magnis dimensionibus parum, hoc verò sub parvis multum habeat materiæ; cum tamen contraria nobis Hypothesis utrobique materiam dimensionibus parem constituat, ac rarefactionem cum rerum permutatione confundens, spongiam, si aqua tumeat, fistulam, si inflatur, corpus, si respiret, glaciem, si in plura frusta discerpatur, aquam aliâ aqua liquidior affusa, & sic ipsa condensatione rarefieri, vel conjuncta densa corpora in unum rarum coalescere per legitimam deductionem concedere cogatur.

Quod verò maxime admiror, prætendunt Adversarij, in sua etiam Hypothesi eandem omnino materiam nunc magnis, nunc parvis dimensionibus substare, cum aliorum corporum interpositio sen-

sibilis

sibilis non sit, ac materia principali totam rari vel densi appellationem, proprio nomine instar fluminis Oceanum subeuntis deperdito, relinquat. Itane verò sensibilis non sit tanta inter idem corpus jam condensatum, jam rarefactum diversitas, ut in spatio, quod centum illius corporis partes antea occupaverant, iam sola centesima pars consistat, iuxta Boylei & aliorum natura Consultorum experientias? ubi igitur sunt nonaginta novem corpuscula ad eiusmodi rarefactionem requisita, quæ sanè si homogenea forent, adhuc sub sensus etiam plures caderent; quod usque dum credant Adversarij, centum piperis granula unius loco mastigent. Sed cum heterogenea, id est, diversæ formæ ac proprietatum corpuscula exigantur, quis tali, tantæq; sensuum hebetudini non indignetur vel condoleat, qui vinum centesima sui parte adaquatum vel mellis guttulam absynthij mensura immersam à puro vino ac melle non distinguunt? quin secundum Fromundi & Smellij computum unus pulveris nitrati inflammas abeuntis palmus ad eundem palmum nativæ pulveris sulphurei forma coarctatum non aliter se habet, quàm centum viginti quinque millia ad unitatem; & tamen, pro Adversariorum fidem! tot millium exercitus ab uno quasi milite discerni nequeat?

Nec ille Philosophi textus veræ & nostræ Hypothesi adversatur, quo confisi Adversarij se nobis nostrum Aristotelem relinquere, & sibi suum servare gloriantur. Excerptus ille est ex c. 14. de Categorijs, ubi Philosophus appellat rarum id, cujus partes inter se disjunctæ sunt; scilicet, ut inferunt Adversarij, propter heterogeneas partes in rarefacto corpore interiectas; quasi verò in nostra etiam Hypothesi suprema pars aëris à sole vel stupæ flamma rarefacti non distaret ab infimâ parte, cui ante raritatem sibi inductam multis palmis vicinior existerat; quæ secunda explicatio tantò conformior est Philosopho, quantò altera unum Aristotelem alteri, id est, sibi ipsi indecorè opponeret.

Interea verò citati paulò ante Ayleworthi iterata vox auribus nostris illabitur, qui oppositam nobis Rarefactionis Hypothesin per decem folia quasi in triumpho deducens, mysterium esse exclamat omnem intellectum excedens, non responsum sub captum cadens humanum, quòd res materiae ac quantitatis limitibus circumscripta modò duos palmos absque replicationis periculo occupet, modò nulla sui parte cum altera compenetratâ ad unicum palmum retrahatur; præsertim, cum sola entia spiritualia indulto sibi à natura privilegio

indivisa sint in toto activitatis suae spatium, nec in singulis huius sphaerae partibus divisa. Gaudeo communem hinc nobis iterum cum Adversariis causam esse. Quæro enim, cur in metallis & vitro ipsi pori non replicentur, dum dilatati aliena corpuscula recipiunt? vel non penetrentur, dum iterum compressi easdem atomos excludunt? profectò non ob aliam utrobique causam, nisi quia replicatio duo spatia adæquata; penetratio verò simultaneam plurium rerum diversam quantitatem habentium in eodem omnino loco præsentiam requirit, quod nostræ causæ melius, quàm contrariæ patrocinari, manifestum est unam cum altera comparanti.

Interim hæc ipsa dilatatio vel compressio, secus ac Adversarij criminantur, absque vitali motu peragitur, sicut talis non est, quo sicca faba intra vas aquâ plenum conclusa L. librarum pondus elevare, aut vas omnino disrumpere certa docuit experientia; imò vitalis potius dici mereretur corpusculorum motus, quo hæc in oppositâ Hypothesi non prius tormentum bellicum, quàm exoneretur, involant, frigori verò, licet naturâ suâ minùs activo statim cedunt; crassior etiam elementaris aer impervios sibi metalli poros refugit, nec auram ætheream suis particulis vitiatam, velut rationis ductui obsequens, ingressu prohibet.

Ad illud porrò, quod suprà addebatur de perfectione enti spirituali propria ad materiales entitates translata, repono in primis Scientiarum Oracula, Divos Augustinum & Bonaventuram, Albertum Magnum & Alensem cum Illustrissimâ Thomistarum Schola acerrimè defendere, quòd Animæ etiam materiales Brutorum indivisibiles sint, in cuius sententiæ favorem ipse Aristoteles præcipuè l. de Juvent. & Senect. c. 1. à multis adducitur. Sed auctoritate in medio relicta, licet corpus aliquod jam minorem locum, jam maiorem à superveniente calore vel alia qualitate determinatum impleat, corpus tamen esse perseverat, cuius ratio unice consistit in dependentia saltem mediata à quantitate pro quovis connaturali illius corporis statu. Nempe nec Angelus per divisibilem ubicationem magno spatium insistentem spiritum exiit, neque res corporea in ampliorem locum extensa spiritus naturam induit, integro semper cum materia & quantitate commercio; ut adeò necessitas nulla Adversarios compulerit, Hypothesin excogitandi tot difficultatibus implexam, quot corpusculis vel in Rarefactione intro suscipiendis, vel in Condensatione eijciendis occupatam.



CAPUT QUINTUM.
DISSERTATIO ACADEMICA
DE

MOBILI
PERPETUO.



Uem Natura in Siderum & Fluminum cursu, Maris accessu & recessu, aëreis impressionibus, mixtorum ortu ac interitu motum perpetuum semper repræsentat, eundem Ars, Naturæ æmula, siphonum, follium, & hydrargyri beneficio, elementorum rarefactâ mutuò vel condensatâ substantiâ, antliæ & Archimedææ cochleæ, rotarum ac ponderum ministerio exhibere conata est circa dimidium maximè aurei nostri Sæculi fluxum, quo omnes propè Philosophos ac artifices desiderium in- fedit flagrantissimum perpetui Mobilis architectandi. Nomine verò Motûs perpetui artificialis intelligendus est ille tantum, qui non à materia, utpote sub Scientiarum considerationem non cadente, sed ab effectrice potentiâ & quidem irrequietæ machinæ intrinsecâ nunquam deficiens, vel interruptus appellatur; ita tamen ut natura quidem vocari in subsidium possit, sed quæ expectari non debeat, arte naturalibus causis dominante & istas pro suo libitu in jure quasi pistrinum compingente.

34 DISSERT: DE MOBILI PERPET:

At cui immortalis honor Inventi illius debetur, in quo viginti sæcula perpetuo ingeniorum motu defudârunt; cùmque Geometriae, Staticæ & Hydraulicæ operam, ac etiam oleum in ungen-
dis tot rotis consumpsissent, denique Motum perpetuum impossi-
bilitatis condemnârunt? Audite. P. Antonius Martini Matheseos
in Collegio Romano Professor Anno M. DC. XL. horologium
hydraulicum, cujus figuram & machinam hîc describere instituti.
nostri non est, publicæ Concertationi exposuit cum gloriosa hac
inscriptione: *Motus perpetuus diu desideratus, conquistus diu,
non possibilis modò, sed facilis & ad praxin reducibilis.*

Subinde cùm hydraulico huic horologio nonnullæ difficultates,
superandæ tamen, objicerentur; P. Stanislaus Soluski Polonus ejus-
dem Religionis ac studij affecla, & ipse post viginti annos à Roma-
na perpetui mobilis inventione præterlapsos, in illud Archimedis:
εὐρηκα prorupit; fitulis ita coaptatis, ut aquam è puteo alternis sine
quiete motibus attraxerint, cui machinæ sequentem titulum Auctor
inscripsit: *Machina Motûs perpetui Artificialis, quæ semel con-
citata ad motum se ipsa perpetuò movetur sine ullo adminiculo externo;*
de cujus ipsius machinæ Architecto P. Gaspar Schottus in Technica
curiosa l. 10. loquens, *inventum*, ait, *hoc sæculo nostro, qui metas
à natura, ut videbatur, arti præscriptas sit transgressus; repertum
Columbum, qui centrum non jam consistentiæ, sed motûs
indefectibilis in hoc ovo contumaci
detexerit.*

DISCURSUS PERIPATETICUS

D E

METU VACUI.



um non minima perennis motus ratio à metu illo proveniat, quo Natura vacuum abhorrens, gravia sursum, ac levia deorsum urget, opera pretium fore arbitratus sum, si questionem hoc, de quo agimus, eruditionis Sæculo summè agitatam eventila vero, & quod Novatores se palpare Vacuum credunt, ego cum Aristotele, redintegrato proscriptionis decreto, ex tota naturalium rerum Universalitate expulero.

Atque ut obvijs, non tamen minùs efficacibus enumerandis abstineam, quæ insitum naturæ Vacui metum luculentè sensibus ac menti obijciunt; lampas scilicet Theodosiana oleum pro ratâ quasi succedentis aëris portione ex ampulla affundens, embolus in os bombarda, quando vis illum extrahens intepescit, sponte relapsus; clavus, ut e pariete extrahatur, hinc inde movendus, quò aëri subeunti via aperiatur; siphon per modum gnomonis dolio immersus, si è longiore illius crure aëer sugatur, altero vinum porrigens; & quæ aliæ experientiæ è Thermometris vel Chirurgorum cucurbitis præcedente capite memoratis deduci possunt; ipsa tantum provoco Torricelliana, Magdeburgica, & Anglicana machinamenta, ac vel isto triplici ariete omne Vacuum expugno. Jamque Evangelista Torricellus & Valerianus Magnus nomine, tubum vitreum superiore sui parte instar sphaeræ protuberantem Mercurio replent, ac illius orificium digito statim obturantes, eundem tubum alteri argento vivo in subjecto vase stagnanti immergunt. Ecce! Mercurius mirâ inquietudine subsultans, ascensum & descensum aliquamdiu alternat, usque dum quasi defessus subsidat, sphaerica vitri parte penitus, ut videtur, vacuâ, id est, sine omni corpore derelicta. Hic enim verò sibi applaudunt Vacui Defensores, atque in ipsa meridiana luce, quæ per spatium illud adhuc traiecitur, se Vacuum conspiciari proclamant. Risum teneatis amici! ac nova mysteria quæ Peripateticorum hætenus, ut Adversarij loquuntur, superbam inscitiam latuerunt, prono capite veneremini. Quid? ergone insci-

tia sit, affirmare, nec lucem, nec magneticam qualitatem campanula intra vitrum suspensa exterius applicatam, neque sonum à cadente post remotum magnetem ferreo malleolo editum sine subiecto, cui inhereant, propagari posse, quod & maximus non inanium Philosophorum consensus, & ipsa accidentium natura persuadet? ergone superbia sit, captivato in fidei obsequium intellectu, credere, ejusmodi accidentia in Sacerrimo Altari divina tantum dextera virtute absque ullius substantiae fulcro conservari? sed respondeant ipsi Adversarij, si Vacuum non repugnat, cur Mercurius non eò usq; subsidit, donec superficiei alterius argenti vivi in vase contenti, perfecte correspondeat? cur aëre per apertam in vitro rimulam ingrediente, Mercurius illicò ad nativam densitatem redactus vel vitro adhaeret, vel guttatim decedit? cur tandem, vase aura pervio, equali se planitie ubivis explicare conspicitur? torta equidem sunt & verè omni soliditate vacua adversa partis responsa. Nobis verò in promptu ratio est, quia scilicet resoluti per motum Mercurij spiritus in altiore velut vitri speculâ Vacuo, capitali natura inimico, se opponunt; mox violenter rarefacti spatium, quod possunt, maximum, tanquam continuandis corporibus, & lucis vel soni accidentibus sustentandis necessarium occupant; reliquus verò Mercurius ad majorem profunditatem non descendit, ne spiritus ulterioris raritatis impatientes vacuitatem relinquere cogantur. Denique postquam cum sibilo retrogressus aër suppetias attulit, omnia sibi & natura restituntur.

Interea Otto Gericke Patritius, ac Consul Reipublicae Magdeburgensis aliud vas vitreum ovalis figura, ac in formam Recipientis chymici elaboratum antliae aëre duobus, ut appellant, ventilibus instructa connectit, ac deinde pistillum transversò ligno vel ferro armatum ejusdem antliae orificio cum embolo immittens, partes omnes adversus minimæ aëre illapsus communit; quibus alijsq; celeberrimæ suæ machinae circumstantijs ita compositis, duorum validorum hominum vel etiam plurium operâ, exporrectis ad vires sociandas funibus, pistillum trahendo ac iterum retrudendo diu agit, & sic omnem aërem è vase vitreo per apertum unum ventile paulatim se excludere quasi juratus testis affirmat; altero ventili probè conclusò novi aëris ingressum prohibente. Sed istis in Vacuo astuantibus operarijs frigidam tantisper in alio subiecto vase affundamus. Tali itaq; vase si Recipiens, de quo hactenus locuti sumus, immergatur, aqua
more

more fontis exsiliens spumas aget, & totum vitrum à tortrice machina exinanitum mira aviditate inundans, violentis sibi in altum saltibus coarctum toti Universo Vacui horrorem liquido designabit. Præterea ultimis conatibus in ejusmodi evacuatione exertis, idem tamen Recipiens paucioris aque, quàm ante institutam operationem capax; deinde pistillum initio faciliter, in progressu difficilius ac tandem non amplius mobile, imò postquam summa vi eductum fuit, sponte relabens; perceptus etiam in illo imaginario Vacuo suspensa nola sonitus & candicantes bullæ per aquam eluctantes aërem prius adfuisse docent, qui extremos rarefactionis terminos perpeffus, natura vacuum refugienti succurrebat.

Decreveram in theatrum quoque adducere Robertum Boyle novis experimentis pneumaticis Vacuo capiendo insidiantem. Sed eundem in libro hac de re Oxonia typis mandato, Anno M. DC. LXI. sponte fatentem deprehendi, quòd in suo pariter Recipiente liquores tepidi ebullierint, lux subita instar fulgurum illuxerit, inditus papilio primum ultrò citròque volitavit, aëre verò magis extracto languens deciderit, retento tamen alarum tremulo motu; quòd oscillatorium & acus chalybea intus suspensa, illud solitis vibrationibus agitatum, hac ab externo magnete commota sit, & embolus liber dimissus etiam hic cum impetu resilierit; quòd demum immissa flaccida vesica ita intumuerit, ac si calamo inflata fuisset. Unde ex Anglicanis æquè ac Magdeburgicis experimentis adverti quidem miram utrobique aëris ac aliorum corporum se dilatandi vim, non verò Vacuum, cui invulnerabilis quasi totius Universi plenitudo obsistit; imò ad quod avertendum provida natura illam ipsam virtutem elasticam ordinavit.

Alias adhuc Scenas ad exhibendum Vacuum frustra adornatas referre præmitto; lapides scilicet prægrandes pyrii pulveris vehementiâ simul discissos; columnas perfectè planas basibus suis rectè impositas, vasa hermetico sigillo conclusa ab æstuarijs ad frigidissimum aërem translata; nam etiam hæc, aliæque innumera implantatum rebus omnibus Vacui metum stabiliunt. Lapidès siquidem partibus magis spissis constantes, ut pretiosissimus adamas, obstinatè divisioni resistunt, ne ob aëris vel spirituum intra poros defectum Vacui umbra subrepat; columna etiam nullo lacertorum robore perpendiculariter attolli, & à basibus suis, quasi tenacissimo glutine affixæ separari possunt, nisi intercedens tenerrimum quasi aëris velum omnem vacuitatis occasionem prævertat; vasa denique si exinanire perrexerint

Adversarij, ex frustis inde à reluctante naturâ capiti suo impactis haud inane laboris sui lucrum reportabunt. Atque ut ipso Boylei exemplo ad confirmandam Peripati Sententiam utamur, murem, evacuato ejusmodi Recipienti tantisper injiciamus. Hoc itaque animalculum initio ad vasis summitatem raptim procurret, mox propter aëris ad respirandum inhabilis subtilitatem vertigine ac convulsionibus, ut videbitur, exanime concidet. At aërem saltem tenuissimum in vase Vacuum parturiente prius superfuisse demonstrabit idem post novi aëris haustum renascens ridiculus mus, nisi hunc fortè Adversarij colendo, si ita jubent, sannis prodigio resuscitaverint. Quare pro solenni in discursibus nostris Peripateticis consuetudine cum Aristotele concludimus l. 4. phys. c. 9. Ex his igitur, quæ dicta sunt, patet, neque separatim, aut simpliciter, aut in raro, neque potentiâ Vacuum esse.

Quid jam de illis dicam, qui magnum Vacuum repugnare, transmittentes, parva tamen vacuola pro modestiâ suâ concedunt? tales profectò equis illis viginti quatuor animandis assistere vellem, quos supra laudatus Otto Gericke duobus hemispharijs cupreis post aërem extractum à se mutuo divellendis, sed conatu irritò, alligavit. Adeò quodcunque Vacuum vel sperâsse, vel tentâsse phantasma hætenus fuit, naturâ ad artem & machinas omnes eludendas gravibus saltum, vel in medio aëre suspendium, frigidis raritatem, levibus lapsum, liquidis soliditatem, contrarijs inducias, avulsionem unitis corporibus imperante & horum violentas affectiones perpetiente, modò siderum influxus à brevissimâ, id est, rectâ lineâ non deflectat, nec in Universo hiatus accadat, qui, licet in se digitali minor, maxima profectò sphaera cujuscunque activitatis impedimenta poneret, ac intentionales, ut vocamus, species in cursu suo tam necessario retardaret.

Neque fundamento nititur vel aura ætherea pracedente jam capite in fabulosam Æoliam amandata, vel heteroclitica illa aëris pressio, quam Adversarij omnium illorum effectuum originem statuunt, quoscunque nos à metu Vacui proficisci sustinemus. Hoc si inficiari pergant vitrorum Evacuatores, sub aqua nonnihil nagent, ut aëris, more cunei, ex undis sursum tendentis levitatem agnoscant, vel exiguum utris secum immersi pondus cum gravi ejusdem utris extra aquam pondere comparantes addiscant, elementa, quod Peripatus docet, in loco sibi connaturali nullum impulsu

*pulsam versus centrum imprimere, sed Vacui potius metum activas
ubique vires ita intendere, ut remoto uni successurum alterum
corpus, velut annulus annulo connexus, attrahatur; nisi fortè
hoc solo titulo ejusmodi metum negare aliquis voluerit, quòd Na-
tura tot adversus Vacuum praesidijs circumvallata ab hoc
hoste sit securissima.*



AUREI
PHILOSOPHIÆ
SÆCULI

PARS II.

SEU
PHÆNOMENA PHILOSOPHICA
AD

JOSEPHUM I.
REGEM
HUNGARIÆ.

AUREI
PHILOSOPHIE
SECUNDI

P. A. R. S. II.
2^{ED}
PHENOMENA PHILOSOPHICA
2^{ED}


JOSEPHUM
REGEM
HUNGARIE



Wolff inv. et del.

Johann Georg Wolfgang sculpsit Augustae







R E X INVICTISSIME




Iaceat geminos elapsi Sæculi annos in
memoriam revocare, candidissimo
notatos calculo, quia Regio Tuo
Nomine inscriptos. Prior te in
lucem Sole serenior em edidit, ante
quem horridâ sanè tempestate invo-
lutum gemuit Hungariæ Regnum cùm Deo ac Cæ-
sari Rebelles contra Regem suum legitimum, atque
in orthodoxæ Religionis stragem auxilia Turcarum
evocarent: subinde Hungariam superiorem barbarè
deprædati, inducias paciscerentur, ut sub hac amici-
tiæ larva securiùs arma pararent, qui seditionis paulò
antè Ducem elegerant. Sed ecce! dum laboranti
Hungariæ Te cœlum submisit, fulmen simul ter fau-
stum bonis, malis ter formidabile illuxit, quale Mi-
thridatis regias cunas in lætum felicitatis ac victoria-
rum omen circumdedisse fertur, vel quale Clear-
chus Principem suum filium, ad summa omnia na-
tum, vocavit. In Te ipso nempe fulmen illud prodijt,
quod avita Pannoniæ Regum Pietas, per gentilitiam
eo-

eorum Crucem exhibita, tandem à propitijs Superis impetravit.

Interea verò sociatæ inter se Othomanica Potentia, aperta Perduellio, clandestina Perfidia, ac non unius capitis monstrum, profana Religio eò usque jam elucari contenderant, ut conspicuum supra monticulorum apices Hungariæ ac Salutis humanæ Insigne conjuratis viribus propè revellerent; cùm Fulmen, quod solo hætenus splendore hostium oculos perstrinxerat, nunc uno impetu omnes eorundem fûrias protrivit. Auspicatissimo siquidem anno, quo in Hungariæ Regem jure successionis hæreditario coronatus es, exercituum Tuorum Duces, velut derivata à Te Belli Fulmina, hîc suscitatas Rebellionis faces, quæ Cæsarea per urbes Præsidia absumere, condicta nece, destinaverat, represserunt; ibi armatam vim cum fœderatis Lunæ Turcicæ cornibus ad Dravilittora justo prælio eliserunt; Te cladem illam vindicante, qua olim Solymanus II. Regnum Hungariæ eodem loco afflixerat.

Imò nec Constantinopolis à tanto Fulmine immunis tunc perstitit, ubi ipse Imperator Mahometes IV. è solio in carcerem detrusus, & interempta suprema Aulæ Capita cineres Tibi Gloriosissimos, quia ex Hostium Antesignanis collectos, subministrarunt, quibus in Hungariæ monticulis, velut imperturbabilis Olympi vertice, Anni Nativitatis ac Coronationis Tuæ exarati, de omnibus temporum injurijs triumphabunt. Ego verò Fulmen hoc non imitabile celebri illo encomio verè prosequor, quod Poëta Ænæ clypeo, ex fulminis etiam materia composito, affinxit, dum eum, quamvis **VNVM OMNIA CONTRA TELA**, seu hostium vires satîs, supérque esse cecinit. Æneid. 8.



PARTIS II.

CAPUT PRIMUM.

DISSERTATIO ACADEMICA


DE

PHÆNOMENIS TERRESTRIBVS.



Uas senior Plinius eruditæ suæ curiositatis pœnas dedisse fertur, dum Vesuvii lustrans penetralia, flammis inde erumpentibus in pabulum cessit; has Philosophia in lucrum suum aureo, quod hætenus celebravimus, Sæculo convertit. Feliciore enim consilio profundas terræ fauces ingenii acumine perfodiens, ad ipsum usque Universi centrum exstatico mentis itinere descendit, ubi hydrophylacia, seu aquarum receptacula, catadupas, seu præcipites fluviorum lapsus, canales pyragogos ab igne in telluris meditullio flagrante, instar ramorum ubique exportectos; concameratos montium fornices vaporibus nativum frigus restituentes; verbo, totam secretioris naturæ œconomiam patefecit, ac publicæ humani generis disputationi utilissimè exposuit.

Ansam huic & materiam maximè præbuerunt Phænomena illa, à quibus non portum, specus, tecta, muros vel fugam defendere sapiens Cordubensis dixit, nimirum Terremotus, quorum primus A. M. DC. I. exortus, universos propemodum Europæ incolas ad contemplanda novi Sæculi auspicia suscitavit; successu verò temporis omnes Orbis partes afflixit; ut Africam in monte Pico, qui navibus, Phari instar, altitudine sua præluet. Americam in Chilensi regno, quod cum montibus, quos Andes vocant, penè ad vastitatem redactum est. Asiam in Chinarum imperio, cum ibi jam cusa essent decreta ad orthodoxam fidem florentissimis illius Provinciis penitus exterminandam. Verùm ultimos laborantis naturæ conatus excussisse visus est Siculæ terræ motus A. M. DC. XCIII. Die undecimâ Januarij, cujus tristissimum quasi nuntium attulit procellosus ille ventus, quem eo ipso tempore, Romam è mari Mediterraneo delatum, prælia designare tunc dixeram, sed quæ postea ex litteris Panormo scriptis intellexi ab elementis omnibus in Sicilia exitium gesta fuisse. Neque calamitosa hæc, aliæque, quæ adhuc recensebimus Phænomena, aureum nostrum Sæculum deturpant. Sicut enim Homerus ex Ennij fœcibus aurum collegit, ita novit Philosophia quascunque temporum injurias in suam felicitatem, id est, eruditionis ac scientiæ incrementum commutare.



DISCVRSVS PERIPATETICVS
Quo
VERA PHILOSOPHI
DE TERRÆ MOTIBUS
DOCTRINA ERUITUR.



*M*agnos ingeniorum quoque motus excitârunt crebriores Telluris elapso sæculo concussiones, Junioribus Philosophis plerisque earum causam statuentibus diversam omnino, ut ipsi existimârunt, ab antiquâ Peripateticâ, tanquam temporum suorum Phanomenis dissentaneâ, ac Ethnicorum somniis vel erroribus inveteratis annumerandâ; aliis verò, ut cum Stagyrîtâ, principe suo quàm mitissimè negotium transfigerent, docentibus quidem, aliquando terram commoveri modo ab Aristotele assignato, sapiùs tamen alio penitus contremiscere. Nos tramite novo incessuri, doctrinam à Philosopho l. 2. meteorol. c. 8. traditam simul experientiis omnibus congruere, ac quacunque Moderni de terra motibus eruditè congesserunt, velut in nucleo continere defendemus.

Inprimis igitur certum videtur solos spiritus seu actuosas, ut vocant, exhalationes potentiam illam esse, quæ terram ponderibus suis in universi medio librata, & agitationi nativa sua gravitate fortissimè repugnantem vel impresso pulsu instar arteria intumescens erigit, vel tremore sicut navim in fluctibus titubantem versus latera inclinât. Nam si celeri ac robusto motore ad hunc effectum opus est, quale ens celeritate spiritibus antecellit, qui subtili sua substantia per ingens spatium excurrentes omnia pervadunt, ac obstantia cursui suo obstacula intime penetrando, ista facile perfringunt, aut secum transvecta in moliminis consortium trahunt? neque valida illis virtus deficit, etenim, ut Aristoteles citato capite loquitur, ignis ubi spiritui admiscetur, fit flamma, unde spiritum ad terram conquassandam proximè dispositum in suis proprietatibus ab igne, elementorum efficacissimo, haud abluere, & quod inde resultat, ignea etiam & propè fulminea activitate pollere convincitur.

At unde tanta spirituum seu validarum hujusmodi exhalationum multitudo enascitur? Audiamus iterum Peripati magistrum de terrâ

eodem loco sic discurrentem: cum ipsa tam fervore solis, quam suo incalescit, multum spiritus intra extraque gignitur. En! copiosissimi spiritus à duplici origine, scilicet extra terram à solis, intra vero ab ipsius terræ fervore proficiscuntur, quæ cum naturâ suâ frigidam elementum sit, ut idem Aristoteles l. 2. de generatione c. 3. & 4. affirmat, alienum illa calorem sinu suo foveat, oportet, quem verò, cum Philosophus à calore solis distinguat, subterranei tantum ignes possunt inducere. Tertia spirituum scaturigo ab ipsis oceani fluctibus spongiosa terra insinuatâ derivatur, nam, teste iterum Philosopho ex mari veniunt exhalationes, quas, quæ è terra oriuntur comitari assolent, Item: regiones illæ vehementissimè quatuntur, ubi mare terram fistulis veluti quibusdam subire videtur. Aqua siquidem marina, talis præcipue & aliorum mineralium, quin ipsis simul ventis omnigenis corpusculorum foetibus turgidi vehiculum, impetuosos spiritus toti terræ communicat, partim quia universum mare per Istmos, freta vel alias canales & occultos meatus commercio mutuo sociatur, partim ob omnium fluviorum fontes ex Oceano per caca montium viscera ruentes, à quibus proinde tumultuosi halitus terræ utero, velut equo Troiano, intrusi, luctum ubique, pavorem & plurimam mortis imaginem machinantur.

Supereſt, ut modum etiam, quo memorati spiritus Terram solent concutere, duce rursus Aristotele, explanemus. Geminum ille suggerit in capite sapius allegato, nempe spiritus collisi incensionem, discerpto prius in exigua frustra aëre, vel si ad locum unum omnes contendant exhalationes; quemadmodum juxta eundem Aristotelem. Sol facere potest, ut quæ suspensæ in aëre sunt, in unum fluant. Jam quæro, an hæc aëris ac spirituum collisio aliud designet, quàm illos vehementi motu attenuatos vel in terram ab occurrente obice repulsos viam sibi vi facere? exhalationum verò adunatio quid aliud denotat, nisi quòd terra fervor seu ignis intra globi terraquei intestina gliscens subterranea tempestatis incentor sit, sicuti fervor solis tonitruum, ac fulminum in aëre faber existit? atque ut omne dubium de Aristotelis mente eximatur, duas, quibus ille terræ motus explicat, similitudines paucis expendamus. Quantas, ait Philosophus, spiritus vires habeat, non solum ex hisce, quæ in aëre fiunt, contemplari oportet, verum etiam ex hisce, quæ in corporibus animantium fieri solent. Nam & convulsiones & distensiones nervorum spiritus motiones sunt; quasi nimirum dicere vellet Philosophorum Princeps, geminam tragici motus radicem esse,

unam

DE TERRÆ MOTIBUS.

5

unam extraneam, seu ex superiore telluris regione descendentem; sicut aëre in turbines ac vortices à procellosis halitibus convertitur; alteram internam seu nascentem è spiritibus intra mineras ac metallorum venas generatis; sicut animalia obstructis viscerum ac naturalium vasorum ductibus à calore vitali spiritus interceptos agitante concutiuntur, toto corpore tremunt, & si parva licet magnis componere, vel sua febris terræ motum referunt, vel hunc ipsius terræ, quasi vasti animalis, febrim esse denuntiant.

Placet modò jacta hæcenus de Terræ motu Peripatetica fundamenta Phanomenis illis applicare, quæ Recentiores ad Aristotelis castra hîc deferenda permoverunt. Atque ut exemplo res melius elucescat, unum solummodò terræ motum, cuius paulò antè in Dissertatione Academica memini, consideremus, renovatis quidem lacrymis exarandum, nostræ tamen doctrinæ optatum fulcimentum. Sicilia igitur, quam ipse jam olim Aristoteles inter Insulas terræ motibus obnoxias numeravit, cum enarrato superius tempore quateretur, supra Æthnam, montem ignivomum, caliginosa se nubes explicare, claram adhuc diem funesta nocte extinguens; mox etiam Æthna flammarum globos, ignitos lapides, liquefacti sulphuris ac bituminis torrentes evomere, Oceanus ultra modum & improvise tumesceri, terra præsertim circa Catanam, (ah! urbem tam nobilitate, quàm hac Strage memorandam) plus duobus palmis in altum sustolli; formidabilis sonus, velut armamentarii integri simul exonerati, inter ferarum ululatum, hominum gemitus, undarum fremitum, ædificiorum corruentium fragorem, increbrescere; verbo, spiritus vel ab adrito mari in subjectam Siciliæ terram inveci, vel intra terræ viscera generati & ab Æthnæo Vulcano ad summam raritatem vel ipsam ignis naturam evei caperunt causa ac materia terræ motuum à nobis ex Aristotele constitutis fidem tot testibus conciliare, quot venusta urbes, muris vestita oppida, arces & castella, pagique incolis frequentissimi eversi sunt, inciso miseris ruderibus diverbio: Hîc tuere. Imò quod extremis malis quasi catastrophæ addere videbatur, pulvis pyrius fuit, quem in Augusta, celebris Siciliæ Emporij, castello fulmen è tempestuoso tunc etiam cœlo delapsum repentino incendio corripuit, dubiâ inter infernum ibi ex Æthna spirantem, & hîc per aëra jactatum Siciliâ, an potius terræ sub pedibus agitata, vel aëris saxa, lateres & ipsa fundamenta procul evibrantis motum patiatur. Adeo spiritus partim

6 DISCURSUS DE TERRÆ MOTIBUS.

ab incenso artificiali pulvere, partim ab ignivomi montis cratere exhalati documenta dabant, simili se origine conceptos & natos fuisse.

Denique ut Philosophi vestigiis ubique insistamus, sicut ille causam terræ motuum, quicumque tuuc acciderant, ab eorundem signis, loco, tempore, duratione & effectibus comprobat, ita agite Recentiores, qui supra Aristotelem vos in hac parte sapere existimatis; vestre etiam atatis celebriores terræ motus ad parisi ratiocinii tribunal sistite; & videbitis profecto rubicundam nubeculam, quam nautæ oculum bovis appellant, missiles Vesuvii ignes, & cineream pluviam ante Neapolis tremorem; incendium nec aquis Oceani restinctum ad Insulam Sancti Michaëlis; lacum sulphureum absorpto monte Pico effusum; Tagum & Eridanum subterraneo tumultu effervescentem; mineras ac medicas aquas recens detectas; colles ob internorum spirituum lucem contra se quasi arietantes; denique, ne reliquorum eventuum iliadem nuce condere laborem, contagiosos halitus ex fatiscentis terræ hiatus, velut apertâ Pandoræ pyxide efflatos totidem argumenta esse pro inconcussâ Aristotelis de terræ motibus doctrinâ.

Quæ omnia prævio jam in montibus fragore asseruit, qui A. M. DC. LXX. Tyrolin concussit terræ motus, secularis propè dicendus, cum ibidem similis ante nonaginta novem annos præcesserit. Ille igitur sede sua penes salinarios montes, ubi summas vires exeruisse tunc creditus fuit, collocatâ; aliam ortus sui causam habere non potuit, quàm spiritus illos, quos ut ad stragem Insularum adiacens mare, ita hic pluvia per tres hebdomadas continuatæ telluri invexerunt, tum ipsi montes intra proprium sinum, tanquam feracem, combustibilis materiæ officinam, à tot retrò annis generârunt. Hi itaque spiritus, Athesianis etiam ventis illo anno nondum evolutis, ob circumfistens pluviarum frigus per antiperistasin, ut in scholis loquimur, succensi; aut ab igne subterraneo, tot in Tyrolî mineralium artifice, rarefacti; vel denique per modum Typhonis, qui in aperto etiam aère tanto impetu furit, concitati, Halam & Oenipontum horrifice concusserunt circa Novilunii tempus, Lunâ nempe sopitos in montium cavernis spiritus ad fovendam sociorum quasi halituum seditionem simul excitante; quin ut mare etiam influxisse appareret, Adriaticum eodem tempore tumefactum est; Danubius verò prope Ratisbonam, ut aqua intra lebetem igni superimposita ebullit; adeo ut hic unicus terræ motus totam Aristotelis de ejusmodi Phanomenis doctrinam velut in compendium redegissem mihi videatur.



CAPUT SECUNDUM.
DISSERTATIO ACADEMICA
DE
PHÆNOMENIS
AQVEIS.



Quod Sæculo decimo sexto non modicam gloriam comparavit, origo fluminis Nili fuit. Hanc enim cum veterum plurimi irritò labore indagassent, eandem sciri posse omnino negarunt. Unde Rex Æthiopix, litteris A. M. D. XXI. ad Emmanuelem Lusitanix regem datis, Orbi propalavit, quod oculatus testis in altissimo Æthiopix monte deprehenderat; scilicet ibi occultatum hætenus Nili caput esse, qui initio quidem versus nascentem Solem profluat, deinde à Meridie in Septentrionem flectatur, usque dum maximis septem ostiis mari se commisceat. At gloriosius redditum est à Philosophiâ Sæculum decimum septimum, quo ipsorum fontium, imò Maris etiam origo detecta est. Ex eo siquidem, quòd Lusitani constructo in Chymici alembici formam instrumento, falsam maris aquam in dulcem distillaverint; Philosophiâ docuit, vastissima montium juga similes machinas esse, intra quas Natura Artis magistra derivatam per occulta terræ con-

clavia maris aquam excoquat, à faldedine liberet, ac per canales, Romanis Aquæductibus magis admirandos humano generi è perennaturis fontibus propinet. Neque hîc contenta naturalium rerum scrutatrix Sapientia, navigationes ultra Thulen institutas & infelicibus licèt naufragiis coërcitas, ad sui tamen Peripaterici Cursûs prosperitatem assumpsit; dum exinde perpetuam aquarum à polo Arctico ad Antarcticum pericyclosin atque secretam marium omnium negotiationem hausit. Postea Sublimes aquas in heteroclitis liquorum & insectorum pluviis speculata est, quales A. M. DC. XLVI. Bruxellis sanguinem, quatuor annis citiùs Laburgi sulphur, & ante duodecim annos in Wallachia & Podoliâ locustas deiecerunt. Subinde aquas medias in marium ac fluviorum eluvionibus perpendit, quali ante duo lustra emergens ex disrupto monte novus fluvius Calabriam inundavit; mare verò A. M. DC. XXXIV. plus quàm quindecim hominum millia post insolita in brutis & arboribus prognostica in Septentrionali Frisiâ absorbuit. Tandem aquas Subterraneas penetrans, quales è Carolinis, Teplisensibus, Badenæ & Aquisgrani thermis, ut reliquas propè infinitas taceam, hac adhuc tempestate medicatas quasi potiones effundunt; cum Plinio post lustratum ita aqueæ naturæ regnum liquidissimè confessa est, *in nulla parte majora esse miracula.*

DISCURSVS PERIPATETICVS DE DIFFICILLIMO MARIS ÆSTU.

AD Scientiæ Philosophicę metas nos consistere dicent, qui ipsum Aristotelem de penetrandâ æstûs marini causâ desperantem aquis se submersisse referunt, vel magis ad invidiam sapientissimo Viro conslandam fabulantur. Non dissimili fato controversiæ huic succubuisse videntur posterî, qui, ut Oceanus in tam variorum nominum maria disfluit, ita illi in diversissimas sententias divisi, quarum solus Ricciolius octodecim enumerat, denique cum hoc summi ingenii & paris industriæ Astronomo fatentur; nihil hâtenus excogitatum esse, quod implicatos istius materiæ nodos vel dissolveret vel eluderet. Imò alii longiùs progressi, quæstionem hanc omni fundo carentem, alii humanæ curiositatis tumultum, nonnullus etiam mortaliū scientiæ in accessam, ut parem vel imparem Stellarum numerum affirmare non dubitârunt. Nos in hoc tam arduo negotio saltem aliquid pro viribus tentare juvat; unde æstum maris non ab uno, sed triplici simul principio dimanare contendemus, quorum unumquodque seorsim spectatum meritò insufficientiæ arguitur; omnia tamen invicem stipulata causam opinionis nostræ componunt reciproci marium motûs haud difficulter effectricem.

A Sole initium trabamus, qui dum ab Ortû Occasum versus communi omnium siderum motu abripitur, aquam in tenues vapores caloris vi conversam elevat, ac æmulo quasi sui cursûs motu protrudit; interim verò, disturbato aquarum æquilibrio, unda à tergo posita aliis debiscentibus succurrunt, ut spherica globi terræque figura quasi ad libellam exacta ubivis sibi constet; atq; ita solem primum motorem maris constituunt. Ubi supervacaneum esset, hoc in liquidum elementum Solis dominium pluribus corroborare, utpote quod secundus navium in Orientales plagas transitus, subsolani venti continuo flamine aspirantes; mare circa Æquatorem maximè Principis Planetæ, ibi potentiùs incumbentis motui obsequiosum, explorata denique ferri candentis experientia comprobât; hoc enim, ut Kircherus l. 3. Mundi subterr. sect. 1. c. 2. refert, si forcipe apprehensum supra vasis aquâ pleni superficiem diducatur motum maris à sole in occidentem concitati parvâ, sed perspicuâ in imagine efformat,

Jam ipsum Mare subeamus, quod è profundo sinu, tanquam inexhausto penuario, salis præcipue spiritus subministrat, quorum beneficio altera proprii sui fluxûs ac refluxûs causa statui promeretur. Talium quippe spirituum feracissimum esse Oceanum demonstrant venti ex maris fundo sæpius erumpentes, ac improvise turbine naves adorti; tum ipsa salsedo omnes aquoris partes instar fermenti, contra stagnantis aquæ putredinem apprimè necessarii, pervadens; tum æstus in fundo præsertim ferociens, quod è fabulo excusso, eiectis lapillis, & conchylibus strepitum collisione mutuâ edentibus colligitur; quin ipsum mare alterni sui ad littora accessûs & recessûs vestigia non paucis fontibus imprimit, eundem parentis sui Oceani motum imitantibus, quales Gadibus in Hispania, Burdigalæ in Galliâ, Altenbeki in Germaniâ, Ninkiangi in Suchuranâ China Provinciâ & alibi celebrantur.

Extrema ordine, sed virtute prima accedit Luna, quæ ut ipsa totius cœli versus Occasum cursui contrariis in Ortum passibus, ita loquendo, constanter resistit, sic cursum quoque Oceani diurna solis periodo conformem refranat, ac velut immensum fluvium interposito obice retardatum initio inflat; mox expergefactis qui mare salsum, ac tot piscium fertile efficiunt, spiritibus, undas à tumultuosis his inquilinis turgidas ad littora propellit, quæ tamen postea, elanguescente Lunarium radiorum impetu, ad præfixos sibi limites revertuntur. Neque Lunam tantis effectibus imparem suspicari fas est, quamvis illa in culmine Meridiani circuli consistat, qui è diametro oppositus est mari eodem tempore æstuanti. Dominatur enim specificæ suæ qualitatis viribus in humida omnia propinquissimus nobis Planeta, quod tam numerosi testes ac tabulæ probant, quot multiformes Ephemerides præcepta seminandi, plantandi, cadendi ligna, pharmacis & phlebotomiâ utendi juxta Lunæ cum sole præsertim aspectus definiunt. Quis igitur corporum omnium humidissimum mare iisdem impressionibus obnoxium esse inficietur, nisi & ipse Lunaticus sit, ac ita in cerebro suo, quod negat, invitatus experiatur?

Commodissimam huic instituto similitudinem à morborum vindice scientia mutuemur. Sanguis, quem per arterias è corde diffundi, ac per venas ad cor redire infrâ Discursu I. Part III. ostendimus, regularem maris motum ab ortu in occasum referre videtur; mali,

maligna verò seu peccans, ut à Medicis appellatur, materia, quæ secundum subtiliores sui partes simul cum sanguine per totum corpus circumvolvitur, falsos maris spiritus exhibet. Denique Luna in criticis auctarum febrium diebus obstructionem, deliria, phrenesin & alia symptomata excitans, quasi æstum sanguinis inducit, atque hoc modo maritimi fluxûs & refluxûs causam e tribus partialibus principiis coalescentem representat.

Quid insperatum magis, quòd ipse Philosophus huic nostræ Sententiæ subscribat, quem Scholæ passim perhibent, in omnibus quatuor Meteorologicis libris ne mentionem quidem tantæ difficultatis inseruisse, & ideò sibi velut gratulantur, quòd prætensâ Ducis sui ignorantia propriam veriùs possint obtegere. Mibi verosimilius apparet, quòd Tractatus de Maris æstu ultimus fuerit labor, cujus Aristoteles voluerit eruditos posteros hæredes scribere; subinde tamen fatis manum de tabulâ tollere jubentibus, contrariæ sectæ Philosophi vel Stagyrîtæ doctrinam invidio dente rodentes vel illius fortunam lividis oculis intuiti occasionem nacti sunt, populare illud figmentum disseminandi, Peripatetica scilicet Philosophiæ Principem mari se capiendum obtulisse, quod ingenio suo capere non valuerat. Neque difficile accideret, hanc meam persuasionem congruis argumentis suffulcire, nisi Plutarchus l. 3. de Placitis Philosophorum c. 17. apertè in hunc modum pronuntiasset: Aristoteles & Heraclitus à sole æstum maris fieri aiunt, qui plerosque spiritus moveat, secumque circumducatur. An aliquid in sententiâ nostrâ favorem accommodatiùs reperiri potuisset? cum hoc pacto Aristoteles prima duo æstûs marini principia nobiscum statuatur, solem videlicet, & mare, turbulentorum spirituum quasi promumcondum. Multò minùs Aristoteles Lunæ oblitus videri debet, tanquam cui in ampliores maximè ac crebriores effectus communem semper cum sole influxum attribuit, ut patet luculentè ex l. 4. de generat. animal. c. 10. ubi Philosophus in hac pulcherrima verba prorumpit: Luna autem principium est propter Solis Societatem, receptumque lucis; fit enim quasi alter sol minor.

Iam ad objectiones repellendas nos accingamus, quæ Philosophos non paucos ita perculerunt, ut ipsas corporis expertes Intelligentias ad æquoris fluctus, velut in Comædiâ retrò scenam agitandos, ob causarum sublunarium defectum evocaverint. Dux tamen difficiliores re-

12 DISCURSUS DE MARIS ÆSTU.

sponsum à nobis jure exigunt; quarum prima ab irregulari in diversis maribus aestu deprompta tam expeditè in nostrâ sententiâ dissolvitur, ut hanc laceffendo firmius stabiliat, & ad facilem omnium captum illustret. Cum enim Soli, Oceano & Lunæ fluxum ac refluxû simul deberi statuamus; modò varietas illa procedere poterit à sole directius in Oceanum agente, vel plures vapores elevante; jam à mari, quod, ut diversâ salsedine imbuitur, ita & spiritus aestui opportunos diffari mensurâ suffundit; modò à Lunâ, quando hæc ab interiectis Insulis, marium currentibus, ostiis, vorticibus, Promontoriis, littorum curvitate, motu reflexionis, exonerantibus se in oceanum fluviiis, sylvis & montibus submarinis, fundi majore vel minore declivitate, attenuatorum denique spirituum diversimodâ temperie & quantitate impeditur, ne equalia ubique possit æstus incrementa ac decrementa producere. Similitudinem rursus Medicina suppeditat, quæ ab eadem contagiosâ lue aliter homines illos affici advertit, in quibus atra vel flavâ bilis; aliter, in quibus pblegma vel sanguis predominatur; aliter etiam in hac, quàm illa regione degentes, pro diverso climatis genio; cum nempe variatâ qualibet causâ totalis parte effectum quoque, vicissitudini subiacere contingat.

Levioris adhuc ponderis est, quod alii opponunt, argumentum; scilicet ex nostrâ sententiâ consequi, majores quoque lacus, ut Lemannum, Acronium, Benacum; similiter flumina, quæ ab ortu in occasum currunt, aestuare debere, tanquam intra spheram Lunaris activitatis constituta, nec undequâque insulsa, sed diversa sortis spiritibus referta. Equidem si hæc ita se haberent, proferant rationem adversarii, cur memorati lacus & flumina salsedinem maris non æquè imbibant? vel cum hoc non eveniat, fateantur & ipsi, materiam aestui concitando ac consonis Luna motibus imprimendis idoneam deficere; quemadmodum idem Luminare, ut paritati è Medicina ducta insistam, characterem humida suæ nature non cuicunque subiecto, sed pituitosis presertim morbis, teste Galeno, imprimit. Caterum aliis referendis abstineo, quæ contra nos intorquentur ab authoribus illis, qui aliena destruere malunt, quàm propria firmare, presertim cum reliquæ ab iisdem interpositæ æstus marini remora vel præoccupata jam sint, vel propriâ suâ corruant debilitare.



CAPUT TERTIUM.

DISSERTATIO ACADEMICA

DE

PHÆNOMENIS
AEREIS.



Vix ullum aliud elementum est, cujus proprie-
 tatibus vel observandis vel excolendis Philoso-
 phia in aurei sui Sæculi decursu se totam ita
 impendit, ac Aër, proprium divulgandæ illo-
 rum temporum gloriæ instrumentum. In-
 primis enim Elastica vis liquoris illius spirabilis, è quo vitam tra-
 himus, in tam apertum veritatis meridiem protracta est, ut dum
 alii pyrium pulverem mutum reddiderunt, jam aër nimix com-
 pressionis impatiens è pnevmaticis sclopetis glandes plumbeas eia-
 culari doctus sit. Ventorum etiam natura, quæ tot difficultatum
 procellis antiquos sapientes involvit, modò rudiori etiam captui
 ita pervia facta est, ut Æoliæ Camera variâ arte constructæ ven-
 tos quocunque ex Orbis cardine, florum insuper & herbarum fra-
 grantiâ odorosos accersant. Nihil addo de Aërometris, molen-
 dinis & horologiis pnevmaticis, de Æoli-pilis, instrumentis mu-
 sicis ab aurâ, velut chorago extemporaneo impulsis, de puro æ-
 there ex usualis aëris miscellâ eliciendo, & quæ alia fuerunt Phi-

lophiæ theorico - Empyricæ tentamina. Sed an aliquid mirabilius excogitari potest , quàm levissimi halitûs efficacia , quam Statica sub Philosophiæ auspiciis ostendit attollere posse gravissima pondera , annosas arbores radicitus evellere , ingentes moles in omne latus promovere , si multiplicatâ vectis virtute alata rota manubrio ejusmodi machinæ applicetur. Imò ut aërem è contagiosæ etiam luis dedecore liberaret Philosophia ; docere , Kircheri Authore , incæpit , Pestem non ab auræ corruptione , sed invisibilium bestiolarum malignitate generari , quæ per aërem , velut commune Emporium , ubi sidera influxibus , terra verò effluviis perpetua exercent commercia , volitantes , corporum poris se insinuant , aut per ipsam respirationem virulenta suæ speciei semina invehunt , ut Pestis elapsum Sæculum præsertim sexies aggressa non uno documento probavit , & maximè in ultimâ Neapolis contagione , ubi , teste citato secretioris Philosophiæ Antislite , crabro fortè allapsus homini è fenestra prospicienti infixus aculeo tumorem primò , mox pestilens virus per vulnerati intestina sensim se dilatans , ac denique expleto biduo necem intulit.

Supereissent aërea ostenta hîc pariter , quemadmodum in terræ & aquæ elementis præstitimus , afferenda , ut militares tumultus A. M. DC. XXXII. illa ipsa die in nubibus excitati , quâ Gustavus Adolphus Sueciæ Rex in prælio ad Luzam occubuit ; vel aërea belli simulacra , quæ postremo bello Turcico in Hungariâ prælusisse , paulò post enarrabimus ; aut alterum illud aëreum Schema A. M. DC. LXXI. in Austriâ conspectum , quando Carolus II. piæ memoriæ Hispaniarum Monarcha in orbem editus est ;

nem-

nempe Iris intra suam cavitatem tres strictos acinaces complectens, quibus alius major ensis supra convexitatem iridis positus emineat, unâ simul ejusdem cælestis arcûs extremitate in occiduam primæ magnitudinis Stellam, alterâ verò in occumbentem Lunam desinente. Verum quis de ejusmodi Phœnomenis Peripati sensus sit, sequens Discursus diiudicabit.

DISCURSVS PERIPATETICVS
 QUO
 NATURÆ ET ARTIS
 OSTENTA PRÆSTYGIIS
 SECERNUNTUR.



Uemadmodum insatiabilis elapso sæculo humanum genus cupiditas incessit Panurgi, seu mirabilia quæque non tam scientis quàm operantis nomen quibuscunque temporis, ingenii & industriæ sumptibus mercandi, ita tunc maxime necessarium fuit, & adhuc hodie oportet, tum illos errorem dedocere, qui Naturæ secretiorem vim vel Magiam illam, quæ supremus est creatæ scientiæ apex & consummata Disciplinarum perfectio, cum miraculis vel ex adverso cum nigris artibus temerè confundunt; tum magis eorum licentiam refrænare, qui plausum novitate rerum initio captantes, sensim naturæ & artis limites prætergressi, futes superstitiones hauriunt, usque dum ipsam nefandæ Magiæ pestem execrando pacto attrahant; ubi in tanta materiæ amplitudine Aristotelis ferme methodum in libro de mirabilibus Auscultationibus imitantes, summatim omnia persequemur.

Atque ut de aëreis potissimum ostentis, tanquam huic Capiti propriis, discurremus, tres præcipui occurrunt modi, quibus natura spectrorum simulacra exhibere consuevit. Primus est, dum tenaciores halitus accendens lemorum & Umbrarum species diversâ fatui ignis ima-

gine effingit ; vel si Roberto Fluddo fides est , qui tale Phenomenon se diu insecutum ac denique assecutum scripsit , dum viscosam ac ranarum spermati similem materiam instar speculi efformans , eodem Lunæ vel aliorum siderum lucem reflectit , quam tamen experientiam Jo. Bapt. du Hamel l. 1. de Meteor. c. 4. in dubium revocat , utpote Mosaicæ Philosophiæ , titulo superba & re inanis , ut ille loquitur , inventum. Talia proinde phasmata tam parum naturæ fines transcendunt , ac fatuus esset , qui splendentia noctu ligna putrida , cicindelas , vel insidentes antennis Tyndarides præstigiis annumeraret. Quantumvis enim hisce noctilucis motus desit , ac mimica propè gesticulatio , quæ ignes fatui secum quasi consertis manibus luctantur vel saltant , viatores sibi occurrentes fugiunt , sed fugientibus instant ; eosque è montibus vel in flumina præcipitant : hi ipsi tamen effectus à causis tantum naturalibus possunt emergere , ac modò rori nocturno fatuum ignem pondere suo deprimenti , modò flammæ ob inditam sibi levitatem resilienti , jam auræ ab adverso aut fugitivo corpore impulsæ , nunc contiguo aëri prope montium abrupta in vorticem terminato , vel ab aqua decurrentis furvii abrepto jure attribuuntur. Non dissimilia ludentis naturæ spectacula à medio quoque , per quod objecti imago ad oculos traiecitur , sæpe procedunt. Atque ut rursus , quod plurimum calamis teritur & omittam , pensile scilicet ad freti Mamertini littora theatrum , ubi æstivi solis virtute attenuati vapores circumfusa ædificia , pastorum vigiliæ , pabulantes armentorum & ovium greges tam vivæ gestuum , colorum ac luminis ex umbrâ crescentis scenographiâ representant , ut nitidissimus etiam penicillus ad absolutæ perspectivæ leges nihil posset adijcere ; illud tantum examino , quod memini me quondam in eruditis Ephemeridibus P. Martini Szentivany legisse ; nimirum circa anni M. DC. LXXX. finem , & octogessimi primi exordium , cum insignis Cometa in cælo fulgeret , apparuisse per Hungariam confligentes in æthere exercitus , perceptos tormentorum strepitus , tubarum ac tympanorum clangores , nec non arces & castella in aëre spectabilia consideri & expugnari visa. Jam , quamvis haud agrè concesserim , potuisse illud ostentum à Deo exercituum dirigi ad significandum imminens Turcicum bellum , vel potius mortalium fiduciam illuc erigendam , unde conjurati veniunt ad justa classica Divi ; sicut scripturæ interpretes ad caput 5. libri 2. Macchabæorum commentantur ; ac tempore belli Suecici accidisse ob relati superius phasmatis à loco prælii distantiam

credendum est ; nihilominus assero, omnia illa militum, armorum, & arcium in Atmosphaera Hungaria simulacra solis natura viribus exhiberi potuisse. Persuadet hoc imprimis ipsa vaporum & exhalationum terrestrium commixtio, quæ jam in nubes draconibus, balanis, navibus vel palatiis figurâ similes cogitur ; jam tonitruum ac fulminum fragore varium terribilis soni genus excitat ; jam lucis cum umbrâ temperie pulcherrimos Auroræ & Iridis colores repræsentat. Sed magis ad illam conjecturam moveor geminâ à me observatâ illius temporis circumstantiâ. Tunc enim in Hungaria, armistitio, ut vocaverant, inter Imperatorem & malè contentos iterum disrupto, utrinque Regnum variis cladibus affligebatur ; Turcæ pariter ad inferendum Christianis bellum in omnibus, quibus tunc adhuc potiebantur, Hungariæ munimentis summâ vi & industriâ se accingebant. Quid igitur obstat, quin pronuntiemus, crebriores inimicarum partium velitationes, vel umbratiles Turcarum ad Martem se animantium pugnas ac obsidionum præludia in nubibus, quasi polygonis speculis reflexa, justî prælii vel alterius bellicæ expeditionis effigiem præsetulisse ? Altera circumstantia est, quòd eodem tempore ingens Cometa, de quo sequenti capite differemus, ad corruptionem disponi cæperit, utpote in Februario anni octogesi primi paulò antè commemorati disparsens. Verisimile igitur est, Cometæ tunc dissipati influxum diversas aëri qualitates impressisse, ac singulariter aqueas, fingendis aëreis spectaculis aptissimas, quas etiam multa per Europam eluviones brevè subsequutæ plus quàm satîs confirmârunt ; sicut proportionalem ob causam regiones maxime Septentrionales ejusmodi ostentis inclarescere, frequentes novellæ nuntiant. Tertia denique naturalium, si ita loqui placet, spectrorum classis ab ipso sensitivo organo resultat ; in cujus effati argumentum sola, quam Aristoteles refert, historia sufficiat l. 3. meteor. c. 4. ubi Philosophus Antipherontem Oretanum, dum ambulabat, sui ipsius imaginem adversâ semper fronte præcedentem, conspexisse testatur : Quoniam visio ad ipsum reflectebatur ; nam præ languore adeò imbecilla, tenuisque modis omnibus erat, ut & propinquus aër speculi vicem illi, perinde, ut qui remotus, densusque esset, præstaret, & ab illa repellî nequiret ; Quod ipsum de infecto sensûs interni organo omnes Medicorum libri catenatâ experientiarum serie confirmant, ac præcipuè in Lycanthropis, qui in lupos se transisse putant, vel in Hydrophobis, qui rabidum canem, à quo morsi sunt, in omni aquâ se contueri opinantur ;

quin ipse P. Gaspar Schottus in libro de mirabilibus Spectrorum fatetur, se postquam multa de terrificâ illa materiâ legisset ac meditatus esset, somnum proximâ nocte traxisse, umbratilis Spectri simulacro identidem interpolatum.

Jam ad Artem naturæ amulam, imò subinde victricem, utpote quæ in Zeuxidis Pictoris uvâ naturam ipsam fefellit, transeamus; ubi pariter timendum, ne artificialium prodigiorum Spectatores Cœnobiarcham illum imitentur, qui præstigias subveritus est, dum Janellus Turrianus ad Carolum V. Imperatorem in Hieronymiano secessu oblectandum, armatas hominum & equorum icunculas induxit in mensam, alias tympana pulsantes, tubis alias occinentes, ac nonnullas ex eis feroculas infestis se hastulis incurfantes vel ligneos passerculos emisit cubiculo volantes, revolantésque, Authore P. Famiano Strada Decad. 1. l. 1. Quò nunc oculos & calamus maxime convertam? immensus enim se mihi campus aperit, in quo Magia naturalis primum suæ peritiæ documentum præbet in opticis radiis diverso speculorum apparatu percussis. Hic siquidem plana specula tali situ collocata sunt, ut intuens neque se, nec objecta visui exposita, sed præclaro specimine loco circuli quadratum ad Geometriæ tot impensis illud hætenus aucupatæ invidiam conspicitur; ibi alia specula effatas vultuum rugas extenuant, ac rubri aliquid immissum habentia, senes in viridæ frontis juvenes transmutant. Modò uestoria specula ignes fulgurum instar eiaculantur, nunc specilla oculis adhibita quot homines, tot Argos vel Briareos multiplicatis luminibus aut brachiis exhibent, modò demum, alia cylindrico-convexa specula rerum imagines in aëre pendulas effingunt, ut Augustam Aquilam cum egrediente pariter è speculo hinc gladio & illinc sceptro, quandam volatûs speciem expansis alis præferentem. Interea ultimarum naturæ virium exploratrix Magia activas quoque virtutes passivis applicat, & modò præliantem arenularum exercitum, modò arietes cornibus se impetentes aut fictum erinaceum spicula sua evibrantem & rursus retrahentem virtute magneticâ representat; deinde ope hydrargyri ova & assatos pullos in mensâ, panem in furno saltantem, & baleces supra craticulâ se in latus alterum vertentes producit; mox liquorum & herbarû ministerio talpas è cavernis elicit, pisces ad aquæ superficiem natantes in unum cogit, scorpiones fugat, ranas coaxare prohibet, serpentes & ignitos carbones impunè versat, aves nudis manibus capit, & postquam adstantes omnes in totidem Ethiopes mutavit, inversâ

scenâ

Scenâ corvos dealbare videtur ; nunc occultis machinis & instrumentis calvariam , ut famosum Alberti Magni caput , loquentem , serpentes æneos , ut Boëthii , sibilantes , pluvias etiam sanguineas ac nives ad naturâ imitationem productas efficit ; nunc vano oculorum ludibrio res visas repentè disparentes , annulos per angustum foramen trajectos , cubicula subitaneo incendio correpta , vel serpentibus obsita , præsentium vultus in lapideas imagines vel asinina capita conversos simulat ; jam denique solâ agilitatis & assuetudinis præstantiâ exercet pedibus bastiludia , inter strictos pugiones , & novaculas innoxie se versat , ex quibus ipsis quinque fontibus , optidorum scilicet radiorum , applicata occultioris virtutis , subtilium machinarum , illusionis & agilitatis , omnes illæ metamorphoses & Artium experimentalium mysteria oriuntur , quæ callidum aliàs spectatorem tenent suspensum ac sollicitum , ne fortè Alastoris cornua , cauda , vel ungues alicubi promicent ; cum tamen ejusmodi effectus legitima sint fertilissima naturæ , arte obstetricante , propago ; quarum etiam natales hîc facile describerem , nisi persuasum mihi esset , eruditos Lectores hac & plura adhuc magis abdita ex minimo vestigio venaturos.

Restat demum altera Magia , quæ , ut Sophistæ ac tyranni nomen , in sinistram partem degeneravit , sic pariter illa artem modò spuriam & illicitam sonat , tanquam ex fœdere cum Dei ac humani generis hostibus inito nascentem. Sicut itaque nigri Genii magos & striges certis characteribus ac notis signant , nempe manûs bufonia , leporini pedis vel atrî catelli ; non minùs opera à tacito vel expresso cum orcinis larvis pacto proficiscentia vanam observantiam , ludibrium oculorum , vel clandestinam causæ naturalis præsentiam summâ localis motûs pernicitate inductam comites habent aut pedissequas ; ut nostrorum quoque temporum experientia plus quàm satis comprobavit. Hinc , ut aliquod ubique paradigma afferam , ad primi generis præstigias pertinent superstitiosa illa à Paracelso descripta specula , in quorum primo Caco-Dædali fures (utique inter hos etiam seipsos ?) intuentibus ostendunt , in altero sermones & consilia de suis clientibus habita , intertio verò arcana omnia litteris concredita ; quò etiam reducuntur radices sub patibulo humana specie crescentes , schedula vanissimo illo Anani sapta vel Abracadabra inscripta , gladii ad fulminis lapidem affricati , Rex apum deglutitus contra equulei cruciatus , & cuculi cantus reliquis adhuc vitæ annis numero respondens. Alterius præstigiarum classis

exempla sunt incantatus ille circulus, quem Theſſalici Scholæ magiſtri horridis notis, velut Cerberi ſpumis, circumcirca conſcribunt, ac deinde Stygii ſui Vertumni ope, quem pyxidi aut vitro incluſum geſtant, nunc aureas Neronis domos & melle fluentes rivos, nunc Circaæ monſtra ac ſidera cœlo deducta in magicam ſcenam protrahunt; tum epiſtolæ ad abſentes in Lunę diſco exarata, induta felium & picarum omnia penetrantium formæ, Gygis annulus vel appenſum veſfertilionis cor inviſibilem ſui baiulum reddentes, loricata ſuppoſitiſ precibus indumenta, pentaphylli herba quinario foliorum numero fortunati luſus conciliatrix, reperta equini pedis ſolea à tactu fulminis præſervans, ac infamia illa Joannis Fausti naſutam vitem convivantibus apponentis, vel Sedechia onuſtos fœno currus unâ cum equis & auriga abſorbentis, aut Zytonis alterum Magum peregrè advectum ad uſque calceos devorantis ſceleſta ludibria. Tertiū demum ordinis veneficia conſtituunt hirci veredarii, clitellariæ furcæ, ſcoparum volatus, Laponum venales venti, vel qualibus Mahometani ſacrificuli Piratam Hiſpanum Anno M. DC. LXI. Algerium retraxere; fulmina in bivium pertranſeuntes excuſſa, ſegetes excantata, & ab agro in agrum tranſpoſita, Morochazarii triceps ſtatua valide percuffa abſentes hoſtium Duces vulnerans, Ægypti Magorū colubri & rana, ſed præſertim hominum in multiformem brutorum ſpeciem tranſitus, ubi vel ipſe infernalis hiſtrio formatum ex aëre & vaporibus belluæ corpus aſſumit, vel tranſlato in aliud latuſ homine feram ſubſtituit, ut Magus creduli vulgi iudicio in ſpecie diverſum animal converſus videatur, aut veram belluæ pellem humanis membris ſcitè adaptans, commotis ſimul humoribus & ignoto veneno corpori furtivè per minutiffimas partes inſtillato ferinum animum inducit.

Atque ex hoc Peripatetico Diſcurſu inprimis patet, quod Plinius loquitur: multa ſunt naturæ miracula in ipſa naturæ Majestate penitus abdita. Deinde ſimiliter elucet ſupenda artium præſtantia, quæ maximorum effectuum fructus ex ignobili trunco doctâ velut inſtigatione producant. At quando nec natura, nec artis miniſterium intercedit, cū altiore toto Univerſo manum per orci mancipia operari ſuſpicio eſſe non poſſit; ibi enim verò ſeipſam prodit impie ſagacium bara, & rogo illuſtrari digna nigrorum Artiſicum officina.



CAPUT QUARTUM.
DISSERTATIO ACADEMICA
DE
PHÆNOMENIS
IGNEIS.




Uæ sapientis Philosophi de rudi plebe antiqua ,
sed justissima querela est , quòd scilicet impe-
ratorum vultus nunquam in coelo sint , nisi
cùm illos timor erigit ; neque Sol aut Luna
spectatorem habeant , nisi laborantes ; eadem
Sæculo decimo septimo summa fuit Philosophiæ commendatio ,
utpote quæ ex emphaticis cœlorum impressionibus intimè per-
pensis , scientiarum omnium patrimonia sic adauxit , ut ipsa or-
thodoxa Religio in Pekinensem Aulam , & regnantis ibidem Tar-
tarici Monarchæ gratiam aliâ viâ & ope restituta non sit , quàm
totius Sinarum Imperii oculos in Eclipsin intentos ad dexterrimam
Europæ Philosophiæ in observationibus peritiam convertendo ,
ut elucet ex litteris A. M. DC. LXIX. V. Martij Malacá scriptis.

Ad Cometas , inter ignea Phænomena principes , transeamus ,
quos hætenus mortales judicârunt , velut immania Cete per li-
quidum ætherem natantia , vel torvos irati Numinis oculos , ac

mille calamitatum feciales ; Philosophia verò nihil aliud esse demonstravit, quàm fiderum & maximè Planetarum se quasi purgantium apostemata, si Cometæ supra Lunam moveantur; quando autem intra terræ Atmosphæram continentur, à reliquis elementorum exhalationibus à Sole illustratis vel aliter accensis, sola diuturnitate ac motu differre. Sed laudem omnem dignitate superat, quòd Philosophia ex Cometa A. M. DC. LII. circa constellationem Leporis conspecto alium similem coeli partem post triginta annos edendum jam tunc felici eventu prædixerit, ob redeuntem scilicet Planetarum in uno Signo congressum.

Excederem hîc præfixos Dissertationis Academicæ terminos, si relictis etiam novendecim insignioribus, qui aureo nostro Philosophiæ sæculo fulserunt, unius tantum ante viginti duos annos observati Phænomena pluribus vellem discutere; ut nempe capitis seu nuclei magnitudinem Saturno non minorem, sÿrma ad LXIII. graduum longitudinem protensum; iter à Spicâ Virginis per Delphinum, Pegasum, Andromedam, & Piscem Borealem ad Triangulum usque excurrans. Insuper ejusdem caudati fide-
ris figuram in ovi gallinacæi cortice à naturâ Romæ depictam; Venerem, instar sanguineæ stellæ, Tyrnaviæ vilam; tres simul Soles & Lunam duobus circulis constrictam Viennæ comparentes; quapropter & missos facio stupendos fulminum effectus; ut Agricolam ante septendecim annos à vertice ad calcem pelle, non tamen vitâ exutum, de quo Ephemerides Germanicæ superius jam allegatæ ad idem tempus differunt; vel Ceraunios lapides

partim intra nubium velut metallicas fornaces, partim in descensu per frigidam aëris regionem concretos; item tres Irides & sex Parelia duobus à dicti Sæculi initio lustris Ingolstadii simul conspecta; coronam in Ringavia ante sedecim annos circa solem notatam, quæ radiis suis in ambitu ubique intersectis rotum cœlum in unicam quasi stellam, sole locò centri in medio existente, commutavit. Sola me vocat, quâ Academicum meum sermonem identidem interpolari audio, sollicita interrogatio, quid significârint, aut quæ subsequantium malorum Stigmata miseris mortalibus ignita hæc Phænomena inusserint? Huic itaque quæstioni lubens respondeo, ut manifestum omnibus reddatur, Philosophiam in aureo suo Sæculo novisse etiam à mali formidine, quæ ipso sæpe malo nocentior est, Orbem liberare.



DISCVRSVS PERIPATETICVS

Quo

ASTROLOGIÆ PRO-
SCRIPTIO RENOVA-
TUR.



Aud equidem miror, quod Cornelius Tacitus scribit, Astrologorum nationem, tanquam potentibus infidam, & sperantibus fallacem, suâ etate vetitam fuisse semper, & tamen semper retentam. Quis enim nescit, Romanos illos rerum dominos ita errores suos amâsse, ut hos etiam thure colerent? At nostrâ etiam tempestate Astrologia personatos patronos esse, qui eam calamo & lingua damnant, res est stupore, an dicam? vituperio dignior, mirante ipso orbe, se totum evasisse Astrologum; quid enim aliud loquuntur Lunares Ephemerides etiam à viris sapientia laudem affectantibus tam sollicitè consultæ, cum de pacis bellique vicissitudine, de Regnorum ac Rerumpublicarum statu augurandum? quid aliud sonat festivum illud: euge, bellè, si fortè Astrologaster aliquis nativitatem aut periculum Principis, pralii vel obsidionis prosperum eventum, Magnatis captivitatem aut morbum fatalem apposite vaticinatus esse videtur? quid, inquam, hac cura & plausus designant, nisi mortales per divinatricem de futuris scientiam adhuc divinitatis cupidinem fovere à primi parentis lapsu sibi hereditariam, atque ideò necesse esse, repullulans malum armis ad genuinam Philosophia cotem affrictis ideniidem refecare?

Verùm, ut ordine progrediamur, sermo hîc nobis non est de Astrologiâ, quæ naturalis dicitur, & ex siderum, imprimis verò Planetarum cursu ac mutuis aspectibus verosimili coniecturâ prædicit vel imminentes Sphæræ elementaris affectiones, vel alias hinc naturali serie secuturas vicissitudines; talis quippe disciplina tum rationi congruit, quâ astrorum influxus universalibus rerum sublunarium causis annumeramus, tum experientia consonat, quam Medicina, Agricultura & Ars navigatoria ex ejusmodi Astrologia legibus quotidie colligunt, atque ipsa corporis humani organa ac temperamentum pro variâ Climatum habi-

tudi-

DISCURSUS DE ASTROLOGIA. 25

tudine aliter & aliter disposita palpabiliter demonstrant. Aliam ego vanam, fallacem, noxiam Astrologiam cum Scripturae Sacrae & Conciliorum oraculis reiicio, ex omnibus Philosophiae Athenais ac Cathedris expello, atque vel ad anilem colum, vel, quod superi avertant, ad incantatos circulos amando, quae, regale supremi Moderatoris jus ausa involare, actiones ab hominum arbitrio dependentes infallibili scientiâ praesagire se jactat tam in Deum sacrilega, cui singularem de humanae libertatis electione notitiam adimit, quam in omne hominum genus impia, cui libera voluntatis prerogativam, ac proinde praemiorum etiam merita nefarie suffuratur.

Agite igitur nugivenduli Conjectores, ac thema caeleste, tanquam totius vestrae Artis lubricum fundamentum, è quatuor Horoscopum erigendi modis componite; si tamen inter vos aut vobiscum ipsis in caelestium Domorum fabricâ & significatione consentire poteritis. Quare cum momento conceptionis, in quo nihilominus Astra futuro partui juxta vos jam dominari incipiunt, non attento, solum nativitatis momentum pro vestri vaticinii epochâ statuatis, an Astrolabiis & automatis tantum fidei tribuitis, ut ne minuto quidem à vitali infantis limine vos aberrare credatis? qualis tamen error si intercedat, prò! quantis non milliaribus Horizonte superior evadet stella, quam vos Ascendentem, ac velut recens in lucem editi characteristicam nuncupatis? quasi verò sidus in Meridiano tunc positum directiore suo radio tenellum corpusculum debilius attingeret. Sed transmittamus sanè, vos ad unguem nativitatis tempus signasse, atque octavam, id est, mortis domum in ortu infallibiliter constituisse, bene dirum omen! actum exclamatis de Porphyrogeniti salute, & sextam fortuna domum jam pratergressam buccinatis; interim, credo, cum Domus Religionis ac Regni in Horoscopo subsequantur, idem Princeps ad tiaras & coronas aspirabit, postquam scilicet immaturo fato jam concessit? deinde si Sagittarii Signum in eadem Domo commoratum esset, dictus Princeps vestra Sententiâ Sagum adornaret, cum tamen in Caelo à fabulosis ejusmodi Constellationum nominibus haud ita pridem purgato inversa, opinor, cum figurâ siderum virtus eidem togam destinaret; quae utraq, Stellarum in similes formas adunatio arbitraria omnino est, ac imaginationis potius, quam Firmamenti typo expressa, imò inani molimine sideribus, omnis vitae & animae expertibus, intellectum humano etiam celsiorem tribuens, dum illa omnium infantum nomina, ad quos solos, prateritis reliquis, vastissimi sui globi influxus quasi contrahere; ac mensium numerum, post quem in eosdem dominium novo, ut Astrologi loquuntur,

G

Plane-

Planetarum Decano cum fascibus tradere deberent; item nefastos dies, qui cum emendato iterum Calendario nullibi coincidunt, aliâque quasi in tabulas redacta ad amussim præcognoscerent. Forrò si Remus iterum ac Romulus aliquis gemello partu simul effusi fuissent, an invariata Afrorum facies unius violentum à fraternis manibus interitum, alterius verò imperium terris, animos Olympo æquandos stellatis quasi litteris ac scintillantibus verbis promulgaret? aut vicissim si fratres illos distincto tempore pronatos una hora naufragio mergeret, vel hostium ferro in decretoriâ aice bauriret, obliquum ambo in Horoscopo Aquarium, vel Martem retrogradum sortiri debuissent? unde, Superùm fidem! unde hac ariolandi fiducia processit, nisi à malè feriatâ gentilitate, quæ Astris vitam & altaria tribuens, prima Planetaria artis semina projecit. Nam si ista in solido Philosophiæ fundo succrevissent, tunc naturale aliquod vinculum proferri posset, quo successuri effectus cum simili Siderum figurâ, tanquam fructus cum sua radice, vel saltem prodromo flore connecterentur.

At solennia sunt Philosophiæ sanioris effata, Astra non imperare, sed disponere, inclinare, non cogere, atque insipientem se fateri, qui illis dominari recuset; cœlos lucem & calorem corporibus impertiri, quorum aliqua, ut ceram, liquefaciunt; alia verò, ut lutum, pro conditione subiecti indurant; sed animas spiriuales influxu suo materiali directè non afficere; humanam libertatem, exquisito licèt bamo illectam, sponte se à quocunque creato bono avertere, ac vilius sæpe digniori præhabere; demum parentes potiùs Stellas illas esse, ex quarum temperamento de proli indole judicandum sit; causas etiam particulares, ut nationis genium, patrii soli bonitatem, primævi lactis conditionem, victûs ac medicamentorum vim, sodalium consuetudinem, artium disciplinam, sexûs & ætatis mores, educationem, domestica exempla, divina simul Providentiæ intra naturæ limites ordinem, domos esse duodecim, quas Astrologicis longè potentiores æstimare conveniat, & quarum humana voluntas inquilina quidem sit, in omnem tamen partem se flectere vel aliò migrare permissa, non tot quasi carceribus hærens captiva.

Neque prætendant Astrologi, Stellarum concursus signa esse à Deo instituta, quasi futurorum præcones linguas, aut arcani consilii indices facies. Ut enim suo cœlestium corporum Aruspices exemplo confundam; nunquid Iris post universale Diluvium in clementiâ divini tesseram præfixa totam significandi vim à revelato nobis propitii Numinis beneplacito de-

desumpsit, quamvis generatio & causa cœlestis Arcus, nempe radiorum Solis in roscidâ nube reverberatio, diluvium diu præcesserit, imò, præsertim manè spectabilis, pluvia potius propinquitatem, quàm finem portenderit? ubi similem revelationem cribro hauserunt Astrologi? quam profectò si Deus voluisset mortalibus indulgere, illa gravissimo Ecclesiæ Patrum ac Conciliorum Senatui insinuata esset, non illustrium Dei operum infamatoribus, qui sicut Poëta fabulas suas ac falsorum Numinum infames fastos cœlo inscripserunt, ita hæc Cingarorum appendix secuturas cedes, furta, proditones & alia nefanda scelera ipso veri Numinis digito, ac innocentì stellarum luce in expanso cœlorum libro descripta se legere perhibet, ut adeò opus sit, vel Authorem naturæ, ad sartam, rectamque hominum libertatem conservandam execrabilì blasphemiam fallibilem fateri, aut homines pulcherrimo siderum conspectu ad desperationem adigere, utpote in quibus impendentes sibi laqueos, enses, venenum, præcoces sandapilas, aut alia fortunarum, honoris ac vitæ pericula non deletibili charactere prænotata intueri cogantur, solo malorum metu abundè infelices.

Frustra etiam fallaces hi Divinatores immemorabilem nescio cuius experientiæ præscriptionem allegant, quâ artem suam inertissimam in usurpatâ hætenus Philosophici fori possessione student conservare. Vos enim ipsos compello, vaga Chaldaeorum soboles; vel aphorismos Ptolomæi colitis, cuius concentrici Veneris, Mercurii & Martis circuli è cœlo dudum expuncti sunt? At ab illis Siderum in Firmamento situs vehementer jam abludit, utpote quæ singulis interim annis iuxta Tyconis caculum per secunda, ut Astronomi vocant, quinquaginta & unum progressa jam sunt. Vel novos fortè prognosticandi canones ipsimet cudi-
stis? At tales à veterum observationum veritate tam parùm roboris possunt recipere, ac hesternæ diei lux hodiernæ noctis tenebras illustrare. Caterùm quo experimento didicistis, Cometas fatali suo syrmate mortes semper Regum ac Principum invexisse, cum lucentibus intra annum M. DC. XVIII. quinque Cometis, ut Ricciolius refert, & uno quidem oppidò mirabili, tanquam sub initium Lunæ inferiore, postea verò supra Lunam elato; Ferdinandus II. gloriosæ memoriæ, Hungarico, & anno sequente Augusto diademate redimitus sit, quasi verò non pari jure tunc dici potuisset, stellas illas recens exortas coronam successuro Romani Imperii Capiti texuisse? deinde cur pro regulâ, utiq; dudum deperditâ, statuunt Astrologi, Solis deliquia miseros Regno-

rum ad peregrina Sceptra transitus ominari , cùm profunda Eclipsis A. M. DC. LIV. ipsum Stellarum de die conspectum , Hevelio teste , admittens Solem alteri Luminari quasi cedere significaverit , qui proprii nominis characteribus se duplo Sole micaturum sponderet , LEOPOLDUS scilicet Magnus , quem sequentibus statim annis in Hungaria ac Bohemia Regem , & mox in Romanorum Imperatorem inauguratum , Orbis uterque gavisus est , tanquam sic in Austriacæ Familiae auspiciatissimo dominio , ut immobili centro , consolidatus ? quâ fronte iidem Pseudo-Philosophi asserunt , concursum omnium Planetarum in eodem Signo tragica mundo fœdera nuntiare , cùm A. M. DC. LXXXII. Planeta omnes unâ cum capite Draconis in mensibus Julio & Augusto igneum Leonis Signum occupantes faustissimi fœderis Symbola fuerint , quod altero post anno inter Summum Pontificem , Augustissimum Cæsarem , Polonos , ac Venetos sancitum est ? atque ut Lunarium quoque Eclipsium meminerim ; quæ non funesta Germaniæ minabantur Planetarum Consiliarii A. M. DC. XX. cùm Luna , Keplero teste , ita omnibus exuta coloribus , ac visui telescopiis etiam armato subduceretur , ut ne vestigium quidem ejus usquam appareret , quamvis proxima cernerentur Fixæ quartæ ac quintæ magnitudinis , & tamen eodem anno Pragensæ prælium in Monte Albo ab Imperatore Ferdinando II. feliciter gestum , uberrimâ victoriâ Moraviam reduxit , Hungariam recuperavit , res Austriacas composuit , Germaniam stabilivit , Religionem denique Catholicam in multis locis pristinæ restituit libertati.

Quæ licet ita sint , ultrò tamen concedo , Astrologos aliquando veritatem ex longo rerum usu prædicere , ut ille credo , qui Rudolpho I. in aulâ Friderici Imperatoris adhuc versanti Romanorum Imperii Sceptrum præagivit , ex agnitâ nempe Habsburgensis Comitû indole summa quaque omnibus promittente ; sæpius tamen videntur solo casu eventura attingere , sicut cacam etiam jaculatorem ad metam collimare , fortuito potest accidere ; præsertim cùm vasa illa natio ancipiti verborum sensu , ut Paganorum tripodes , contraria simul annuntient , aut credulos Auditores , quibus exempli gratiâ victorias ac triumphos ex astris defluos promittunt , ad istos proprio Marte , non benefico Planetæ Martialis influxu comparandos animent. Sed licet reliqua deessent , vel ex solo hoc capite Astrologiæ Judiciariæ vanitas innotesceret , quod illius cultores imminentium sibi met discriminum conscii non sint , nisi fortè Bononiensem illum Coclitem fati sui augurem dixeris , tanquam ab

eo occisum, quem ille homicidam fore edixerat. Hac occasione dissimulare non possum, quid mihi Astrologicum nuper Calendarium sorte aperienti obtigerit. Legi enim ibidem, in maximâ Mercurii ad terram propinquitate à fraudibus (an fortè Astrologicis?) cavendum esse. Tum Marte in Librâ Stationario bonam causam triumphaturam. Nugæ! Belli æquitas, consiliorum prudentia, fœderum opportunitas, virium robur, ac hostium conditio de armorum fortunâ decernunt. Postea legi gradus puteales, igneas triplicitates, carpenta, Almugæa, signa reptilia, ac alias voces multò adhuc magis terribiles, quàm Draconis caput & caudam, de quibus Astrologi, ut veri Draconis partibus disserunt, cum tamen aliud non sint, quàm communia Solis & Lunę Orbitalium Segmenta. Tandem in Catalogum Signorum incidens, quibus Urbes ac Provinciae non naturâ, sed Astrologorum arbitrato subiectę sunt; inveni Romam antiquam Libræ, novam verò Leoni subiaccere. Quis ineptias has ampliùs sustineat, aut alia de futuris Promotionibus, Legatorum adventu, itinere latronibus obfesso, Principum nuptiis, mercatorum lucro, patefactis insidiis vanissima presagia vel aure, vel oculis dignetur?

Quapropter coronidem toti Peripatetico huic Discursui imponat Sapientum Phenix Aristoteles, qui disciplinas omnes capacissimâ mente complexus Astrologicam tamen prognosin, licet ab aliis suę ætatis Philosophis exercitam, ut Tullius l. 2. de divinat. memorat, omnino neglexit in omnibus de animalium Historiâ & generatione, Mundo ac Cœlo, Problematum & Meteorologicis libris. Quod tamen maximè notandum est, fulsit A. M. DC. LXVIII. Cometa capite destitutus, qualis olim ipsius Aristotelis tempore, ut refert du Hamel, visus est eodem pariter loco ac motu conspicuus. Sed ubi Philosophus cum Astrologis examinat, cui regioni verticale sit, vel caudam obvertat Phenomenon illud nunquam impune spectatum? cujus Principis Horoscopus fatali tramite pertranseat acephalum sidus? in qua constellatione ortum sit, Provincias illi subiectas venenato effluvio infecturum? nihil horum Aristoteles commemorat, sed ex Cometis omnibus hoc imprimis prognosticum colligit l. 1. meteor. c. 7. cum crebri ac plures apparent, aridus admodum & flatuosus redditur annus. Cum verò rariores & magnitudine non perinde insigni conspiciuntur, haudquam ex æquo tale quidpiam fieri solet; ut adeò nec mihi verba ulterius consumere liceat in arte refutandâ, cujus nec meminisse voluit Magister ille, qui pro Sapientiæ suę Auditore numeravit omne humanum genus, pro cathedra Orbem universum.



CAPUT QUINTUM.
DISSERTATIO ACADEMICA
DE
PHÆNOMENIS
COELESTIBVS.



Ille Sæculi decimi septimi Euclides Christophorus Clavius, cùm ætate, meritisque gravissimus, ac Mathematicis præsertim disciplinis clarissimus A. M. D C. XII. sub vitæ suæ finem Tubum Opticum, qualem Parte I. Capite I. in Dissertatione nostra Academica descripsimus, recens tunc inventum nactus esset; varia in cœlo notavit, quæ cum antiquo Mundi Systemate minùs cohærentia emendaturus utique fuisset, nisi mors illustre scientiarum sidus, atque ob restitutum Romanum Calendarium, & duplici Apologiâ defensum, de Christianâ Republicâ optimè meritum extinxisset. Illo igitur tubo, quasi per hæreditatem ad se translato, usi posterius remotissima sidera oculis ac menti ita admoverunt, ut Astronomiæ cultores Geographicas ac Hydrographicas omnium marium, insularum, montium ac vallium in Luna sitorum tabulas tam accuratè expresserint, tanquam non in Lunæ concavo tantùm spatiiati, sed cœlestes plagas pantometris instrumentis dimensi fuissent.

De Sole quid addam, tersissimo quidem speculo, sed ut istud contactu manuum, orisve halitu offuscatur, ita nec Planetarum maximo nigræ vel cæruleæ maculæ defunt, quæ, ut nubes è nostro mari, ita illæ ex solari velut ignis liquefacti oceano tanta magnitudine exsurgunt, ut Blancanus unam terrâ majorem conspexerit. Accedunt umbræ, quasi fumum vel nebulam Soli aspergentes; tum faculæ, sicut ignei globi ex Vulcaniis montibus ejecti, reliquum Solare corpus splendore superantes; quæ spectacula, Germaniæ decus, Christophorus Scheinerus post bis mille observationes impigrè peractas Mundo primus exhibuit.

Nimis prolixus forem, si omnia Cœli Phænomena calamo vellem depingere, quæ eodem Sæculo Astronomia, pars Philosophiæ perspicacissima vidit, expendit, illustravit. Commemorent itaque alii Atmosphæras Planetarum, & ideò corruptibilem Astrorum naturam; Martis, infra coelum Solis, descensum & hinc liquiditatem cœlorum collectam esse. Describant cujusdem Martis jubas, & Umbonem Africâ non minorem; Medicæos Jovis Comites ac regales fascias; Saturni annulum & Satellites; Veneris phases, Lunarium æmulas, cum parte eximiè lucidâ; Mercurium à Gaslendo & Hevelio in medio Solis disco conspectum; novas denique Stellæ, unam nempe inter collum ac pectus Cygni, alteram verò in calcaneo dextro Serpentarii & tertiam propè cingulum Andromedæ apparentes; admirandum tamen magis, & ad Sæculi decimi septimi commendationem præclarius esse judico, quòd intra illius decursum plures Stellæ, ante

hac in Firmamento non conspicuæ, in aprium extractæ sint, quàm vetus Astronomia universim agnoverit, ut adeò videatur Deus, dum Patriarchæ Abrahamo ex numeratis Cœli sideribus futuram felicitatem prædixit, ad aureum nostrum Sæculum respexisse.

DISCVRSVS PERIPATETICVS

DE

MALE CONCILIATO
TYCHONIS ET COPERNICI
SYSTEMATE.

NE obliti videamur præcipui cœlestis Phenomeni, quod Copernici Affecle celebrato maximè à nobis Sæculo inter astra, velut octavum Planetam, collocârunt; opportuna modò occasio se offert, antiquissimam illam novitatem cum suscitatis Philolai & Aristarchi cineribus iterum, recondendi; ac Peripatetica panoplia apparatu, nullâ adhuc rubigine infecto, debellandi audacem illum Archimedem Copernicum, qui non dato etiam loco, ubi pedes extra terram figeret, hanc tamen ex universi centro revulsam per annum circulum rotare attentavit.

Quod antequam præstem, percipite heteroclitam sanè Tychonis & Copernici systemata conciliandi methodum, quâ primi subsellii Novatores, quasi receptui tantisper canentes, sponte fatentur, quòd systema quidem Tychonicum oraculis sacre Paginae meliùs congruat, Copernicanum, verò rationi sit magis consentaneum. O præposteros recrudescantis belli, non ineundæ pacis caduceatores! itâne verò, cùm ipsi Antagonistæ nostri prætendant, utrumq; dictorum systematum astronomicis juxtâ & Physicis phanomenis satisfacere, ac proinde à supremo Mundi Architecto utrumlibet, salvo hoc rerum ordine, eligi potuisse, iidem tamen negare præsumant, Solis motum & terræ quietem potiùs electam esse, quam irrefragabilis Scripturæ Auctoritas divinæ sapientiæ præplacuisse asseverat?

DISCURSUS DE MUNDI SYSTEMATE. 33

audiant igitur hic Israëliti exercitūs Ducem igneam quasi Solis quadrigam in medio cœli prodigiosâ voce sistentem, donec ulcisceretur se de inimicis suis. Jos. 10. ibi Regem Ezechiam ex umbrâ decem gradibus in horologio reversâ, vel Sole potiùs per spatium proportionale retrogrado, ut Babylonii meritò judicârunt, promissæ sanitatis omen capientem. 4. Reg. 20. Audiant Regium Vatem de sole, ut gigante, ad currendam viam egresso; de terrâ vicissim nunquam commovendâ, imò nec inclinandâ, utpote fundatâ supra stabilitatem suam, sæpiùs sacrâ suâ citharâ accinentem. Audiant insuper unanimem SS.orum Patrum ac Purpuratorum Ecclesiæ Principum sub Paulo V. & Urbano VIII. de Solis circuitu ac terræ quiete sententiam; atq; inde addiscant non tantùm intellectum, sed magis suum omnia innovandi pruritum orthodoxæ fidei obsequio consecrare.

Interea verò, dum Copernicani tantum Hypothesis suæ obicem amoliri contendunt, septemplici, ut putant, Aiæis clypeo contra Tychonicos præmuniti, ipsimet rursus alias terræ compedes iniiciunt. Divinas itaq; aiunt, litteras inolitæ hominum persuasioni aut veriùs ignorantia abblandiri vel connivere voluisse, sicut idem sacer Codex panomphæum Deo oculum, vocem cedros confringentem, ac invictum brachii robur; Angelis verò juvenilem vigorem & vultum appingit. Enimverò improvidi hic Adversarii profundum & immedicabile Systemati suo vulnus infligunt. Quid enim? tam difficilis captu sit Copernicani cerebri dicam, vel terræ vertigo, ut adorandæ Litteræ, quæ tam profunda & à sensuum confinibus longissimè dissita revelârunt mysteria, illâ prode sic reformident, ut etiam, sub retardati Solis specie, miraculum, quod solius est divinitatis sigillū, adhibeant ad erroris universalis firmamentum? porrò quæ ista est effrænæ Sacer-rimæ effata à genuino in alienum, propè dixissem, mendacem sensum detorquendi licentia, ubi nec veræ fidei dogmata, nec convincens ratio id faciendum docent, quarum tamen utraque Deum & Angelos substantias esse omnis corporeæ figuræ expertes desinit?

Inspida etiam est Copernicanorum de navigantibus similitudo, quibus nempe immotis, terræq; urbésq; recedere videntur. Nam si vela ventorum impulsu destituantur, siq; remorum impetus deficiat, illud quoque oculorū vel phantasia lubibrium evanescit; at consultis licet omnibus quinque à naturâ nostræ animæ attributis exploratoribus, quilibet sensus seorsim, & universi simul, non homines oriri & occidere, sed solē cum Astrorū choro in circulos circumvolvi constanter referunt; omnes explodunt, qui Solē deorsū, ac terrā sursū designāt; omnes deniq; æqualē agilitatē ac virtutis exercenda

orbitam experiuntur, in quamcungq; Orbis regionem se vertant, quod tamen fluidus air, inaequali magnetica virtute à terrâ abreptus, ut ipsi Adversarii tenent, necessario probiberet. Unde Tycho Brahe, Danicæ ac Mathematicæ gloria A. M. DC. I. de annuâ terræ periodo non diu ante suum obitum interrogatus, argumento etiam à sensibus petito respondit, illam à se approbari non posse, cum stante illâ Hypothesi, terra firmamenti stellis diverso suo ad easdem intra quatuor anni tempora accessu vel recessu parallaxes induceret contra omnium Astronomorum clamores & irrefragabilem experientiam; quod ipsum acutissimus Philosophus prænotavit l. 2. de cælo c. 14, ita loquens: Quod si sit, mutationes fieri fixarum stellarum, regressionesque necesse est. Hoc autem fieri non videtur, sed eadem eisdem in locis ipsius semper oriuntur atque occidunt stellæ.

Jam ad Achillem veniamus, qui bucusq; contra omnes Adversariorum insultus, ut Marpesia cautes, invictè perstitit; dissimulatis interim sexaginta arietibus, quibus Ricciolius Solem è Mundi centro ad Zodiacum denuò retroagere allaborat. Et quoniam Copernici discipulis similitudo navis arridet, etiam nos globum terraqueum vastissima cuidam Oneraria comparemus, in quâ montes ac turres totidem velut malos representent. Agedum igitur, ex illis lapidem aut aliud grave pondus ad angulos rectos deijciamus. En! cadit id perpendiculariter in subjectam argillam, nec obliquum huic foramen imprimit, quod & constans experientia demonstrat in globis ex immota navis malo in suppositum molle lutum deturbatis, tum manifestum faciunt sagitta in jaculatorem ex alto reorta, aut ferrea glandes, si rectâ lineâ ascendant, in bombarda os relapse; tum maximè natura genius à vanis ambagibus abhorrens ac brevissimam ubique viam eligens confirmat; ut ita jure Aristoteles asseruerit citato capite l. 2. de cælo: pondera quæ sursum jaciuntur, in idem rursus per rubricam feruntur, & si in infinitum vis illa proiciat. Neque igitur terram moveri, neque extra medium collocatam esse, per hæc dilucidum fit. Quare, ut navis exemplum promoveamus, dicant, amabo, Adversarii, si illa à concitato turbine, vel numerofo remige impellatur, quomodo deiectus antea globus recto ad mali pedem foramine incidet, qui duobus sibi contrariis motibus, venti scilicet & propria gravitatis agitur, navim præterea jam longius progressam in diverso situ reperit? sicut Copernicana etiam Philosophia docet, fulminis iter obliquum esse, quia vapores cum igne impliciti, innatâ sibi indole versus centrum urgent, ignei verò spiritus sursum evocant? an igitur in terra mo-

Et a Systemate defendi nihilominus poterit perpendicularis gravium lapsus, quem omnino quatuor impulsuum conflictus à recti tramite necessario seducit, ac in curvissimam lineam detorquet? Namque dum pondus sibi relictum à naturali gravitate ad rectæ lineæ ductum determinari deberet, intercedens aëris turbatio à diurno & annuo, item librationis terræ, ac Horizontali adificiorum motu excitata, omnem rectitudinem elidit, quin pondera ex alto demissa, lapilli instar obliquè in stagnum projecti, sæpius subsultare cogeret; ut proinde Astronomica simul & physica experientia contrarium Systema, utut subtiliter contextum ac triginta octo annis à Copernico elaboratum toto tamen cælo & terrâ aberrare declarent.

Scio, quid Adversarii hîc opponant, eundem scilicet naturæ genium; quæ ut avara non est, ita nec prodiga OEconomia, atque ut rectas lineas tanquam viam brevissimam ubivis amat, ita pariter simplices motus consecretatur, neque hos sine necessitate multiplicat; quâ occasione Copernicus universæ Arithmetica thesauros evacuans in calculum operosè cogit tot milliarium millia, quibus minima Stella in Æquatoris circulo posita intra tempus duorum vel trium arteriæ pulsuum provehi deberet, sicut ipse etiam Tacquetus noster computat l. 5. Astrom. c. 2. ejusmodi stellam in Æquinoctiali lineâ sitam uno horæ minuto trecentas quinquaginta tres semidiametros terræ describere. Quis stellas ita furere somniet, exclamant hîc Adversarii, velut conspecto Gorgonis capite, siderati? quis solem, qui plusquàm centum sexaginta vicibus Terræ aquæ molem magnitudine superat, quasi œstro percitum noctu, diûq; cum reliquo astrorum choro insanas choreas ducere opinetur, ut nempe exiguum jam hujus, jam alterius Climates frustum calefaciat? bene est, Adversarij, vestrum non nihil fervorem à terræ, credo, continuo motu vobis impressum temperate, ac paucis edicite, cur, theatralium ludorum immoti Spectatores, apparatus scenicum, tot rotis & funibus constanti vicissitudine permutari sinatis? cur frequens famulantium turba unius Magnatis mensam circumdet, & non potius hîc Princeps circa concursantium Servorum examen, vel ibi animata Orchestra circa spectaculum circumferatur? cur ergo Sidera Homini, compendio universi, & Orbis domino à supremo rerum omnium Rectore initiato obsequiosas faces præferre detrectent, cui ipsas mentes Angelicas, tanquam Spiritus administratorios, à servitiis esse Gentium Doctor testatur.

Imò ut fuliginosum quoq; argumentum è Copernici culinâ abrasum, refutemus, quis coqui illius prodigalitatem sustineret, qui ne modicum ignem, ac circa assandam carnem facile gyrabilem loco movere debeat.

36 DISCURSUS DE MUNDI SYSTEMATE

immensum rogam ex congestis integris sylvis, ac urbium maximarum ruinis accenderet? verum enimvero an aliud faciunt Copernici Contribules, qui ut solaris sphaera, licet quanto majoris, eo ceteris paribus ad motum commodioris, quietem inviolatam conservent, singulas firmamenti stellas vagrandi mensura amplificent, ita ut annua terrae orbita ad stellam sextae magnitudinis minorem habeat proportionem, quam unitas cum milione comparata; item terraqueus globus, licet bis mille ducentis & sexaginta quatuor terrae semidiametris eadem stella vicinior, hanc tamen in magnitudine crevisse non advertat, ac ideo insensibile ferme punctum harmonico omnium siderum & coelorum influxui substernat? vab incredibilem hypotesin! quis Solem, vas illud admirabile, opus excelsi, luminis inexhaustum fontem è Firmamento vix spectabile credat? cui bono conditum est impermeabile spatium inter fixas ac Planetam Saturnum immani intervallo interceptum? quam turpis hinc inter universi partes improportio resultat, dum tam ingens spatium omni visibili corpore vacuum relinquitur; quasi vero ad Dei potentiam ac liberalitatem enormis hac Firmamenti vastitas atque distantia magis pertineret, quam Tychonica Siderum circumvolutio, ne genus humanum, totius Siderei Orbis Caput, limacum instar cum domibus suis jugiter in gyrum agi deberet?

At replicant Adversarii, talis inde Planetarum motus consequitur, qui nullis Ellipsis, Excentricis circulis vel Epicyclis in ordinem satis redigi valeat, praesertim si erratica Sidera jam in sua quasi vestigia retrogradi, jam in eadem statione diu haerere videantur. Nimis hic de Systemate nostro solliciti sunt Adversarii, cum rectius implexam axis terrae ad axem Eclipticae inclinationem cum diurno vertiginis & annuo circumvolutionis motu ejusdem terraquei globi conciliare studerent. Nobis, licet falcem latius in messem Astronomicam immittere hic animus non sit, spirales maxime Planetarum motus, tanquam simplicissimos, probari enunciamus; retrogrados vero vel stationarios Planetas apparere ob inaequalem aliorum Siderum cursum, ad quae illos comparare solemus, sicut navis jam retroacta, jam immota apparet, si ab alia navi celerius impulsâ à tergo relinquatur, vel fluminis undas secundo alveo decurrentes satis assequi non possit.

Vtinam igitur Copernicani, rejectis suis ratiunculis, quae sigillatim omnes referri non merentur, terrae ac phantasiae suae motum hic denique cobiberent; tum restituto caeli, terraeque ordine ac debito corporibus situ, ad Peripateticum Systema reversi, cum Galileo septuaginta jam annorum Sene, Palinodiam canere non erubescerent; sed cum illo Solis in mundi centro immobilitatem falsam in Philosophia ac sacris Paginis contrariam publice profiterentur!

AUREI
PHILOSOPHIÆ
SÆCULI

PARS III.

^{SEU}
EXPERIMENTA
PHILOSOPHICA
^{AD}


JOSEPHUM I.
ARCHIDUCEM
AUSTRIÆ.

A. U. R. E. I.
PHILOSOPHIE
SECUNDI

P. A. R. S. III.
EXPERIMENTA
PHILOSOPHICA

JOSEPHUM I.
ARONIDUCEM
AUSTRIÆ







REGIE ARCHIDUX.



Vem in IOSEPHI I. Archiducis Austriae nativitate, velut Solem in Aurora sibi sponderat, illum ab adultis MAIESTATIS Tuæ radijs pleno in se meridie diffusum, ac ita se ipsam quasi in splendoris Austriaci speculo geminam videt & admiratur Austria. Regales siquidem Hymenæi, qui subditas Tibi Regionem lætitiæ exuberantis sensu, atque Romanum Imperium omnis felicitatis spe cumulaverant; præsertim Austriam, quæ aliena mensura crescere non potest, Austria ipsa majorem reddiderunt. Nam præter Hungariæ atque adeò Dominatûs Austriaci fines, Te in hæreditarium illius Regem consecrato, ad ipsum propè Mahometicæ tyrannidis nidum amplificatos, quos Majorum Tuorum Potentia, licet amplissima, nunquam attigit; jam insuper ostensa fuit Austriæ secutura Maximorum Archiducum Propago in Primogenito

mogenito Gloriæ Tuæ Hærede, de quo sibi vendi-
cando cūm Astra & Terra certarent, tulerunt illa
futuræ suæ liberalitatis pignus, ut inde Austria colli-
geret, eosdem sibi limites ponendos, qui totius sunt
Orbis, postquam in Augusto Tuo Sanguine Cœli
Imperium jam adiisti. Tanta promissa in Austriacæ
& Hanoveranæ Domûs Serenissimæ Insignibus fau-
stissimo connubio inter se copulatis inscripta sunt;
tanta omina in Regijs Tuis vexillis intexta, quibus
contra hostem explicatis Austriam ita protegis, ut
illi soli jure inviolabili Sol nunquam occubiturus sit,
neque alij Rhenus aut Ister serviturus, quàm uni-
versus Oceanus. Hinc resonans ubique Fama ap-
plaudit Austriæ, quòd à Martia Tua Virtute IG-
NEVS illi VIGOR accedat, qui pro victoriarum
mensura Solis cursum numeret, & ab Augusto Tuo
thalamo totidem Semideorum, quot longo
ordine Filiorum ac Nepotum CÆ-
LESTIS ORIGO.



PARTIS III.
CAPUT PRIMUM.
DISSERTATIO ACADEMICA
DE
NOVIS CIRCA HOMI-
NEM EXPERIMEN-
TIS.



Uæ in humani corporis fabricâ deesse, impia simul ac stolidâ Momi dicacitas effutiit, ea solertissimum Philosophiæ ingenium elapso Sæculo supplere tentavit. Quantumvis enim volucrum, non hominum Semitâ in Aere pendeat, reperti tamen sunt Architâ peritiores, qui non modò ligneas aves volatum docuerunt, sed unus Perusinum lacum volitando trajecit, alter verò Norimbergæ ex sublimi ædium loco semel ac iterum alligatas sibi pennas, Schwentero teste, feliciter exercuit; cumq; navigatio per aërem Species etiam volatûs dici mereatur, dictavit ejusmodi navim P. Honoratus Fabry per amplos tubos compressâ aurâ refertos, & P. Franciscus de Lanis per globos evacuatos mobilem, cui si eventus velificetur, digna erit, quæ Argo-navis locò inter sidera collocetur. Sed neque liquidum elementum invium esse mortalibus, permisit naturalis Sapientia. Constructis enim urinatoriis, ut vocant, Campanis, sicco ore & corpore sub profundo mari delitescere; spiritum liberè haurire, parvulâ aëris Sphærâ respira-

tioni per plures horas suffecturâ sub mediis fluctibus expansâ ; imò & ignem saluum, vivumque in vasis fundo per inimicas aquas circumferre docuit, eoq; merfarum navium thesauros expiscari; quod A.M.DC.LX. ad oras Cataloniae insignis Urinator præstitit. Naves etiam Philosophia delineavit, quæ modò ponderibus oneratae, nullâ tamen parte aquam bibentes, fundum peterent; modò pondere exempto leviores, ad maris superficiem eluctarentur, rationali tamen, ut ita loquar, pisce intus remigante.


Ex adverso, ut eadem Scientia senilis ætatis vitia, reddito juventutis flore, averteret, potens minerale à Lusitanis *de Cevar* dictum ex Indiâ Orientali attulit, in Occidentali verò Insulæ Bonicæ fontem detexit, cujus potus ac per lotionem usus fulcatae cuti vigorem, caligantibus oculis vivacitatem, semicurvo corpori agiles vires restitueret; adjectâ A. M. DC. LXVII. sanguinis ex hominibus vel etiam brutis in alios homines transfusione, vel catholicâ, ut appellant, Phœbi tincturâ, seu reductâ ad liquorem potabilem principis metalli substantiâ. Sed quidquid de his sit, ut cordis quoque fenestram, quam malè sanus obtrectator Momus omnium maximè desideraverat, Philosophia aperiret, Anatomiam, quæ jure crySTALLINA interioris corporum Oeconomiae fenestra nuncupatur, ita perfecit, ut præstantissimus Angliæ Archiater, ac in Londinensium Medicorum Collegio Anatomices Professor Guilielmus Harvæus admirandam illam humani Sanguinis pericyclosin Orbi exposuerit, quæ ut antecedentium Sæculorum obscuritate implexa hæsit, ita ab aureo nostro Sæculo in plenam diem evoluta est, singulari nostro

Discursu statim proseguenda.



DISCUR-

DISCURSUS PERIPATETICUS DE CONTROVERSA HUMANA- NI SANGUINIS PERICY- CLOSI.

 Oportet primo homini naturæ labor, circularis nempe sanguinis humani motus, licet ex antiquorum monumentis, ut è nube radius, subinde transpareat, meritò tamen novis elapsi Saculi experimentis accensetur, cum laudatus paulò antè Guilielmus Harvæus A. M. DC. XL. vitalem illum fontem aut primus deprehenderit, aut inoffenso cursu per totum corpus circumduxerit, observatis præsertim à solertissimâ Medicinâ hinc venarum valvulis, per quas sanguis in cor ita transit, ut per illas à corde relabi non possit; illinc arteriarum etiam valvulis, sed contrario modo exitum è corde, non tamen reditum eidem sanguini permittentibus; quam ipsam pericyclosin absque longâ Medicarum Sectionum historiâ (quâ alii discrepantibus terminis toties exscriptâ, sententiam suam magis dubiam reddunt, quàm eandem illustrent) ad duas tantum propositiones redigam, quarum primâ sanguinem per arterias è corde tantum effundi, alterâ eundem vivificum liquorem in cor per venas iterum reverti ex ipsis adversarum partium præmissis concludam, intra quos velut geminos cardines & præfens Discursus & humani Sanguinis Circulus omnibus suis punctis absolutus devolvetur.

Inprimis itaque Adversariorum, ut loqui solemus, pulsus exploremus. Ecce! arteria simili motu subsultat, quo cor follis instar jam sanguinem hauriendo per Systolen se contrahit, jam eundem regurgitando per diastolen extenditur. Numerus ejusmodi pulsum intra horæ spatium ad ter vel quater mille ascendere communiter aestimatur, per quorum singulos saltem scrupulum sanguinis è corde diffundi, tum arteriarum, tum ventriculi cordis capacitas satis indicant. Jam edisserant Adversarii, quæ sit hujus fluminis non interrupti scaturigo, ducentas & quadraginta sanguinis libras juxta calculum ex dictis initum intra bis duodecim horas subministrans? an fortè elementorum digestio? at quamvis Adversarii Miloniano stomacho & Mathonis adipato ventre præditi, cum Apicio pranderent, & cum Vitellio cœnarent, tantam nihilominus cruoris molem non excoquerent, cum magna ciborum pars in sanguinem non convertatur. Vel an aliàs tam magna sanguinis moles intra arteriarum ductus continetur? at octodecim tantum aut viginti sanguinis libræ humanum corpus irrigant, quod totum in adultâ etiam ætate statærâ impositum rarò ducentas libras excedit. Deinde in quod Mare rubrum se arteriæ tandem exonerant? an totus ille

sanguis, intra unius diei, noctisque spatium, in novam Atmospheram corporeo microcosmo circumsitam e poris exspirat? sed licet sanguineas lacrymas & cruentum sudorem perenni fluxu emitteremus, succedenti tamen sanguini diverticulum intra arterias non superesset, nisi natura, crudelis noverca, quotidie unam, rupto aggere disrumperet, & sic renovatis semper vulneribus progeniem suam cruentaret. Vel an per eandem rectam lineam retrogradus sanguis principium petit? verum hac ratione unda quasi alteram undam contrariis motibus urgeret, atq; cor penitus suffocari, aut sanguinolentâ saltem tempestate semper agitari necesse foret. Concedamus ergo, arterias sanguine manare, quem liberali gurgite in venas elargita, à venarum rursus profusa in fontem gratitudine quasi recipiant.

Sed fingant interim Adversarii, quem admittere recusant, circularem sanguinis periodum, & quales tunc experientia figmentum istud consequerentur, sincerè pronuntient. Gemina potissimum, respondebunt, talis nempe partium in humani corporis œconomiâ ordo & dispositio, ut arteria singula in socias sibi venas velut totidem canales, vitalem humorem derivent, ac in ejusmodi venarum & arteriarum occurribus sanguinem per anastomoses seu aperta ostiola in venas ita dispensent, ut ista tamen haustum sanguinem, obstantibus quibusdam valvulis, remeare prohibeant. Deinde in eadem Hypothesi post interceptam arteriam vena gracilescere; sectâ quacung; arteriâ totus sanguis e corpore animalis paulatim extrahi; brachio supra cubitum constricto sanguis à suo versùs cor itinere impeditus venas inflare; deniq; in viventium sectione, si vena aliqua in medio ligaretur, pars illius, quæ cordi proximior est, evoluto in hoc sanguine exinaniri, pars verò remotior à sanguine versùs cor reduce tumesceri deberet. Egregiè in damnum suum ratiocinati sunt Adversarii. Nunquid enim hæ ipsa experientia sunt, quas Anatomia & Chyrurgia quotidie e suis operationibus deducunt, imò quas unusquisq; propriâ manu palpare potest, si sanguinem arteriarum versùs digitos, venarum verò versùs brachium impellat; has insuper arteriis suo ubiq; vinculo connecti ipsæ mesaraica vena, sanguinem ex protensis arteriarum fibrulis assugentes, tum de quâ maximè dubitatur, vena azygos docet, per capillares meatus arteriis ita adherere jam observata, sicut Geographi deprehenderunt, Caspium etiam mare aquarum intra terram communicatione cum aliquo Oceano continuari; præsertim cum provida natura certam vena cava, versùs dextrum cordis ventriculum excurrenti, appendicem adjecerit, ad remigantem sanguinem faciliori via primæ origini restituendum.

Ad alterum modò Discursus nostri cardinem accedamus, & an sanguis quoq; ad cor intra venas recurrat, ulterius perscrutemur. Enimverò domi suæ peregrini, ac in antiquo mundo hospites sunt, qui id se ignorare pretendunt. Nam quid aliud probat inopinatus in extremâ corporis parte serpentis ictus interitum cordi cum imbibitâ qualitate celerimè invehens; facies, coarctato collo, rubescens ob interclusum

funne sanguinis refluxum; pedes glaciali aquæ immersi, si fortius stringantur, nullâ pectus alteratione obruentes, laxati verò vix non deliquium reverso frigido sanguine procreantes; medicamenta per infusoriam artem venis instillata reducem cum sanguine salutem vitali officinæ impertita; ipsa deniq. venarum ab arteriis diversitas, utpote nec pulsu micantium, nec pluribus tunicis tectarum, cum sanguis à corde remotior non ita amplius fervescat, ut fontis sui impulsu referre possit, vel pluribus repagulis, ne sua quasi littora vi disrumpat, coerceri debeat? quid, inquam, hæc aliq. irrefragabiles experientiæ manifestant, nisi venas sanguinem ab arteriis affusum refugere, atq. ad cordis cisternam iterum dirigere, ut inde velut per rotam retractus vitalis liquor toti corporis interni familiæ vires atq. salutem redintegret?

Imò eidem sanguinis per venas ad cor regressui potissima, quas Adversarii in suæ opinionis subsidium unde unde advocant, experientiæ dilucidè consentiunt. Deterior enim est, qui primus per phlebotomiam è venis elicitur cruor, cum melior in membrorum alimenta absumptus jam sit, vel morâ ipsâ & à vasis cardiacis distantia intepescat. Inconsultum verò est, arterias secare, cum probus ibi ac vividus adhuc sanguis bulliat, licet & illas Medicorum Principes aperiri subinde jusserit, si nimia sanguinis effervescencia morbum succenderat. Ampliores etiam venæ non alio tamen sanguine turgent, quàm ab angustis arteriis recepto, cum scilicet harum in effusione celeritas illarum partim in resorbendo tarditatem compenset, partim majorem laxitatem tanta sanguinis, præsertim intra venas jam crassioris, copia inundet, quantum in arterias identidem derivari velox arctiorum canalium motus desiderat. Quare sicut Aristoteles l. de Somno & Vigiliâ c. 3. docet: animantis cujusque calidum in sublime naturâ fertur. At ubi eò loci subvectum est, mox universum reciprocatur ac descendit. Non aliter vitale hominis calidum, seu sanguis, postquam membrorum omnium ariditatem, frigus, pallorem temperavit, ac illa muneribus suis ob-eundis idonea reddidit; ad cor, tanquam igneæ suæ naturæ spheram recurrit, ut exinde propinata denuò salutis circuitu exhaustas hominum vires reparet, ac totum corpus roseo vigore refocillet.

Haëtenus pro sanguine pugnatum. Sed causa, quæ illum impellat, nos oblitos arguunt Adversarii, atq. ita vitiosi circuli, cujus Nemo est auctor, Sophisticos tantum esse machinatores. Cogitabimus de motore. Interim ipsi Adversarii pronuntient, quis succum in supremos arborum vertices è terrâ devehat, per ramosa brachia dispenset, in folia, flores, & fructus efformet? vel, ut ab homine non deslectamus, dicant, quâ virtute chylus cum Galenicis ad jecur, vel cum Aristotelicis ad cor ex intestinis promoveatur? ubi non vacat principatum ac originem

membrorum cordi cum Philosopho adjudicare; quod Caesar Cremoninus A. M. DC. XXVII. eruditissimâ Apologiâ præstitit. In utraq; enim tam Galeni, quàm Aristotelis Hypothesi periodicus sanguinis motus sustineri facillimè potest. Sed ad propositum revertamur. Ipsa igitur anima recentem semper sanguinem in arterias ejaculando, anteriorem promovet, ut intra plumbeos canales aqua vehementius intrusa undam priorem impellit. Deinde arteriarum & venarum valvula compressum sanguinem retrocedere prohibentes, eundem rectâ pergere constringunt; quin ipsum prius sanguinem ab animâ informari & ita vitali motu seipsum circumagere plurimum Doctorum exemplo concederem, quàm circularem illius orbitam in dubium revocarem. Caterum etiamsi vis sanguinis impulsiva Philosophos lateret, num ideo falsitatis Harvæi Sententia insimulari jure posset? sic maximâ contentione sustinent Auctores cum Aristotele & D. Thomâ, Intelligentias calis & sideribus, ut Navarchos dirigendo gubernaculo assistere, velut vivas rotas, temporum indices globos ad ordinatum mundi Sublunaris regimen incitare. Et tamen alii non ignobiles Philosophi, qui negari non posse existimant, possibilem esse substantiam, quæ licet vitæ ac sensûs expers in circulum ab intrinseco volvatur, defendunt reipsâ, hoc spectabile calum ab insitâ qualitate, ut levia sursum & gravia deorsum, ita illud in gyrum ferri, cum natura, sine continui astrorum influxûs aliquando sibi præfixo, media quoq; ad tam constantem effectum suppeditasse credenda sit. Doctissimus verò Lessius soli D&O cœlestes motus attribuit. An ergo Adversarii cœlos ideo & sidera à cursu suo inhibebunt, quia de motrice eorum causâ etiam Sapientes antiqua lite commoventur?

Levius adhuc est, quod Adversarii à phlebotomiâ derivant, argumentum; nempe si sanguinis daretur circulatio, rationem amplius non fore, cur peritissimi Medici pro morborum varietate distinctas incidi venas consulant, ut basilicam contra hepatis affectum, vel cephalicam ad pellendos capitis dolores; ac non potius Chirurgis de omnibus promiscuè agrotis semper inclament: mediam pertundite venam. Enimverò inter horologia citius, quàm Medicos in secanda vena electione conveniet. Aliquos enim hæc minimè sollicitos tenet, cum illam præsertim aperiant, quæ loco commodiori sita, à periculo nervos vel arteriam ledendi magis removetur. Communiter tamen inciditur vena affecto membro proxima, ut ista per aliquod spatium exhausta malignos quoq; humores ibidem nidificantes ipso ejecti sanguinis impetu simul evacuet.

Neg. Sententia nostra obscure explicat, quomodo sanguis vel nimium extravasatus, vel obstructo per capillares propagines tramite, saniem & ulcera contrahat; præterea cur inopina formido pallorem vultui aspergat; ob cordis nempe compressionem, tanquam animalium spirituum in nervos; & sanguinis in extremas partes transfundendi impedimentum; vel ob similes ipsius arteria angustias, quibus hæc constricta vitalem succum, quasi suppetias contra imminens malum, ad fontem remittit. Majori jure quæreremus nos ex Adversariis, quomodo illi reducem stato tempore caloris ac frigoris vicissitudinem & reliquos febrium affectus ad regulares quasi causas reducant?

Atq; ex hætenus disputatis patet, ut Sidera depluum calorem, ac maria communicatum inter se humorem per orbitam in Orbem dispensant, ita sanguinem pariter vitale calidum ac humidum perenni circulo ad humana salutis immobilitatem circumferre.



CAPUT SECUNDUM.
DISSERTATIO ACADEMICA
DE
NOVIS CIRCA BRUTA
EXPERIMENTIS.



Microscopium, unânimi totius Orbis applausu elapsò
Sæculò exceptum, primæ jam Operis hujus Parti,
seu Inventis Philosophicis interseri meritum fuisset,
utpote A. M. DC. XVIII. à fertilissimo
Francisci Fontana Neapolitani ingenio delineari
cœptum, ut ipse in edito tractatu *de novis cælestium & terrestrium
rerum Observationibus* gloriatur, dubiam Telescopio palmam relin-
quens, an illud potius ob nova terræ cum cælo commercia, an lenti-
culare vitrum ob novos naturæ fundos in lucem protractos æstimandum
sit? Sed præsentì capiti reservare maluimus instrumentum, quod spi-
rantes atomos in molem ferè Colosseam transmutat, ut inde experien-
tias circa minutissima præcipuè animalcula colligeremus; nam ut Afri-
cæ oraculum profatur: *plus habent admirationis, quæ molis minimum.
Plus formicularum & apicularum opera stupemus, quàm immensa cor-
pora balenarum.* Plinius etiam primò jam Æræ Christianæ Sæculò
minima ejusmodi viventia magis obstupuit, quàm *turrigeros Elephan-
torum humeros, taurorumq; colla, & truces in sublime jactus, ti-
grium rapinas, leonum jubas; cum rerum natura nusquam magis,
quàm in minimis tota sit.* Vah! quid idem Historiæ naturalis Arbiter
exclamasset, si muscariis, ut appellantur, conspiciis instructus aranea-
rum retia, dentes tinearum, culicum tubas & lanceas in catenas ac
horrida

DISSERTATIO DE BRUTIS. 9

horrida Martis instrumenta excrefcere vidiffet ? fi erucæ villos inftar Zibellinæ veftis radiantes, domiportæ cochleæ ramosa cornua, formicæ riçtum more forcipis acuminatum, bombycum mammas ferico turgentes, oculos mufcarum pluribus cancellis munitos, vermiculorum in capite coronulas; fi denique naturam in minimis animantibus immania bruta mirabili compendio exhibere obfervâffet, ut in culice elephantem, aprum in araneâ, in Cyronibus echinos, in pediculo autem cum pulice commiffio quafi duo monftra in Amphitheatro pugnantia, ubi & ebullitio fanguinis ab irâ concitati, & illinc roftrum, hinc plures aculei ad fanguinem usque ferocientes apparent ?

Superfedeo itaque aliis referendis, quæ eruditiffimum noftrum, Sæculum circa volucres, terreftria, Zoophyta & amphibia animalia ac pifces notavit, Philofophiæ contemplatione profectò digniffima, cum ipfe Aristoteles decem libros de Hiftoriâ animalium confcripferit, Venatorum ac Pifcatorum manipulis ab Alexandro Magno, & octingentis infuper auri talentis ad proprietates naturæ fenfitivæ explorandas inſtructus. Non itaque in medium hîc adduco Florentinam canis & pſittaci muficam, vel alium famulantem Juſti Lipſii canem & comicum Harvæi pſittacum, Orangii tabellarias columbas in Harlemenſi obſidione, Stengelii avem ſimul cum fele, mure & cane ex eadem patinâ convivas; non Regii Mogorum currûs aurigam Simiam, vel alteram artis gladiatorię jucundo Belgii ſpectaculo peritam; non agri Romani Draconem A. M. DC. LX. vel Sirenem Danicam triginta tribus abhinc annis Hafniæ captam. Solis animantibus ſequentem diſcurſum impendere ſtatuiſmus, quæ à naſcendi facilitate ſponte naſci vulgò dicuntur, interea tamen Philoſophos difficultatibus adeò magnis & variis implicant, ut quinquaginta anni, quos Ariſtomachus ſolis apum moribus explorandis inſumpſiſſe fertur, certitudinem de abjectiſſimi vermis proſapiâ necdum peperiffè videantur.

DISCURSUS PERIPATETICUS DE PANSPERMIA ANIMATA.

Iotam præteriti Sæculi eruditionem ac solertiam vix non ex-
hauserunt tot plantæ & animalia quotidie ac ubiq; incertis
natalibus progenita. Multi siquidem Philosophi dignos
illis viventibus parentes nussiam contuiti, accidentia de-
fenderunt absq; immediato alterius causæ particularis concursu vitam
& animam effectibus largiri, à quibus tamen ipsamet toto genere su-
perentur. At opinionem hanc necessitatis potius impetu prolatam vel
ipsi Adversarij satis alibi refutant, dum ex pulcherrimo Mundi opifi-
cio divinas perfectiones demonstrant, atq; ex artefacti præstantiâ ideæ
& artificis manûs nobilitatem metiuntur; ubi præter voces nihil est
decantata illa inter causam principalem ac instrumentalem distinctio:
cur enim tota, quæ in effectu relucet, prædicatorum amplitudo in
agente principali vel majore vel aquali mensurâ residere deberet, si
illius ætiovitas ad solam accidentium productionem se extenderet; atq;
ita his ipsis ignobilior esse posset, sicut accidentia, licet integro Præ-
dicamento substantijs inferiora, in istas tamen, quidquid sunt & va-
lent, ex intrinsecâ sibi generandi potentiâ effundunt? unde, detra-
bendo verborum corticem, illa causarum principalium, substantiæ verò
instrumentalium munere fungerentur. Alia igitur Philosophorum pars,
cui accidentium debilitas explorata ac persuasa est, sidera vel motri-
ces Cælorum Intelligentias in auxilium evocant, ut illæ saltem herbas
& animalia incerto authore edita in suam progeniem adoptent. Sed
frustra. Nam totus Astrorum chorus eâdem cum accidentibus inopiâ
laborat, neq; vitam tribuere potest, quam ipse nullam possidere, ex
cælestium globorum inorganicis partibus deprehenditur. Unde D. Au-
gustinus de Manichæis ita loquitur: Si fortè turbati à me quærerent,
num etiam muscæ animam huic luci præferre censerem? responderem:
etiam; nec me terreret, quòd parva est, sed quòd viva, firmaret.
Non itaq; poterit Sidus, licet fulgore oculos perstringens, animalculi
etiam visum subterfugientis causa ob suam vitæ omnis expertem na-
turam constitui. Intelligentias verò quod attinet, cum illæ nullas
qualitates emittant, quarum beneficio novis substantijs progenerandis
appli-

DISCURSUS DE PANSPERMIA. II

applicentur; cadaveribus, ut corvi, perpetuò insideant, oportet, ut inde molesta clientibus suis Mortalibus Insectorum agmina educant; quod quàm à mentibus Angelicis ad universalia cœlestium corporum gubernacula destinatis, tam à ratione alienum est; naturam scilicet animalium faci & parietalibus herbis causam inter res creatas principem reservasse, vel hanc ad curandos triremium cimices abjecisse. Interea non pauciores Philosophi DEUM ipsum, ut jam olim Aristoteles contra Anaxagoram acute dixit, per machinam adducunt, more trivialium Comœdorum, qui de resolvendo fabulæ nodo desperantes, superos è nubibus spectabiles exhibent, ut sic implexam Epitasin comicæ agnitione evolvant. Sed hæc citra necessitatem philosophandi methodus vel ad illam opinionem disponit, quam S. Thomas stultam vocavit, tanquam res creatas omnes ad perpetuum otium condemnantem, solo DEO ad earum ut conditionum & quasi testium presentiam universa operante; vel cœli, terræ, Imperatorem animandis, ut Domitianum consigendis muscis ante omnia intentum palmari sanè injuriâ effingit, quasi verò natura numerosissimam & infimam animantium sobolem omni creato patre orbare vel improvida voluisset, vel impotens debuisset.

Verùm enimverò quid jam agendum, dum Adversarij unito contra nos agmine ranas è paludibus, mures ex Ægypti argillâ, apes ex vituli, vel bufones ex anatis infosso terræ cadavere, anseres è Scoticis arboribus, Brasiliæ cicadas sensim in viventia vegetativa degenerantes, vel aves, quas Chineses Hoangcioyu vocant, in gratissimi saporis pisces conversas, atq; immenso exercitu araneas, bruchos, formicas, limaces, scarabæos, lendes, culices, pulices, locustas, teredines, tineas, lumbricos naturâ aut variâ arte multiplicatos immittunt; mox ad plantas transgressi hederam è cervi cornibus, triticum è lolij radice, corallinum fruticem ex humano cranio, atq; acervatim cappares è ruderibus, ac è tectis gramina obijciunt; quorum omnium viventium genealogiam texere, ut difficillimus, & nondum hætenus absolutus, ita proprius Philosophi labor est; cùm Poëtæ tantùm de ejusmodi substantijs canere licuerit: Sponte suâ quæ se tollunt in luminis auras; Philosophia verò illas sponte nascentes appellet, quòd nullâ ad vulgi sensum præsentè condignâ origine exoriantur, non autem, quòd proportionatâ causâ omnino careant. Clypeum hîc iterum & hastam subministrat Dux noster Aristoteles, dum l. 3. de generat. animal. c. 11. ait, esse quodammodo plena animæ omnia: postquam l. 2. c. 3. præmisit: conceptum inanimatum esse nemo statuerit, & vitâ modis omnibus privatum: quippe cùm nihilo minùs semina & conceptus anima-

lium vivant, quàm stirpes; ac paulò post: de animâ quoque sensuali pari modo dicendum est. Causam deinde hanc subjungit: omnes enim potentiâ priùs haberi, quàm actu necesse est; quibus proinde textibus reliquum de Panspermia animatâ Discursum, tanquam Peripatetico fundamento inædificabo, brutis tamen ac plantis solummodò applicandum; circa homines enim, utpote animâ indivisibili ac spiritali præditos, aliter nos sentire & fides & ratio dudum docuit.

Pronuntio itaq; primò, omnia seminibus vegetabilium & animalculorum plena esse, partim ob ipsam horum viventium fœcunditatem, partim ob semina cum vaporibus & exhalationibus, omnium meteororum principijs, quaquaversum facillimè dissipata, & in conveniente sibi matrice extemporaneos nidos fabricantia. Qui veritatem hanc in caput inducere non potest, muscaria, quorum in proximâ Dissertatione memini, perspicilia naso suo imponat, & hoc vitreo ductore totum Naturæ regnum pervagetur. Deprehendet quamprimùm in ligno, quod curiosum cognominatur, innumerabilem Insectorum pullulaginem corniculis ac proboscide instructam, in Lonchitidum folijs & linguis cervinis, quæ vulgò semine destituta creduntur, plantifera semina copiosè adhaerentia; in Salvia stamine minutissima ovula; in corrupto vitis liquore serpentiformes vermiculos; in araneorum retibus ovaes globulos, ac in his palpitans punctum nigrum, quod cordis principium est, instar unionum pendentes; papiliones intra exiguum tempus in erucas, mox in chrysalides ac deinde rursus in novos papiliones transmutatos; in cute humanâ ulceribus affectâ bestiolas, candidi aliàs puncti similitudine, instar histricis rigentes; in variolarum pustulis integra vermium hospitia; in lue pestiferâ animatas quasi atomos cum sudore è corporibus exspirantes, ac levissimâ aëris agitatione transvectas contagiosum malum latè disseminantes, ut suprà parte 2. c. 3. in Dissert. Acad. de Phœnomenis Aereis insinuavimus; deniq; in muris ipsis è lapide structis ac minimis Insectorum corpusculis alia inimica insecta reperiri, ut in pulicibus sugentes illorum sanguinem cimices Philosophia Burgundica notavit; quorum cuilibet per vitrum introspecto, sicut Martialis vipera electro inclusa meritò posset accini: Et latet, & lucet. Sed neq; rarior est ejusmodi minorum gentium fertilitas, quàm multitudo; si enim carnem Solaribus radijs expositam, lardum vetus, vel caseum pulvere obsitum consideres, experiëris, non solos fungos unicâ nocte succrescere: quin Kircherus vidit in tabescente corpore vermes limacum instar tantæ fœcunditatis, ut intra dimidiam horam quinquaginta similes partus inde processerint; quod ipsum

con-

confirmant variarum frugum & insectorum mirabiles pluviae, quarum recentissimas in Dissertatione nostrâ Academicâ de Phœnomenis aqueis retulimus; item vermes lutei coloris unâ cum nive in Hungaria Anno M. DC. LXXII. terribili copiâ delapsi; locusta ad Viadri ripas legionum multarum ordine, quibus singulis dux praeerat, pascua & agros A. M. DC. LXXXII. miserè spoliantes; bestiola quadrupedes soricum formâ & magnitudine post repentinas tempestates versùs septentionem, Olao teste, è nubibus saepe decedentes; in Quitensi verò America Provinciâ vermes ex aère haud rarò decussi; & in venenatos postea angues mutati, atq; ut Oenipontum etiam commemoremus, Annò M. DC. LXXV. permixta nivibus araneorum tela, dum nasciturâ ex insectorum copiâ calamitatis timore viciniam totam suspendere, simul de Panspermia seu universalis seminum diffusionis veritate tacitum ab omnibus assensum reportârunt.

Pronuntio jam secundo, semina vegetabilium & brutorum omnium ita undiq; dispersa ac multiplicata verè animari, & quidem animâ perfectâ illius speciei, cujus est vivens, à quo tale semen decisum & relictum est. Suffragantur huic effato tam experientia, quàm ratio; illa quidem, dum effectum vitalem à virtute semini intrinsecâ produci demonstrat, ipsam scilicet organorum plantæ vel bruto ad proprias cujusq; operationes deservientium structuram; quemadmodum enim nutritio in vitalium actionum classe ponitur ob alimentum in omnes corporis partes uniformi difformitate dispensatum, sic prædicta organorum fabrica pari proportionem ordinata cujuscunq; inanimata causæ vires excedit, atq; in plantarum quidem seminibus vegetabilem animam, in brutorum verò, quæ instrumenta perfectiora ad nobiles sensuum functiones desiderant, sensitivam animam habitare declarat. Experientiæ manum jungit non una ratio. Inprimis enim juxta Adversarios inanimata seminis forma ita in bonum superventura animæ operaretur, ut ab illâ pro instructi habitaculi mercede non tantum domo, sed è rerum naturâ penitus expungeretur. Deinde succedens anima vegetabilis, item huic subrogata sensitiva principio sui productivo careret, si exempli gratiâ in Cairi furnis pulli excludantur, vel post Nili inundationem greges ranarum profiliant. Deniq; observatione quotidianâ docemur, tritici semen vel sulcis mandatum, vel in horreo expositum, similiter punctum albicans in vitello pullescentis ovi, aut numerosissima piscium & cancrorum ovula preparandis organis speciei suæ singularibus occupari, alimentum intus suscipere, atq; ex illo augeri, animâ seminis hîc se habente, ut Aristoteles lo-


quitur, more dormientis Geometra, qui licet in somno à terra dimensionibus cesset, vires tamen ad doctas vigilias restaurat vel perficit. Divinè hunc Discursum confirmat Incarnata Sapientia illo ipso celebri textu Joan. 12. quo Adversarij Panspermiam animatam intimè se lancinare opinantur. Ibi enim aternitatis Verbum asserit, semen seu granum frumenti cadens in terram emori debere, ut solum non maneat, sed multum fructum afferat; quæ sanè vivificans mors præviam ejusdem seminis vitam supponit. Similitudo etiam inter hominem & illud semen instituta claudicaret, nisi utrobique partes diversæ reperirentur, quarum unam emori, alteram vitâ ad fructuum ubertatem stabiliter frui oporteret. Nimirum, ut in homine corpus simul vivit & anima; illud tamen aut mysticâ aut naturali morte ad indemnitatem animæ defungi necesse est, ita in grano frumenti, ac proportionaliter in omnibus plantarum & brutorum seminibus, licet hæc à principio integra vel majore sui parte vivant, nihilominus extimâ ac crassiore sui portione corrumpi & fermenti instar ita subigi debent, ut altera spirituosâ seminis portio vim plasticam eò magis possit exercere, atq; vitalem fructum fecundiore sinu profundere.

Quæ cum ita sint, pronuntio tertio, plantas omnes & animalia etiam ex putredine emergentia, nec absq; semine produci, nec animâ vivere, nisi quam vel perfectiorem vel aquè perfectam prolificum semen possederat. Satis hoc ex præmissis hætenus elucet, cum nempe nec materia seminalis, nec seminum sensitiva etiam, ubi opus est, vita uspiam deficiat; solidus insuper argumentandi modus sit, partim à viventibus etiam insectis, quæ certò ex semine nasci deprehendimus, ad dubios aliorum, seu vivipara, seu ovipara sint, natales decidendos transire; partim cum Panspermia animatæ Hypothesis experimentis omnibus etiam circa fortuitos effectus ita satisfaciat, ut ab ijs vicissim lucem & robur mutuetur; quæ profectò veritatis explorata tessera, & ordinato natura nunquam à se abludentis genio summè est consentanea. Sed vel illa ipsa animalia in Discursus nostri favorem adducamus, quæ plurimos Panspermia etiam Patronos in tales angustias redegerunt, ut postquam ad leopardos, mulos, & lyciscos deventum, in medio eruditæ aliàs Disputationis cursu Lectorem destituerint, ac panico difficultatis metu ad Causam primam post subdolas ambages deniq; confugerint. Antequam verò nostram de ambigua speciei animalibus opinionem explanemus, præmittenda videtur monstrorum generatio, ut Adversarij in hac etiam controversiâ statuere non dubitent, quod ipsimet alibi propugnant. Monstra igitur, quæ partim à cau-

causâ impediēte seu priorem ab intento fine remorata prodeunt, triplici praesertim originis via in lucem eduntur. Prima est materia seminalis redundantia, unde immanis ille gigas enatus est, cujus molarem dentem se vidisse refert S. Augustinus tantâ vastitatis, ut exinde centum nostri efformari potuissent, vel ille enormis serpens, quem Mela tradit, jugeri longitudine quamlibet excuriarum squammam in clypei formam expandisse; Et universim Aristoteles l. 4. de generat. animal. c. 4. docet, nimiam fecunditatem monstrorum causam esse, ut in terra Aegypti, ubi numerosam uno partu sobolem saepe progigni, passim Historici scribunt. Altera monstri eventus origo ab inopia materiae procedit, quò pertinet ille Cardani Nanus, qui perfectâ jam ætate cubiti altitudinem non superans in caveâ psittaci circumferebatur, vel alter Nicephori, qui ultra perdicis mensuram non excrevit, ac generatim Pygmaei cruento cum gruibus prælio inclyti. Tertiâ deniq; monstrorum causam constituit promiscua seminum diversae speciei confusio, quâ ratione animalia Africa ad eosdem fluvios, ob horum paucitatem aquandi causâ concurrentia illam maxime Terræ partem monstrorum patriam efficiunt. Sicut etiam in Insulâ Rhodo Dracones crebrius comparuerunt, ubi nempe rapacium volucrum multitudo varia semina intra cavernas cum prædâ congerit, quæ cum ad novum animal totum conferre nequeant, saltem singula partem illius sibi assimilant. Superessent quidem aliæ adhuc monstrorum causæ, ut aeris Et aquæ alicui regioni propria dispositio, quam videmus, ipsis adeo lapidibus diversas viventium effigies impressisse; item vehemens parentum imaginatio tot natorum in filiis ac abortuum origo; sed abundè priores tres causæ modos totidem suppeditant ad difficultatem, quæ Philosophos à Panspermia animata Hypothesi in transversum agere solet, superandam. Sic enim pariter asserimus, vel tales anomalos partus non habere aptitudinem per se ad diversos fines cognitos sub ratione communi, in qua ipsa aptitudine Specificam Differentiam in Logicâ nostrâ constituimus, sed ab ejusmodi fine per accidens tantum aberrare, ob illas nimirum circumstantias, quas in monstrorum generatione diximus intercedere. Vel variatorum accidentium cum substantiis concursus, quem in Physica, ut experientia, ac promovenda mixtorum activitati conformem, tradidimus, progeniem quoq; diversam efficit. Vel deniq; plantarum Et brutorum animæ, quas omnes esse divisibiles in Disputatione de Animâ stabilivimus, cum perfectam suæ speciei sobolem ubiq; consequi non valeant, illud saltem formæ genus introducunt, quod in tali agentium ac contrariorum conflictu vel primò in materiâ seminalis sanguinis produci, vel reliquis per accidens corruptis

16 DISCURSUS DE PANSPERMIA.

remanere potest; ubi *Adversariorum* eruditioni ac iudicio relinquimus, unum è tribus his generationum modis particulari cuilibet eventui applicare. Nobis sufficit, duplicem in hac materia scopulum evasisse, quorum alter erat primi in quavis specie Insecti ab ipsa Mundi creatione deductio, quod juxta D. Augustinum absurdissimum est dicere. In nostra quippe hypothesis semen perfectius à destinato effectu inhibatum, vel ab alio activo comprincipio determinatum, inferius animal generare potuit, futurum deinde totius novæ speciei seminarium, quam Philosophi sponte vel ex putri nascentium compellant. Alter scopulus fuit, causa viventibus proportionata defectus, quem proinde *Panspermia animata* beneficio supplere, hætenus laboravimus.





CAPUT TERTIUM.
DISSERTATIO ACADEMICA
DE
NOVIS CIRCA PLANTAS
EXPERIMENTIS.



Ylvam ingredimur non tam arborum, quàm my-
steriorum, ubi de vegetabili naturâ loqui incipi-
pimus, quam, si ullo loco, hîc verissimè Sene-
ca pronuntiavit semper occultare, quod revisen-
tibus ostendat. Nam si Plantarum nostri Cli-
matis detectos mores, vim medicam, sexum, annosam vitam, affini-
tates & odia, morbos & à primo germine revolutam per totum arbo-
ris corpus usque ad idem germen anatomiam contemplemur, quam
sequente Discursu paucis delibabimus, truncus sit, oportet, qui non
ex sola in hoc etiam instituta insitione Philosophiam celebret, cujus
ductu Botanici in plantarum cognitione & culturâ elapso Sæculo adeò
floruerunt, ut famosa Luculli & Pompeij viridaria, ac pensiles Baby-
loniæ horti si non pretio, saltem arte nostris cedere cogerentur, &
quem unum antiquitas Labyrinthum Cretensem obstupuit, jam mul-
tiformem omnis Aula numeret. Quòd si ad hospites plantas vel alte-
ro è Mundo quasi peregrinatas accessero, nempe agniformem fruticem
è Tartariâ, Hierichuntinam rosam è Judæa, florem Passionis è Peru-
viâ, pudicam arborem è Brasiliâ, crepitantem ex Indiâ, tristem verò è
Malabariâ; si expressum è vitibus navigationis beneficiò advectis uva-
rum sanguinem, Lunariam herbam folia secundùm Lunæ incrementa

18 DISSERTATIO DE PLANTIS.

augentem, vel secundum decrementa amittentem, poma humani capitis specie è circumdatis testaceis vasis crescentia, flores diversi coloris ac fragrantiae stirpem, exuto naturae genio, progerminantes considera-
vero; si Aloën, quæ ex Americâ in Europam, velut aliam coloniam, translata centesimo tantum anno florere hæcenus credebatur, post tri-
ginta & unius anni spatium in Silesiâ moras abruptisse, atque, ut alle-
gatae sæpius Ephemerides Medicæ prioris Sæculi referunt, fœcundum
finum unâ vice aperuisse, numerosâ prole ramorum, & plurium adhuc
flosculorum, aliquot mensium conatu, effusâ; vel quam ipse vidi su-
pra Romana aureæ Neronis domûs rudera plantatam, post dimidij
Sæculi sterilitatem in proceram ac fertilem arborem A. M. DC. XC. IV.
excrevisse; fatendum omnino est, Philosophiam vel in similibus ex-
perientijs indigenti quasi naturæ succurrisse, vel illius thesauris è vege-
tabili Regno effossis Scientias & Artes omnes locupletasse.

Quod tamen & Spectatorum curiositatem & Botanices ipsius
præstantiam superare videtur, est stupenda Philosophicæ, ut vocatur,
arboris è cinere resuscitatio, seu Palingenesis, quâ feminalis virtus in
centro salis arte spagyricâ è plantis extracti ac cinere ubivis circumdati
delitescens plasticam suam vim leni calore excitatam intra phialam,
hermeticè clausam exerit, atque salinis corpusculis in organa, quæ se-
men postulat, confluentibus, perfectam plantam efformat; qualem
P. Athanasius Kircherus, cujus ut pulchrè cecinit Poëta: *Et vultum Et
nomen terra scit Antipodum*, in Musæo suo Romæ exhibuit Anno
M. DC. LVII. præsentem ipsâ Serenissimâ Christinâ Sueciæ Reginâ.
Num igitur aureum illud Sæculum negare quis præsumat, quo per
Philosophiæ culturam omnis fert omnia tellus?



DISCUR-

DISCURSUS PERIPATETICUS DE PHYSICA VEGETABILIVM ANALYSI.

Nure vel se præteritos conqueri, vel silentium nostrum in causa sua victoriam interpretari possent Atomistæ, si illorum malè consarcinatum de Corpore naturali Systema nullo Peripatetico Discursu divelleremus. Enimverò perspecta nobis sunt, quæcunq; Cartesius supra Empedoclem invenit, Gassendus Epicuro addidit, Helmontius cum Spagyricis eliquavit. Sed non propterea Aristotelem valere jubemus, plurimorum evolutò præsertim Sæculo Novatorum exemplo, qui à Scholarum vulgo inanem inde plausum captârunt, quòd Sapientiæ Principibus, quos à limine tantum, & animo præoccupato salutaverant, contradicere, ac eorum solidam doctrinam livido dente arrodere non horruerint; quin cum noto illo Cartesij amico exclamare ausi sint: nullum unquam præter Cartesium extitisse in Mundo, qui retexerit prima vera principia, & cognoverit primas causas omnium, quæ in natura producuntur. Ne tamen in vastissimâ controversiâ, dum brevis esse laboro, propositam ubiq; claritatem offendam, de plantis tantum discurrere animus est, tanquam proprio totius hujus Capitis themate, & ex quarum Physicâ Analysisi hausto fortiore spiritu, non difficile ampliùs erit, simplices atomos ultra possibilitatis in præsentì rerum ordine limites exsufflare.

Prima igitur occurrit Plantarum generatio, quæ cum opposita sit actioni creativæ, subiectum aliquod præsupponat, necesse est. At quale illud? an particulas elementares invariata sui substantiâ in plantam congenitas? verum illæ nec esse possunt igneæ, cum vegetabilia pleraq; aestu intensiore exarescant; post affusas verò pluvias ubertim se propagent. Nec aquea corpuscula rectè assignantur, cum integra nemora à modico igne succensa, hunc immensâ quasi quantitate jam priùs intra sinum fovisse deducerentur. Adbuc minùs aërea vel terrestres atomi plantarum genesin promovent, cum illæ nativâ suâ mobilitate diffuentes concinna florum & arborum textura obsisterent, hæ verò cedrorum proceritati & tiliarum latitudini sua gravitate repugnarent. An potiùs dictum generationis subiectum certa est atomorum figura? sed ista secundum se, utpote ex infimis ubicatio-

num entitatibus compacta, activas vires non habet. An earundem paucitas vel multitudo? sed quæ magnetica vis determinatam tot & non plurium atomorum numerum attrahit & velut ad decempedam mensurat? Aut si symbola fortè corpuscula nescio quo confluxu sympathico uniantur, cur non in quacunq; vineâ uvæ nascuntur, quales è Terrâ Promissionis in perticâ à præmissis exploratoribus relata sunt? deinde in prodigo Cleopatæ Reginae convivio, ubi sola rosarum copia talento constitit, cur non sociatæ rosarum particule in unicum ejusmodi florem quercûs magnitudine excreverunt? porro quis elementa implacabili contra se odio pugnantia tam æctis fibrillis, stringentibus se venulis, junctis ramorum brachijs, temperantibus calorem folijs connectit, cum ignis aquam suffocare, terra aërem elidere, ac omnes à se mutuò separari extremis viribus contendant? cur Acer quò amplius putatur, eò uberius progerminat, Cypressus verò cacumine deciso perit? cur rosa sobolis refectione fecundatur, & allij applantatione odorosior prodit? cur aliqua arbores & plantæ spuriam surculorum fœturam edunt, aliæ duplicati corticis quasi veste induuntur, aliæ verò tornatâ velut radicum propagine consistunt, nisi altius elementis omnibus principium tam mirabiles vegetabilium affectiones exigat, amissas reparet, reparatas conservet, ac in novâ suæ speciei progenie multiplicet?

Ad nutritionem, quam Plantæ per introsuscepta alimenta sibi ipsis ministrant, progrediamur; ubi ante omnia commemoranda venit pulcherrima similitudo, quâ Aristoteles præsens negotium sic declarat 2. de generat. c. 6. perinde natura, atq; paterfamilias prudens, nihil omittere solet, ex quo facere aliquid commodi possit. Dispensatur autem in cura rei familiaris ita, ut cibus optimus detur liberis, deterior servis, vilissimus fociis animalibus. Jam quis sibi possit imaginari, elementa vitæ omnis expertia, & fortuito vinculo, quod summâ vi abrumpere conantur, alligata succum è terra sugere, attractum excoquere, ac commune toti corpori alimentum in purissimas, medias, ac ignobiles partes ita dissipari, ut primis quidem medulla, medijs flores ac fructus, extremis cortex ac putamina augeantur, vel restaurentur? præterea quis nutritivæ facultatis organa construit, nempe profundas radices, succifera vasa, capreolos, filamenta, ac reliquum à Botanicis exenteratum vegetativæ potentie apparatus? profectò ignis, dum ceram vel oleum depascitur, nec radice opus habet, quæ oris vicem subeat, neq; trunco, in quem velut ventrem cibus traiciatur, nec diversis ductibus, qui nutrimentum in omnes partes venarum instar ita transvehant, ut bonus succus, qui sanguinem animalium refert, intimam substantiam

DE VEGETABILIVM ANALYSI. 21

stantiam alat, deterior verò in corticem abeat, vel penitus reijciatur. Insuper si elementa se nutrire deberent, similis sibi alimenti appetitu vellicarentur, cum tamen experientia doceat, illa ad puritatem statûs sui connaturalis magis accedentia, ob nimiam intensiorem qualitatum, temperamentis viventium nocere; plantas verò imbribus præsertim vernis fecundari, qui diversis corporum effluvijs, ac peregrinis eorum qualitatibus turgentes elementa refringunt; imò ad majorem arborum fertilitatem sæpe conferre radicum fissuras, quibus, ut hortorum cultores suadent, aqua lacte permixta cum vitulino sanguine immittatur. Deniq; plantarum corpora ita se nutriunt, ut alimento geometricâ quasi proportionem distributo, partes singula propriam sibi figuram induant, ac deinceps conservent. Aer verò & aqua alienâ cujuscunq; vasis figurâ indiscriminatim terminantur; ignis totus sursum ac terra deorsum tendit, neq; elementa intus sumptam, sed merè juxta positam escam requirunt; in statu suo perfectissimo, id est, maximè connaturali omnibus nutritionis instrumentis destituta. Quis ergo vel Atomista mente assentiri possit, à sola combinatione, quæ nullam sui radicem habet, totam naturæ vegetabilis œconomiam primò ordinari, & postea stabiliter dirigi?

Supersunt admiranda Plantarum passiones, quæ Aristotelis Magistrum Platonem eò adegerunt, ut vegetativam stirpibus vitam tribuere non contentus, sensitivam eisdem adjecerit, teste Plutarcho l. 5. de Placitis Philosophorum c. 5. Plato, Empedocles stirpes quoque in animalium numero censent. Ubi breviter notanda est recentiorum Atomistarum ab antesignano suo Empedocle defectio. Illi enim Plantas ex inanimatâ elementorum permixtione componentes, omnem animam è stirpibus reipsâ eliminant, Empedocles verò has animâ etiam sensitivâ præditas tradidit, & quidem simili animabus à Platone assertis, ut ex Plutarcho colligitur, id est, elementorum combinationi superadditis; Plato siquidem in Timæo eleganter ostendit, combinationem corporis organici potius ab animâ effici, quàm formaliter, ut moderni Atomistæ somniant, cum illâ identificari. Verùm sicut antiqua Philosophia hallucinata est, sensum vegetabilibus affingendo ob nescio quos metaphoricos plantarum affectus, qui ab innato potius appetitu, quàm Sensationum exercitio proficisci facile demonstrantur, sic juniores Atomistæ soli quatuor elementorum constructioni tam varias & insignes plantarum proprietates ac effectus præposterè arrogare convincuntur. Adeste enim elementarij Opifices, & fructiferas imprimis arbores contemplemini, ut Malum punicam, citrum, oleam, morum, & palmam.

Ad arbores non fructiferas ut cedrum, laurum & ebenum transite; arbuta in cinnamomo, thure, vitibus lustrate; plantas frumentarias, hortenses, medicas inspicite; flores in lilio, rosâ, caryophyllo considerate. Siccine elementa contrario sibi vinculo invicem constricta illorum omnium ac singulorum vegetabilium germina, corpus organicum, flores ac fructus generare potuerunt? quod antequam credam, Atomistæ lecticam terræ infodiant, quæ, ut Philosophi utar exemplo, aliam lecticam progeneret; aut fractum horologium ita ordinent, ut hoc deinceps seipsum semper reparet, vel navis aut domûs alicujus partes tali pacto combinent, quæ seipsâ in classem vel civitatem integram excrescat.

Quod si in talibus desperent, quicumque mechanicum philosophandi genus sectantur, quid idem respondebunt, si altiorum, quæ in plantis vigent, virtutum causam requisivero; vitis scilicet cum ulmo connubij, fatalis verò cum hederâ complexus; vel abdita potestatis quasi frontibus plantarum à naturâ inscriptæ, ut milij Solis calculo, cujus figuram præfert, radicis verò Cyperi, quæ scorpionem repræsentat, venenato hujus morsui medentis? quid dicent, si alterius cœli & glebæ plantas in ultimâ Dissertatione recensitas; si umbram fraxini serpentibus, platanos verò vespertilionibus inimicas, si palmæ fœminæ & masculi Sympatbiam, solisequas herbas, ingentes tilias & Indicas ficus, Turcica lilia senario semper foliorum numero frondentia, chelidonia, dictamni, ac ipsius, si placet, bellebori sanantem indolem, polypodij certâ lege secti conformem Imperiali Aquilæ figuram monstravero, qualis præsertim A. M. DC. LVII. Varsavia observata fuit, cum nempe LEOPOLDUS Hungariæ & Bohemiæ Rex suppetias contra Suecos Polonia submitteret, ac altero deinde anno Romani Imperij fasces Francofurti acceptos, Casimiro Rege Polonia armis in Regnum restituto, inauguraret? quid si candida mora ex albâ populo, mala punica è salice per insitionem produxero? siccine, ita Sapientum judicia obtestor! siccine elementa inter se violentè confusa his omnibus experientijs poterunt satisfacere, cum illa interim præcipuè in quatuor humoribus animalium elucescant, nempe ignis in flava bile reliquis supernatante; in atrâ, quæ gravior ac densior est, terra; in phlegmate aqua, & aër in subtili sanguine: nihilominus idem ipsi humores animati esse communiter negantur, cum vel alimentum sint animalis, vel certè debitis ad vitales effectus organis careant, unde nec in omnem dimensionem proportionaliter augentur: quomodo igitur elementa imperfectius intra plantas combinata vitalium ibi operationum præstantiæ ac varietati suffi-

DE VEGETABILIVM ANALYSI. 23

sufficient, quæ videmus animâ rationali velut dominâ expulsâ, rebellium servorum ritu tumultuari, ac dissolutum corporis edificium in massam putridam convertere? rursus an verisimile est, quodvis elementum posthabito bono proprio in reliquorum commodum conspirare, hostilium accidentium turbam cum amicorum dispendio fovere, frigidas terre ac humidæ aëris particulas, quibus plantæ potissimum constant, hyemali tempore, licet illis simillimo, elanguescere, recalescente autem veris ac siccæ æstatis tempore fructus suos maturare, verbo, quatuor elementa, ut totidem erga se mutuò hostiles Principes eandem Rempublicam, Duces exercitum, Prætores civitatem ordinatissime administrare, cum tamen vivum vegetabile corpus ab inanimato lapide, vel emortuo trunco non nisi atomorum quantitate, figurâ, motu discreparet?

Omnino respondent Adversarij. Si enim Ars, quasi æmula nature simia, è pauculis Alphabeti litteris vario ordine inter se concinnatis Iliadem Homeri, ac Virgilij Æneidem produxit; si opus musaicum, ut vocatur, ex omnis generis lapillis coagmentatur, opus verò Phrygium è filis multiformibus textitur; si pictor iisdem coloribus aliter dispositis jam Apollinem, jam Iherositem efformat; si scalprum tollendo præstat, quod addendo penicillus; an non potius natura artificum Magistra exhibere omnia poterit sensibilis hujus Mundi spectacula per diversam tantum dispositionem atomorum, directrice præsertim illa Sapientiâ, quæ humanam intelligentiam ac industriam infinitis transcendit parasangis? Egregiè profectò artem naturæ simiam compellâstis, Atomistæ; nam ut ista licet hominem imitetur, nunquam tamen in hominem evadit; ita quamvis artis negotia & operandi methodus circa variam rerum dispositionem versentur, non tamen inde principium sui nutritivum, propagativum, ac si alicubi læsum fuerit, reparativum emerget; quod vel in ipsis artefactis palàm est, quæ Adversarij in favorem suum accumulârunt, si nimirum typographica illorum Poëmatum litteræ, musaici & Phrygij operis lapilli ac fila dissipentur. Quid, quòd DEUS ipse, ut mortales in suos filios adoptet, intrinsecum illis principium infundat, gratiam scilicet sanctificantem, quæ radix sit actionum & habituum talibus filiis convenientium, ac altera quodammodo Hominis ad supernaturalem finem elevati natura.

Confugiunt hinc Adversarij ad Chymicorum furnos, atq; ibidem corpora in partes minutissimas resolvi clamant, quin ipsummet ignem partim in cineres, ac partim in fenum & fuliginem dilabi; non mi-

24 DISCURSUS DE VEGET. ANALYSI.

nus unguenta aëri exposita subtiliorum partium ac virtutis simul jacturam facere, vinum quoque generosissimum in vappam degenerem similiter commutari. Utinam hic tempus foret Chymicorum secum ipsis dissidia commemorare, quos tamen Atomistæ ut patronos passim asciscunt. Boyleus enim nec salem, nec Mercurium ex auro, Helmontius nullum sulphur è silice ac arenâ elici posse affirmant; Et tamen ambo omnium corporum naturalium tria statuunt principia, ultima omnino ac simplicia, quæ tamen idem Helmontius alio loco refert, se in meram elementarem aquam seu phlegma convertisse. Sed ad artem, inter quam Et inter naturam Adversarij lineis ubique parallelis incedunt, revertamur. Si statua alicujus vel imaginis partes resolvantur, an non pars illarum formalis perit, nempe certa marmoris aut colorum figura Et dispositio? insuper cur unguenta, postquam exspirârunt, medicas vires deperdunt, piper verò Et saccharum in minimas partes resoluta, illud quidem igneum quasi aculeum, hoc verò dulcem saporem retinet, nisi quia unguentum è corpusculis diversas formas habentibus confectum avulsis vel corruptis iisdem formis enervatur; piperis verò Et sacchari formæ contrariis qualitatibus magis resistunt, ac proprias tenacius conservant?

Abrumpo, ne Atomistæ fateri cogantur, quod vel audire molestissimum habent; scilicet illorum argumentandi modum ad permittendum casualem plantarum omnium, quin universi totius exortum contra fidei ac rationis dictamina disponere; divinitatis ex Mundi perfectione ac Symmetriâ demonstrationem labefactare, ac animæ vegetativæ præsentiam in Sacerrimo Altaris mysterio, ubi omnes Dominici Corporis partes compenetrantur, agrè admodum salvare; denique differentiam tantum accidentalem, qualis est vini puri à vino diluto, inter plantas omnes introducere, atque continuo aliquarum partium fluxu, quæ combinationem vegetabilium constituunt, etiam hæc essentialiter singulis propè momentis immutare. Satis sit, incompositas atomos in ipso jam semine suffocasse, utpote quod in se minimum, integram tamen arbo-rem seu plantam virtute continens, vitale simul natura vegetativæ principium à compage elementorum indubitanter distingui manifestat.



CAPUT



CAPUT QUARTUM.
DISSERTATIO ACADEMICA
DE
NOVIS CIRCA INANI-
MATAS SUBSTANTIAS
EXPERIMENTIS.



Italibus Naturæ finibus egressi, ab Hieronymo Cardano ad eosdem remittimur; Magnetem animatum esse, ac ferro tanquam pabulo vesci, si Julio Scaligero credimus, asserente. Sed fuerit sanè ab hoc errore nondum immune Sæculum decimum sextum, cujus sexaginta quinque annis Medicus ille ac Astrologus non tam Mediolani celeberrimus vixit, quàm cunctorum, ut ipse sibi in Epitaphio adscribi voluit, *illustris docta perora Virum*. Fuerit tunc Magnes cognominatus Philosophorum labyrinthus ac impenetrabilis ingeniorum abyssus. At feliciore, quod effluxit, Sæculo lapis ille unionibus ac gemmis meritò æquiparandus, in mirabilium, spectaculorum officinam ac ingeniorum cotem à Philosophiâ conversus est, dum, inanimatus licèt, jam Geographum ac Geometram agere in peruestigandâ locorum longitudine & distantia, jam Astronomum in dimetiendo Stellarum situ, jam Gnomonicum in designando diei ac noctis tempore addidit; ubi tacebo, vires illius, dum ferro, quasi chalybeâ vestitus casside aut velut clypeo armatus fuit, stupendum in modum excrevisse, ut patefecit Magnes Lugdunensis quinque tantum, librarum pondere, capax tamen appensum cataphractum hominem,

retinendi; subscribente P. Schotto in Magiâ suâ Magneticâ. Præteribo insuper eruditissimas magneticæ declinationis in toto Orbe Tabulas, quibus Philosophia ad integrarum classium gubernacula sedet, suspiratum littus in medio mari acu tangens, dum immota pyxidis nauticæ spectatrix solo quasi nutu ac indice digito navalem machinam promovet.

Verùm ut ordine de mixtis vitæ expertibus differamus, atque à nobilissimo gemmarum partu exordiamur, necesse ampliùs non est, illud ingenui, candidique animi verbum: *nescio*, reponere, memorati priùs Scaligeri exemplo, cùm interrogatus aliquando fuisset, num hirci sanguine rumpatur Adamas? siquidem P. Franciscus de Lanis tom. 2. Magist. Nat. & Art. l. 4. c. 1. ex Doctore Grandi refert, oleum falsifrafi & aquam Mercurij adamantes in aquam resolvere, cui recentior ibidem modus subnectitur, quo crystallus rupea in fluidum, auri verò metallum in liquorem potabilem mutari possit, & quidem ita, ut, quod Philosophi communiter hætenus impossibile opinabantur, à naturali calore, mediante acido stomachi fermento, digeri valeat, neque tantùm sit, juxta antiquorum adagium, *in Medici pretium*, sed etiam *in agroti remedium*. Atque ad hoc ipsum princeps metallum deflectendo, quàm insolita est auri fulminantis experientia, quod aliquando casu cum plurium alembicorum strage inventum, modò singulari artis ingenio in aquâ Regali solutum, & modicissimâ portione olei ex Tartaro confecti perfusum, si novâ methodo siccetur & accendatur, non tantùm fragorem horrifonum edit, sed durissima etiam corpora fulminis in morem perfringit.

Ad succos etiam & liquores quod attinet; naphta bituminis genus, quod veteres spargebant solo ignis intuitu accendi, jam pingues fumos spargere notatum est, horum verò flammæ proximum ab igne corripì, sicut extincta candela adhuc fumans tacto alterius candelæ fumo iterum inflammatur; vini autem pretiosissimum liquorem notavit Gassendus, quem

DE SUBSTANTIIS INANIMATIS. 27

quem supra meminimus, inter Philosophorum antiqua systemata Epicuræum selegisse, eo intra cellas turbare tempore, quo vites in flore ac statu amoenissimo versantur; Kenelmus pariter Digbæus in Angliâ advertit, diversa ibi vinorum genera ex Insulis Canariis, Hispaniâ, & Aquitaniâ advehi solita citius, tardiusve fervere, prout vites in quavis illarum regionum celerius vel ferius efflorescunt. Restant salium ac lapidum genera, in quorum primo maximè celebrandus venit Sal Saturni ex tenuibus plumbi laminis confectus, ac sacchari dulcedinem exhibens, unde sic appellatum *Magisterium Saturni* ad plurium ægritudinum medelam præterlapso Sæculo elicitum fuit. Inter lapides deniq; eminet ille in Serpentum Indicorum, qui capillati vocantur, capitibus eadem ætate repertus, qui è virulentis plagis toxicum, ab ejusmodi serpentibus cum morfu instillatum, avidissimè totum ebibit, ut Kircherus in Chinâ illustratâ testatur. Nec minùs celebres sunt agri Bononiensis lapides, qui Phosphori dicuntur, seu magnetes luminis, cujus radios aliquando imbibitos, velut è dilatato scrinio medias inter tenebras evibrant, præsertim si ab aliquo præstantium Artificum, quorum prius Sæculum ferax fuit, elaborentur.

Plures in singulis talium mixtorum classibus admirandos effectus subsequens Discursus dabit, ubi præterea genuinam eorum causam insinuabimus, ne illi Peripateticorum Antagonistæ, qui plus à se negari, quàm ab alijs probari posse confidunt, ansam imposterum habeant contra Aristotelis Scholam obganniendi, quòd hæc candidum veritatis vultum fictæ cujusdam qualitatis larvâ dehonestet, atque à luce ad inscitiae latibula confugiens, intellectum humanum læto virtutis occultæ somnio, ut Verulamius inquit, à vigili causæ indagandæ studio ignominiosè avertat; verbo, ut malevoli Novatores unamini voce criminantur, in secretiore Philosophiâ nihil uspiam reperiri, quod ab Aristotelicis cum fructu quærat.

DISCURSUS PERIPATETICUS DE ARCANIS MIXTORUM EFFECTIBUS.

Vniuersam Aristotelis philosophandi methodum intimè speculatus, ad tria illam capita reduci posse deprehendet, quorum primum est hausta ab externis sensibus materialis rerum particularium cognitio, cum juxta Stagyræ apophthegma nihil intrare possit in mentem, nisi per externos sensus introductum, à quâ ipsâ tamen notitiâ Intellectus humanus ad generales & à materiâ abstractas cognitiones, quæ propriè Scientiam pariunt, quasi gradatim ascendit. Alterum caput, quod ex Philosopho D. Augustinus viam Scientiæ appellat, situm est in transitu à mobili ad movens seu ab effectibus ad causas, cujus viæ quasi semitam ipse jam Aristoteles stravit in decem suis Prædicamentis, initio à substantiâ deducto. Sed quoniam tota uniuersalium rerum cognitio ex particularium notitiâ enascens sensibus errori subiectis innititur, hinc Philosophorum Princeps ad stabiliendum illud Scientiæ fundamentum inventâ à se machinâ usus est, Syllogistico scilicet rationis discursu, ut hujus inextinguibili robore verior quæstionis controversa pars ex idoneis præmissis ritè inferri posset.

Nilominus, quamquam hæc Peripatetica Methodi principia in communibus, seu manifestis, ut vocari solent, mixtorum effectibus haud ægrè progrediantur; si tamen arcana illorum operationes, id est, magnetica, sympathica ac medicinales, aliæque huc pertinentes dijudicanda sint; ibi enim verò nec intellectus insuetam agentium virtutem à sensibus perceptam in numerum & ordinem cogere, neque congruas illarum causas reperire nec denique Discursus acie ancipitem potest difficultatem rescindere, cum ex unâ parte præscripta rebus naturalibus certa activitatis sphaera, ac inditus Vacui horror; obstacula insuper, quæ vim effectricem aut debilitant, aut interrumpunt, actionem in distans sine miraculo neutiquam admittant; ex alterâ verò parte multæ centuriæ effectuum occurrant, ubi movens nec suppositi sui substantiâ passo proximè assistit, neque præsentiam vicariâ sui virtute per medium propagatâ supplere animadvertitur. Visa est tam erudita, quàm difficilis materia singularem Discursum

DISCURSUS DE ARCANIS EFFECT. 29

exposcere, cujus proinde beneficio, post ambiguam sensuum experientiam ad generales tres Assertiones reductam, arcanas quoque mixtorum vires non minus alijs passim cognitae manifestas fore confidimus.

Prima igitur Assertio sit: corpora si non omnia, saltem pleraque, & potissima constanter e poris transpirant aliquod integrantium sui particularum effluuium, quod subinde celerrimè, subinde in magnum spatium diffunditur; communiter etiam primigenijs suis affectionibus diuturno spatio imbutum, solidis aut fluidis substantijs adheret, vel cum iisdem permiscetur. Elucet tripartita hujus propositionis veritas e multiformibus poris in corporum naturalium compage apparentibus; nempe abscissis, ut nominari solent, seu interruptis intra substantias inanimatas; ramosis verò intra vegetabiles; ac ramosis simul & cellulatis intra sensitivas. Cui enim bono tot viae essent ac tramites? cur natura unionis continuativae vinculum, quod alias omnibus armis defendit, nugatorie ubivis intercidisset, si nec libera commeantium corpusculorum negotiatio bipatentem terram, marique aditum & egressum postulasset, neque computrescenti antiquo aëri, ut contagiosam tunc habitaculum suum non corrumpere, recentem semper auram subrogare oportuisset? deinde cur ignis censeretur praeipuum Chymicae officinae instrumentum, nisi illius ope corpuscula a mixtis facile resolverentur, ac fumo immixta quaquaversum discederent? porro celeritas, quam talia effluvia disseminantur, patet praesertim ex obstupescendis fulminum ac Pestis effectibus, ut alias experientias taceam, quas P. Franc. de Lanis, dubias cum certis confundens, in suo Magisterio Naturae & Artis late accumulavit. Nulli siquidem alteri causae imputari possunt marmora in pulverem ictu oculi redacta, gladii vaginam integram, aurei nummi inviolato marsupio liquescentes, ossa sine carnis vulnere, medullae arborum intacto cortice, vinum indemni dolio, foetus salvam matrem quasi momento consumpti, quam nitrosa ac sulphurea exhalationi summo impetu commota, atque, ut fulgur ab Ortum in Occasum velocissimè discurret, laxiora corpora brevissimo tempore transeunti, durioribus verò stragem & cladem inferenti.

Præterea quis non aliquando legit, pestem e cryptis venenatorum mineralium feracibus exortam, ubi dum violenta terrae conquassatio subterranea hujusmodi claustra ac paludes, ut vocantur, Charonticas succussit; erumpentes inde halitus initio plantarum radices infecerunt, mox cum terrae frugibus recepti, subito in ima hominum praecordia grassati, ac totis artibus diffusi fatalia symptomata integris Provin-

cijſ induxerunt; ex quâ ipſâ effluviſ celeritate ſimul elucet eorundem ad maximam diſtantiâ propagatio; ut enim hîc nihil repetam de aëreo fulmine, aut de terreſtri, ſeu bellico tormento ad ingentes locorum tractus virtutem ſuam exporrigentibus; nihil de cadaverum poſt commiſſa prælia odore (quem univerſim cum reſolutis corporum ſpiritibus propagari complures docent) ad quingenta milliaria, ut Doct̃or Angelicus refert, diſfuſo, ac vultures è peregrinis regionibus ad pinguem rapinam alliciente; id tantum in memoriam revoco, quod Baronius tom. 1. Annal. Eccleſiaſt. ex Auðtoribus fide dignis recenset, montem ſcilicet Veſuvium regnante Tito Veſpaſiani filio tam horriſicis ignibus efflagraſſe, ut cinis exinde deferveſcens in Syriam & Egyptum venti impetu tranſvolârit, poſtquam Roma, afflicta Campania adhuc ignara, Solem ab illo obſcuratum attonita ſuſpexit; quanto igitur majore curſu abripi credenda ſunt effluvia, quæ ſicut viſum ſubtilitate ſuâ effugiunt, ita minimo propè flatu in diſſitas oras facile tranſportantur.

Deniq; emanantia è mixtis corpuscula ſuis quoq; proprietatibus tenaciter affici tam nature, quàm artis opera commonſtrant: illa quidem, dum aqueos vapores in humida, terreſtrium verò halituum maſſam in ſicca Meteora perenni viciffitudine reſolvit; hæc verò dum per chymicam diſtillationem varios quidem ſales ac ſpiritus è corporibus elicit, qui tamen originis ſuæ qualitates etiam poſt ignis & aquæ fortis tormentum obſtinatè nutriunt; id, quod etiam tot hiftoria confirmant, quotquot aëris infectionem jam à Chirurgico inſtrumento, quod peſtis tempore venenatis ulceribus medebatur, poſt multos annos ad uſum reſumpto; jam ab aranearum telâ ingredientes in domum, quæ ob homines ex lue contagioſâ ibidem defunctos diu priùs occluſa remanſerat, primo ſui attactu enecante ortam fuiſſe teſtantur, ut Foreſtus accuratè notavit.

Ad ſecundam itaq; altioris moliminis Aſſertionem tranſeamus: Dantur occultæ illæ qualitates, quas Adverſarij nec dignantur juſtis armis impetere, ſed toto Democriti riſu obruere contendunt, explodendi magis ipſi, dum nominis ac rei quæſtiones diſtinguere vel non poſſunt, aut negligunt. Ubi igitur eſt bicornis illorum argumentatio, quâ hujusmodi qualitates vel occultas non eſſe declamant, ſi à Peripateticis ſciantur in rerum naturâ paſſim exiſtere; aut ſi rei veritate occultæ ſint, ac omnem Scientiam ſubterfugiant, quo jure illas Peripatetici municipio, & quidem ampliffimo, in hac Univerſi Republicâ gaudere prætendunt? ſcilicet, ut tales plus quàm Pythagorico ſilentio occultande
enti-

entitates aperta sint inscitia asyla, rudium in palastrâ litterariâ pugilum clypei, ac Philosophici pallioli, quod solos humeros oneri difficultatis impares tegit, probrosa lacinia. Sed morem tantisper Adversarijs geramus, & à qualitatibus occultarum nomine abstinentes, easdem vel specificam hujus aut alterius mixti facultatem, utpote ab illorum formâ nascentem, ac primas qualitates celeritate & magnitudine effectuum superantem compellemus; vel, usitatis etiam titulis, magneticam, electricam, aut sympathicam virtutem. An forte id non licebit Epaminonda, si licuit Themistocli nova cathartica, diuretica, narcotica ac cardiaca qualitatibus nomina in precipuis liberalium Artium emporiis divendere? Deinde effare, qualitatibus occultarum Zoile, unde manifestas qualitates, nempe siccitatem, calorem, frigus, humiditatem deducas, nisi quod primam & ultimam alieno termino facile aut difficulter circumscribi, secundam verò & tertiam diversa corpuscula dissipare vel colligere per constantem experientiam deprehendas? praterea doce nos, quo proprio nomine forma lapidis compellanda sit; cur leo animal rugibile, canis verò latrabile definiatur, cum neutrum eorum princeps predicatum sit, ex quo ipsa rugiendi ac latrandi potestas derivatur? ubi denuò anteriorem illius radicem occultam esse, atq; solum rugitus vel latratus effectum patere fatendum est; & quid sunt occulta, quas hic asserimus, qualitates, nisi quæ sensum, non tamen rationem latent, atq; in effectum quidem prodeunt, anonymæ tamen sunt, ac certo suæ virtutis titulo nondum insignitæ?

Porro tales occultas qualitates in Universo reperiri, sola ignorare potest, quam præcedente Discursu inspectatus sum, mechanica illa Philosophia, quæ concedere solet nihil, nisi quod utraq; manu prius tetigerit, atq; in tessellatas, cylindricas, aut conicas atomos quasi ascia-verit; ibi nescio quos à longè petitos vortices, hic moleculas, alibi grumos, aut nodos ad opificij sui constructionem interponens. Huic proinde novissimæ Philosophiæ unicum oppono Herculeum lapidem, seu magnetem ita dictum, ut Conimbricenses tradunt, quod domitricem rerum omnium materiam sibi obsequentem reddat, ferri scilicet metallum, à magnete potenter attractum, ac velut tenaci glutine ita retentum, ut in medio etiam aëre pendulum Spectatores pariter admiratione suspendat. An hic Adversarij more suo ad poros se convertent, quos illi profectò majori jure nimis suæ Sapientiæ latebras, vel ignorantia potius asylum appellarent? at jam parte I. hujus Operis c. IV. eorummet testimonio ostendimus, raros esse ferreo metallo poros, ac illos insuper tam scabrosos, ut magnetica atomi sagittularum vel

acuum instar ad ferri rapinam, nescio quibus Atomistarum uncinis & forcipulis attracta, vel metallum non penetrarent, quod tamen intimis partibus adfrictam sibi virtutem imbibere consuevit, cum limam etiam abrasum tractivam tamen facultatem per plures annos retineat; vel certe, si magnetica corpuscula totam ferri profunditatem violentè pervaderent, ipse magnes post exertas sapius vires sensibile molis ac ponderis decrementum pateretur, sicut ob similem causam succinum, camphoram, & aromata omnia deficere advertimus; imò sicut ipse magnes juxta Adversarios, superingestis ignitis carbonibus, impotens, seu, ut Physiologi loquuntur, ebrius redditur; quia nimirum flamma subtiliores magnetis atomos vel obtusas reddit, vel in latera dissipat.

Præterea occultas qualitates ab Astris quoque in Sublunarem hunc Mundum perpetuò diffundi, occultum non est in auro, ad quod efficiendum Solaris Sphæra applicari non potest, nisi per specificam à se promanantem qualitatem, cum neque lux, nec calor profundas terræ mineras penetrare soleant, ut superius P. I. c. III. probavimus; item occultum non est in aestu Maris, conchylium, & cancrorum incrementis, febrium, quasi stabili lege, paroxysmis, qui alijs, similes effectus cum Luna augentur, & cum eadem rursus evanescent, ut pluribus P. II. c. II. ostendimus: Lunaris siquidem splendor, cum totus à Sole derivetur, vim adeò specialem è minore Planetâ trahere non valeret; sola verò humiditas, quæ parùm activa est, neque tot turbis amicis sibi aquæ marinæ subiectum involveret, tanquam cui aliàs Philosophi homogeneam humiditatem in summo vel saltem excellenti gradu attribuunt; neque egrotos in alternis, jam febrilis ardoris, jam frigoris, accessibus eodem semper morbi augmento vel decremento afficeret.

Denique occultum non est in stupendis plantarum ac nascentium, inde medicamentorum viribus, quas à primis qualitatibus distingui partim ex hoc colligitur, quòd illæ in diversissimi temperamenti animalibus parem ferme effectum producant, ut Betonica capiti, & Asparagus jecori medendo, hyosciamus verò ejusdem capitis & mezeraon jecoris interitum moliendo; partim quia imperceptibile videtur, calorem cum inimico sibi frigore, humiditatem cum hoste suo, siccitate, modo qualicunq; permixtas, tam miris ac nunquam sufficienter exploratis prerogativis donari, atque in umbra fraxini serpentes omnis generis fugare, ita ut si arbor illa igne circumdetur, serpentes citius ad flammam, quàm umbram prorepant; lethalem arundinem

dinem è cervorum plagâ evellere in dictamno, vermes in myrrhâ interimere, ebrietatem in lolio, in opio lethalem somnum conciliare; quod ipsum intelligi debet de gemmis, ut sapphiro februm ardore, jaspide sanguinis fluxum, ac pretioso corallij frutice stomachi ex atrabile dolorem temperante.

Sit ergo tertia Assertio: Sympathia, quam Cicero convenientiam natura, & Antipathia, quam Plinius rerum discordiam vocârunt, nihil sunt aliud, quàm illa quidem consensus secundum operationes ac proprietates, quo sibi corpora naturalia mutuò succurrunt ad debitas essentia suâ perfectiones facilius adipiscendas, aut firmitus possidendas. Antipathia verò est repugnantia rerum ob proprietates ac operationes, quibus illæ sibi vicissim impedimento sunt, ne debitis perfectionibus potiri, aut diu gaudere permittantur, ut adeò utraq; nil aliud significet, quàm absolutas substantiarum affectiones, cum addito tamen respectu, quo unius & alterius rei prædicata comparamus, & ita inferimus, vel eas mutuo fœdere devinciri & quodam velut connubio sociari, vel tacito inter se odio dissidere, cœcisq; laborare discordijs. Hinc, ut exemplo à manifestis iterum qualitatibus desumpto arcanas mixtorum vires declarem; quid aquam cum igne irreconciliabili antipathiâ collidit, nisi contrarius caloris appetitus vel horror? quid ex opposito causæ subest, cur floreat Virgilio teste Eclog. 7.

Fraxinus in sylvis pulcherrima, pinus in hortis,

Populus in fluvijs, abies in montibus altis.

nisi quia arbores illæ cum loco humido, vel sicco, aut utrinq; temperato sympathiam habent, tanquam ibi symbolam naturæ suæ stationem reperientes? Haud aliter, quæ ratio esse potest, cur leo ad galli cantum, elephas ad grunnitum porcelli trepidet? cur aranea cum bufone, cum testudine simia, taurus cum ficu singularem foveant inimicitiam? cur integris certorum stemmatum Familiis sudorem ac deliquium exprimat felis etiam non aspecta, nauseam verò sapidissimi aliàs cibi, ac vinum merè olfactum procreet, nisi quia in primis casibus molesta auditivo organo aëris vibratio repentino suo allapsu timoris affectum excitat; sicut Musicam in ipsis variæ sortis liquoribus intra totidem vitra mensæ impositis diversam pariter commotionem exhibere, aliam scilicet in aquâ vitæ, aliam in oleo, vino, & aquâ simplici, multorum experientia patefecit. Ad secundi verò generis effectus quod attinet, illos meritò Peripatetici cum suo Principe, à

paratâ vicissim noxâ, subtracto pabulo, inimicis corpusculorum vel qualitatum effluvijs deducunt. Nam quâ alia ex radice pullulare possit, quod lacerta hominis præsentia gaudeat, philanthropus sit Delphinus, pavo cum columbâ, cum turdo merula, cum serpente vulpes amicè habitent, quo tamen penè conspecto, homines palleſcunt, ac palpitant, utrum verò gerentes partum abortu vitiant? tertiâ demum classis affectiones in gravidarum vel parturientium matrum, imaginativam vim non incongruè referuntur, unde matres ex Æthiopis occurſu nigredinem; frugum signacula, quarum esu abſtinere cogebantur; squamas piscium, aut plumas volucrum, quas fixis oculis usurparunt, infantibus impressisse leguntur; nisi malueris ejusmodi effectus vitioso humori in corpore alicubi stabulanti cum alijs Philoſophis aſcribere. Saltem hinc conſequitur, sub arcanis uni-verſæ Sympathia ac Antipathia nominibus ipsam tantum nature vim, quasi è pellucido ſipario promicare.

Post stabilitas tres Discursus hujus Assertiones supervacaneum ampliùs foret, easdem arcanis mixtorum actionibus sigillatim applicare. Proferantur itaq; inprimis amicitia & amoris naturalis symbola in magnete, electro, mastiche, cerâ sigillari, Helio- & Seleno-tropicis floribus, virgis columnis ad aurum, ut vulgi ſensus eſt, se inclinantibus, ac Indicis lapillis venenum ex angujum morſu ſugentibus. Addantur deinde odij pariter & inimicitia exempla in ove lupum nec viſum, columbâ accipitrem, fele canem, pullo milvum fugiente; in Australi magnetis polo Septentrionalem oppoſitum magnis conatibus ad se alliciente, ac obtentum arctè complexo, ſimilem verò polum, tanquam inimicum à se repellente; in tauro ac elephante à rubri coloris panno in rabiem acto, cadavere ad ſicarj præſentiam ſudante ſanguinem, mustelâ verò in bufonis fauces cum ejulatu irruente. Dinumerentur inſuper Sympathia in gemellis eodem tempore, non loco agrotantibus, in homotonis unius monochordi impulſi & alterius intacti fidibus ad intervallum, quod Muſici δια πاصων vocant, attemperatis, ac ceraſi ſpecie, quam embryo in matris utero contraxit, rubefcente, ut ceraſa in arboribus ſolent; vel Antipathia oſtenta in pelle agninâ tympani obmutefcente, dum lupina reſonat, aut cervinâ ſupra bubulas è fundo coriaria cupâ enitente, ac offiſrago gramine robustiſſimos quosq; enervante. Tandem non omittantur Baſiliſci, torpedines, remora & piſcatrices rana, philtra, ligatura, ac amuleta; Chymica & Galenica medicina, venena ex Stellionis rabie, ſudore cervi, felis cerebro, Tarantulâ morſu, ac tauri felle collecta;
item

item antidota ex bufonibus arefactis, antimonij regulo, ac fixo arsenico emergentia; non, inquam, hæc omnia omittantur, arcana quidem, sed propter quæ necesse non est, naturam cum Fernelio incusare, quasi illa voluisset nos ejusmodi res mirari, scire noluisse; cum ex triplici deductâ hætenus Assertionem naturalis causa singulis pro diversa ratione applicanda latere possit neminem, nisi quis perpensis illis adhuc ignorare se fateretur, cur oscitante altero & ipse oscitet.

Supereft tantum, non excussis minutim cæteris, quibus omnes propè Philosophorum libri scatent, nostra de pulvere Sympathico ac unguento magnetico crisis, quorum utrumq; novis vulnerum curationibus priori sæculo inclaruisse Medici ac Philosophi non pauci affirmant. Verum quod illud unguentum attinet, id in tribunali Peripatetico superstitionis damnare non dubitamus. Nam si ve illius materiam contempler, quæ ex usneâ, seu musco innascente cranio cadaveris insepulti, item ex sanguine concreto Mumia, seu corporis Aegyptiaci varijs aromatibus conditi, atque cruore hominis adhuc calido coagulari debet; seu subjectum, quod unguento illini jubetur, ferrum videlicet, aut ramum salignum in aperto vulnere madefactum; si ve medendi modum considerem, nempe in puncturis, ut loquuntur, gladium à cuspide versus caput, in cæsuris verò ab acie versus tergum inungendo; an non primum pollincturis sagarum, ac Magica in alieno corpore phlebotomia consonat? alterum etiam de tacito cum Styge commercio jure suspectum est. Cur enim, deficiente gladio, non inungenda potius foret vagina, cui tanquam coriacea unguentum magis conducere? vel cur non lapides, vulnerati cruore madidos, ensi vel telo substituere liceret? tertium deniq; nigram Chirurgiam sapit, ut obligatus sella tripodis pes ad opitulandum sauciatis ovibus ac similes superstitiones, quarum elenchum P. II. c. III. adduximus. Prasertim cum ex arbitrio allinentis pendeat, utra pars in ramo saligno, qui ferri loco adbibetur, inferior sit, an superior? aut profecto, si quis emplastrum tale magneticum ab omni voluerit pacti prohibiti notâ liberare, profiteri debebit, illud secundum se, neq; mederi, nec obesse; sed solam, quæ tunc imperatur, in fovendo, repurgando & siccando vulnere solertem curam infirmos sanare; in quantum scilicet impedimenta, ne plagæ consolidari possint, hoc modo remonentur, nimirum pus & externa aëris injuriæ; sicut ursi, dum crebriore linctu inflicta vulnera emundant, absq; unguentarijs hisce Medicis pristinam integritatem recuperant.

36 DISCURSUS DE ARCANIS EFFECT.

Aliter se habet pulvis Sympathicus, quo si pannus aliquis vulnerati sanguine imbutus conspergatur; quare impossibile sit, subtiliores Vitrioli spiritus, qui ad calorem Solis excocti medicinam illam componunt, ad agrum usque propagari, cum aliàs experientia doceat, medicinas omnes resolutis purioribus sui particulis omnem simul efficaciam deperdere, cum illis verò salutiferum vigorem instillare. Insuper cur iidem spiritus imbibi nequeant à vulnere, in quo stagnat vel ebullit sanguis equali prorsus temperie præditus, quam habet cruor cum pulvere commixtus, ut adeò ille non difficulter intelligatur, ad corpus remigrare, cujus antea pars integralis extiterat, & à quo fortius, quàm reliquis circumstantibus Mixtis attrahitur, ipsâ subsidiarij velat sanguinis indigentia vires acuite? Tandem cur distantia non adeò magna vel sanitatis reductæ celeritas obsistat, cum teneriorum corpusculorum effluvia in longinquum deferri, ac sine morâ operari, præsentè Discursu jam probaverimus. Ubi tamen adverto, nullam hîc Actionem in Distans intercedere, sed volatiles efficacis Vitrioli partes malè affecto membro novâ inventionè applicari.

Lubet itaq, cum Senecâ rursus exclamare, qui arcanorum naturæ effectuum causas diu speculatus, seipsum ita interrogavit: quod erit pretium operæ? atq, mox sibi reposuit: quo nullum majus est, nôsse naturam. Neque enim quicquam habet in se hujus materiæ tractatio pulchrius, cum multa habeat futura usui, quàm quòd homines magnificentia suâ detinet; nec mercede, sed miraculo colitur.



CAPUT



CAPUT QUINTUM.
DISSERTATIO ACADEMICA
DE
NOVIS CIRCA MONSTRA
EXPERIMENTIS.



Monstra, quæ Philosophus quasi prævaricationes & peccata naturæ vocavit, in singulare etiam aurei nostri Sæculi ornamentum cedunt; partim, cum Philosophia illorum ope communi hominum curiositati rara quæque expectanti satisfaciat; unde degeneres hujusmodi Substantiæ, tanquam dignæ, quæ monstrantur, vel quod ipsæ futurum aliquid altioris consilij ordine demonstrent, nomen Monstri hauserunt; partim quia jam olim consuetudo fuit, Viris in supremo honorum apice positis monstra grati muneris loco offerre, sicut India Augusto Cæsari adolescentem sine humeris, tubas tamen infantem, sagittas ex arcu vibrantem ac omnia manuum officia pedibus obeuntem, Antiochia verò Constantino Magno Imperatori Faunum seu hominem Sylvestrem obtulit; admiratione scilicet insoliti foetus pretium ac voluptatem majorem conciliante, quàm obviæ semper elegantiae afferre consueverint. Non tamen animus est, omnes Monstrorum classes pervagari, cum cœlestia in Cometis, ignea autem & aërea magis sublimia in Phœnomenis utriusque illius elementi Parte secundâ hujus Operis jam prosecuti fuerimus. Restant solummodò

memoratu digniora, quæ vel vicinior nobis æris regio, vel aqua, & terra genuere.

Ab ultimâ igitur inchoando, author est P. Ruiz in ipso Sæculi, quod semper celebramus, limine repertam esse in Peruviâ integram, Pumilonum Provinciam, quales alij à staturæ brevitate spithamæos, alij à cavernis, quas subire solent, Troglodytas cognominant. Subinde A. M. DC. XXI. natus est in urbe Aquitaniæ, quam vulgus Bajonam dicit, Infans cæteris membris bene compositus, multis tamen oculis per totum corpus apparentibus, quot nec Argus prætulit, nec pavo in superbo suo syrmate explicat. Septem annis postea Olyssipone editus est mirabilior adhuc Infans, nempe armati similitudinem exhibens; variæ enim carnis & cutis appendices ac figuræ militarem, illum habitum repræsentaverant, ut nec ocreæ, neque galea deesset. Ab homine ad bruta terrestria & plantas transeo, ubi præcipuè bellua vitulino corpore ac cervinis pedibus Romæ A. M. DC. LIV. circumlata, & arbor pyrus fructum notabilis magnitudinis humanâ facie insignitum enixa, Stutgardiæ A. M. DC. XXXXIV. Serenissimos etiam oculos in se convertit.

Nec Aqua prodigijs caruit; in flumine enim Vistulâ Anno M. DC. XXIII. captus fuit piscis, caput instar hominis carneum, ostentans, caudam verò à dorso projectam instar draconis; uno item pede Aquilam, altero leonem imitatus. Ante quatuordecim etiam annos, priusquam hostilis irruptio Rheni accolæ deprædaretur, fera pisciformis Coloniâ Basileam usque adverso flumine cum terribili strepitu, quasi præsentis belli classico, natavit. In aëre pariter enarrandum venit illud volucris monstrum, quod Mercurius Germanicus Valentini Pistoris ad annum M. DC. XXVIII. in Hispaniâ glande rejectum perhibet, in fronte scilicet oculo humano, capite ac mugitu bovino, caudâ in duos velut enses dissectâ ac pectore loricato spectabile.

Sed

Sed ipsa Lycosthenis monstra numero ac varietate superarem, si præsertim petrefactos in cervorum stomachis serpentes, vel in matrum utero sobolem, aut recens effossos Gigantum dentes, atque eruta ossa, aliosque monstrosos eventus hîc describere pergerem. Sufficiat ad ultimæ Dissertationis coronidem, ac aurei nostri Sæculi illustrissimas laudes, Philosophiam in monstis tum graphicè depingendis, tum ad effectiva principia superiùs capite II. hujus Partis allata revocandis suæ Scientiæ, ubi natura ipsa à præfixo, ut videtur, scopo deviavit, pulcherrimum specimen reliquisse.



DISCURSUS PERIPATETICUS DE HARMONIA UNI- VERSI.



Monstris, quæ Universi elegantiam, ordinem, & Harmoniam turbare videntur, ad demonstrandam singularum ac omnium spectabilis hujus Mundi partium pulcherrimam inter se proportionem transgredimur, partim, ut quæ hætenus à Naturæ thesauris deprompsimus, hic velut unum sub aspectum proponamus; partim ut publicè testemur, haud aliam fuisse triennalis nostri Cursus Peripatetici metam, quàm perfectionis Divinæ à creaturis ad imperata sibi munia adeò unanimiter consentientibus notitiam, debito ejusdem cultu & amore prosequendam.

Proposita igitur Harmonia veritatem ex Optimo, Maximo illius Authore inprimis deducimus. DEUS is est, Sapientiâ infinitâ pollens; unde cæco modo, & quasi nesciens, quid agat, operari non potuit, sed aliquem sibi finem necessario præfixit. Jam quæro, an Universi Conditor hunc ipsum finem assequi vel nequiverit, vel noluerit? si posterius reponas, levitatis arguis immutabilem voluntatem, quasi illa à decreto suo nauseabunda resiliisset. Si verò prius respondeas, ideæ aut effectricis potentiæ defectum Omnipotenti affingis. Quod si voluntatem, ideam, & operatricem manum ad finem illum, quem DEO placuit inter majores semper in infinitum possibles Gloriæ suæ manifestationes eligere, assequendum conspirasse fatearis, perfectæ inde Communitatum naturalium Harmonia consequitur, utpote quæ supremus Molitor rerum ad destinatam Gloriæ suæ mensuram non magis sapienter, quàm efficaciter adaptavit.

Præterea ejusdem Harmoniæ veritatem ex illis quasi vocibus elicimus, quæ in Universi Musicâ, tanquam ad omnes concentuum numeros compositæ nullius non judicio celebrantur. Atq; ut substantias spirituales completas altiori foro relinquamus, quæ DEO dignum famulitium, ad deferenda Numinis mandata & exequenda promptitudine maximâ instructum; Sideribus Motores creatos intellectuales extrinsecus assistentes; humana Reipublica beneficos variorum in
Sub-

DISCURSUS DE HARMONIA UNIV. 41

Sublunaria influxuum, dispensatores ; Universo denique illum gradum entis suppeditant, quod totam Mundi perfectionem simul comprehendens, debitis exinde laudibus in Creatorem potest assurgere, ne aliàs linea saltem aliqua pulcherrimæ illius picturæ nulli spectatori, aut suavissimæ musicæ particula nulli Auditori proponatur.

De Homine potissimum mens est discurrere, in quem sicut omnia quinq; Creationis dierum opera, velut in compendium, sexta die redacta fuerunt, ita ille consummatâ partium suarum proportionem totius Universi Harmoniam in se uno satis demonstrat, cui proinde DEUS, ut Artificum Principes in nobilioribus artefactis solent, imaginem suam adeò impressit, ut animæ rationali impossibile sit, seipsam contemplari, quin Authoris sui splendore perfundatur. Quapropter non considero sensitivam facultatem in homine præstantissimam, cum cætera animalia, quamvis visu, exempli gratiâ, lynceo dotata, visionem tamen ad perfectam objecti spectabilis cognitionem ordinare non valeant, dum interea homo simul videt, & animadvertit, quod videt, nec objectum magis, quàm ipsam potentia visivæ officinam speculando pervadit. Non etiam hîc admiror tria pretiosissima Mortalium dona; ingenium scilicet, quod intelligendo fit quodammodo omnia; linguam & vocem, quæ non tantum passionnes latentes prodit, sed etiam recondita mentis interpretis est; ac manus, quæ dum aliarum rerum mensuras & corporum anatomiam instituunt, ipsæ majus his omnibus spectaculum præbent, tanquam universalia Artium ac rerum omnium agendarum instrumenta. Neque pluribus depingo humanam faciem, in quâ duo maxime stupenda occurrunt, nempe in tam parvo spatio ac inter partes non multum dissimiles tanta & tam constans in immenso propè hominum numero diversitas, ita, ut Plinius & Solinus illos Juvenes monstris annumeraverint, qui Marco Antonio Triumviro oblatis, dulcem suis etiam parentibus errorem aspectus similitudine attulissent, quamvis unus in Europâ & alter in Asiâ progenitus fuerit. Quorum tamen ipsorum facies altero naturæ prodigio, ideò tantum minùs celebri, quia quotidiano, discrepabant, affectuum scilicet in vultu, tanquam theatro, ludentium diversitate, quæ illum majestatis thronum, gaudij sedem, amicitie magnetem constituit, minimæ tamen partis damno, ut rasis supercilijs, adeò notabiliter deturpandum.

Non insuper describo erectam solius rationalis inter omnia animalia figuram, vel reliquam corporis fabricam, quam ossa vix non trecenta, eaque singula, Galeno teste, ad quadraginta functiones opportuna, muscoli ferè quadringenti, cartilaginee plus quàm ducenta tam concinnè connectunt, ut ad ejusmodi ordinis, sitûs ac distantiae Symmetriam Architecti bellicarum navium, theatrorum, Basilicarum, ac palatiorum partes dimetiantur, quin DEUS ipse Arcam Noëticam, & Jerosolymæ Templum dictaturus, ad ultimum suæ Creationis opus, quod omnium cæterorum finem, nexum ac centrum constituerat, respexisse, Sacris Commentatoribus videatur. Non tandem repeto harmonicas partium humanarum proportionem, ut frontis altitudinem aequalem longitudini pollicis, nasi & auriculæ; item apertoris, aurium & oculorum pares circulos; faciem viri palmæ in longum protensæ, quatuor verò cubitos vel novem manus corporis totius longitudini commensuratas; unde Physiognomia ansam desumpsit, ex talium membrorum habitudine de temperamento, moribus, ingenio, & internis etiam affectibus crises suas derivandi, cum pro organorum varietate operatrix etiam virtus discriminetur; uti & Chiromantia ex consideratione linearum & monticulorum in volâ manûs apparentium de partibus vitalibus, è quibus illæ lineæ prodeunt, vel in eisdem terminantur, per naturalem consecutionem pronuntiandi; cum si plastica vis in extremitatibus elaborandis adhuc viget, eò robustior illa fuisse colligatur in organorum principalium structurâ.

Non, inquam, has, licet singulares, humana natura prerogativas in medium profero; sed ipsos, qui Mortalibus congeniti sparguntur, defectus in præsentis instituti firmamentum adduco. Hominem itaque dicunt iniqui divinorum operum Censores, teneris adhuc ossibus vix harentem nasci, mutum, inermem, absque ullo indumenti genere, & quod miseriarum caput est, infelici jam humorum temperamento vel potius intemperie signatum è materno utero emigrare. At tales, similesque defectus animam rationalem, quam ad minimum septimo post conceptionem die foetui humano in fundi cum Aristotelis Interprete Themistio, ac eruditis Recentioribus Zachia & Fieno asserimus, præclare commendant. Postquam enim illa primam velut delineationem vitalium membrorum efformavit, ad quam seminales spiritus, utpote ejusdem cum reliquo sanguine, in quo vitam negamus, substantiæ, non sufficiunt; ipsa angustias uteri egreditur, ut proprii sui palatii fabricam absolvat, atque capacem

discur-

discursus mentis suppellectilem perficiat, longo prius tempore in viâ quasi & potentiâ ad actum suæ speciei ultimum existens, ut Part. III. c. III. ex Aristotele retulimus, antequam illum per prævios inferioris ordinis actus vitales denique assequatur.

Par judicium de voce ferendum est; cum enim hac definiatur sonus ab ore animalis editus, seu aer à pulmonibus per arteriam asperam ejectus, & ad laryngem allisus: deinde verò per linguam, dentes, ac labia directrice saltem phantasiâ articulatus; cumque mirâ varietate ad aures accidat, insuper vim latentium rerum significativam contineat; mutus etiam homo præstantiam loquela confirmat, utpote ad quam instrumentis caret, non nisi longo nature magisterio elaborandis. Neque etiam nudi aut inermes nasci censendi sunt, qui Ratione ac Libertate præditi, omnium brutorum arma & indumenta suis obsequijs sciunt, ac pro arbitrio possunt impendere.

Tolle verò diversa hominum temperamenta, & simul varijs Artibus ac Scientijs addictos genios; pulcherrimam mercaturam, militiam, socialis & solitaria vitæ differentiam; nationum mutuo commercio indigarum, atque victu, mercibus, vestitu, consilijs sibi vicissim succurrentium societatem, Reipublicæ subordinatos Administros sustulisti; præsertim cum illud temperamentum ad æquilibre pondus, quod tu ubique exposcis, diu possibile non videatur, cum calorem vitalem, ac humidum radicale in viventibus prævalere necesse sit; deinde natura, quod in uno genere negavit, in altero providè compenset, & atra bilis abundantiam majore ad severas Disciplinas aptitudine, excessum phlegmatis candore ac mansuetudine, choleram ad capeffenda ardua habilitate, atque affusum liberaliùs sanguinem gratâ morum festivitate adornaverit; quod verò salutem animæ attingit, nullum ex quatuor illis temperamentis vel ampliore spe illius acquirendæ erexerit, aut præsentiori periculo illius amittendæ, cæteris paribus, exposuerit: nam quod unum cereâ ad bonum inclinatione præstat, alterum rigore à vitijs in transversum moveri nescio evincit; sicut ignis citò quidem concipitur, sed facile etiam in auras evanescit; aqua verò, sicut tardissimè in ignem convertitur, ita diu magnos inter calores perseverat, ut P. Mart. de Esparza q. 45. de Passionibus subtiliter discurret.

Ordo doctrinae modo postularet, ut de brutorum quoque ac plantarum perfectione ageremus, quâ vivencia illa ad Harmoniam Universi regulatissime concordant, non quidem per cognitionem mediorum cum fine propriè comparativam, sed per naturalem potius instinctum, cujus impetu ad media propter finem ab Authore nature diriguntur, ut sagitta ad metam à Sagittario, licet ipsa sagitta proportionem sui volatus ad scopum attingendum non percipiat. Sed cum de Brutis ac Plantis precedente c. II. & c. III. abundè jam tractaverimus, restat, ut illa tantùm removeamus, quibus illa Partium Mundi Symmetriam offendere, vel omnino interrumpere insimulantur. Ad quid igitur, instant contrarij nobis Catones, ad quid tot vermes, quos singulares sibi quævis planta patitur, ac innumerabiles aliorum Insectorum phalanges, patriâ, mole, figurâ, colore, armis, & mille nocendi artibus inter se discrepantes? quales, ut unicum exemplum ex Theatro Europæo adducam, Anno M. DC. XIII. ad Rhodani ripas intra octo horarum spatium tantæ amplitudinis terram dedopulata sunt, quanta aliàs ter mille bobus pascendis suffecisset, ac postquam initio albos, mox virides vermiculos, ac tandem locustas præsetulerunt, ita se multiplicârunt, ut publici Magistratus earum ovula constituto pretio colligi ordinaverint, quorum etiam triginta centenarij post exiguum tempus coacervati sunt, singulis eorum constantibus ex septendecim ejusmodi ovulorum millibus. Porro cui bono, vel cui non malo sunt tot vepres, urticae, lolia, ac steriles avenæ, quæ frugibus terræ meliorem succum suffurantur, aut saltem possessiones utilibus plantis destinatas quasi precario occupant?

Possẽm hîc imprimis reponere, animalcula illa, quæ, ut ait Plinius, à varijs membrorum incisuris Insecta vocantur, vel ob hunc finem, si alius omnis deesset, haud otiosè vivere, quod in mirabili corporum suorum compage eò majus spectaculum humanæ menti obijciant, quò magis hanc contemplatione detinet Automatum exigua gemma inclusum, quàm vastum horologium in editâ turri suspensum. Sed nec utilitate carent animata illa nature quasi caligantis emundatoria, quæ nisi sinistros humores vel noxias qualitates ad se attraherent, aër, quem respiramus, frequenti lue inficeretur, ac vitales officina corrupto sanguine stagnarent, sicut tanta alvearibus dulcedo non inesset, nisi araneæ è floribus melliferis venenum sugerent. Ad Plantas verò ut transeamus, illæ, quantumvis virulentia, præsentis simul

simul contra proprium toxicum antidoti seminarium nutriunt, ac ne otiosa videantur, ipsam, in quâ crescunt, solitudinem in multiplicis morbi medicinam, vel in penuariam diversorum viventium annonam convertunt, nec proinde ab universali naturæ fine aberrare putanda sunt, quæ halitus minimis sinceris absumendo idem officium in Mundo elementari præstant, quod inter Astra Saturni influxus, qui aliquot lustris elapsis pro omnium Sublunarium calamitatum scaturigine divulgabatur, vel in humano corpore fel ac pituita; scilicet Atmosphæram terrestrem aut sanguinem purgando, & faculentas ætheris vel alimenti partes secernendo. Imò & Monstra, quæ per omnes viventium classes divagantur, sed communiter sterilia sunt, aut in seipsa mutuò debacchantur, curvæ quidem sunt lineæ, sed quæ aliarum rectitudinem elucidant; umbra sunt, sed quæ totius imaginis colores ad formam præstantiorem ipsâ oppositæ turpitudinis disparitate attollunt; sæpe etiam à solâ hominum persuasione monstrosis partibus accensentur, sicut ex adverso Cafres album hominem deformem, & vallium Alpestrium incola mutilum æstimant, qui pendulâ è collo strumâ destituitur.

Æqualem Universo pulchritudinem addunt nævi illi ac macule, quibus Mixta inanimata velut Mundi faciem fœdare creduntur. An enim displicet gemmarum & metallorum nobilium raritas, quibus multiplicatis eorum pretium ac decus evanesceret? vel an aspectum offendunt montes & colles, quasi totidem terræ gibbi aut verrucæ? sed illi frœna sunt finitimorum hostium, fluviorum & fontium pincerna, mineralium nidi, pascuorum, vinearum & thermarum ubera, terræque compagis ossa, subterranei ignis camini, ac malignorum halituum spiracula, saxeæ catenæ, vectes, & aggeres contra Maris & turbinum assultus, sicut ob causam proportionalem globus Lunaris suo etiam Apennino, suis Alpibus ac Pyrenæis jugis coërcetur. An magis abesse velles immensos Marium tractus, quos superfluos non esse, demonstrant illi in Suppolaribus Mundi plagis Eurippi, in quibus, tanquam ob Solis absentiam ad habitandum ineptis, ne nihil agat Natura, aquas in Polo Arctico absorbet, ut easdem in Antarctico ad irrigandum ubique Universum regurgitet? aut fortè contra Deserta conquereris, quorum famosissimum inter Paraquariam & Chile situm viatores cum pyxide nauticâ, velut Oceanum, ingrediuntur? sed illa siccarum exhalationum copiam suppeditant, quibus ventorum vel cœlestis influxus ex certâ Siderum conjunctione humiditas corrigatur;

quemadmodum Nilus post inundatam Ægyptum intra sua littora se iterum retrahit, quamprimum ejusmodi ventus è sabulosis regionibus aspirat. Vel an Meteora, ac perennes elementorum pugnas aversearis, quæ pacem in tranquillitate ordinis positam interrumpunt? sed nunquid tempestates, dum terram per tonitrua concussam aperiunt, eandem succedentibus pluvijs fœcundant? nunquid venti sordescentem aërem everrunt, ac nubes in omnem partem transuehunt, ne ulla regio sine illis umbraculis ambusta, aut sine imbrium haustu aridâ siti enecta contabescat? elementa verò, si ita velis, arctâ inter se amicitia conjunge, & nec aëre amplius, tanquam nimis subtili, te poteris resocillare, nec cibos in tuam substantiam per debitas alterationum vices convertere; imò nullum suppetet alimentum, nisi jam Ver, humiditate & calore gaudens, primos quasi fructuum fœtus in flore proferat; Æstas, calore ac siccitate redundans, vinum & triticum excoquat; Autumnus prævium Canicula ardorem moderato frigore restinguat; denique hyems necessarias agris & hortis ferias post uberri-
mum totius anni laborem indulgeat.

Plurima adhuc circa nobilissimam hanc materiam discutienda occurrerent; sed placet hic manum de tabulâ tollere unico Aristotelis dicto, ut hujus Auctoritas supremum quoque Discursum consueto nobis hætenus pondere corroboret. Ille igitur de Harmoniâ Mundi ita docet Met. 12. c. 10: cuncta coordinata quodam modo sunt; verum non similiter & natantia, & volatilia & plantæ: nec ita se habent, ut sit ullum alteri ad alterum, sed sunt ad quippiam: ad unum namque coordinata sunt omnia. Ubi Aristoteles per unum, quod caterorum omnium caput & scopus est, naturam quidem intelligit. Sed venia danda est Philosopho, nec vera fidei face illuminato, nec DEI revelantis loquelâ instructo, quod sub natura schemate supremum illius Presidem & Auspicem proposuerit, ad cujus cognitionem & laudem tota rerum universitas, ut speculum diversi luminis radios in se colligens, aut cithara dispares fides ad concentum offerens conspirat.

Nos Philosophi Christiani ipsam Divina libertatis cum humanâ, Sanctitatis cum permissio peccato, Gratia cum naturâ Harmoniam contemplati, atque in vastissimo Mundi aspectabilis libro Optimum, Maximum illius Authorem tot characteribus, quot rerum individuus, tot
ima-

DE HARMONIA UNIVERSI. 47

*imaginibus, quot diversis creaturarum generibus ac speciebus expres-
sam intuentes Regi Sæculorum Immortali tenuem hunc aurei
Philosophiæ Sæculi partum in acceptis demississimè
referimus.*

F I N I S.





THESES
^{EX}
CURSU
PERIPATETICO
SELECTÆ.
^{EX}
PHILOSOPHIA
RATIONALI.

I.

Objectum materiale Logicæ Aristotelicæ non sunt Voces,
aut Operationes Mentis.

II. Sed Intellectus, ut pars Operis à Logica intenti.

III. Objectum formale Logicæ non est sola Demonstratio; vel
triplex Modus sciendi.

IV. Sed omnis & solus Syllogismus mentalis.

V. Species immultiplicabilis, etiam Angelica, implicat.

^{EX}

PHILOSOPHIA
NATURALI.

VI.

Materia prima corporum naturalium non consistit in tribus
Chymicorum Principijs.

a

VII.

- VII. Neque in Minimis Elementaribus incompofitis.
- VIII. Unde Atomiftarum Syftema, five reftitutum à Renato Cartefio , five emendatum à Petro Gaffendo rejci-
mus.
- IX. Non tantum in Homine , fed in Viventibus tam Sen-
fitivis, quàm vegetativis datur Forma Subftantialis
diftincta ab Atomis & Atomorum combinatione.
- X. Similiter in omnibus Mixtis perfectis.
- XI. Materia prima Ariftotelica poteft de Potentiâ DEI
abfolutâ fpoliari omni Formâ fubftantiali.
- XII. Vel duas fimul recipere.
- XIII. Appetitus innatus illius ad Formas inæqualiter perfe-
ctas eft æqualis.
- XIV. Poteft DEUS inferre creaturis violentiam , ut Au-
thor natnræ.
- XV. Et ut abfolutus Dominus.
- XVI. Ars faciendi verum Aurum extra mineras eft phyficè
poffibilis.
- XVII. Imò tale probabilius jam fuit productum.
- XVIII. Accidentia non funt caufa adæquata immediatè produ-
ctiva Subftantiæ.
- XIX. In generatione tamen Infeftorum non eft neceffarius
recurfus ad DEUM , ut caufam particularem.
- XX. Quantitas molis eft Accidens fpeciale Corporis natu-
ralis.
- XXI. Penetratio corporum fine miraculo repugnat.
- XXII. Replicatio per ubicationes etiam circumfcriptivas fu-
pernaturaliter eft poffibilis.
- XXIII. Actio in diftans nullo naturali experimento probari
poteft.
- XXIV. Neque Vacui phyfici exiftentia.
- XXV. Elementa manent tantum virtualiter in Mixtis.
- XXVI. Primæ Qualitates non identificantur cum diverfis cor-
porum effluvijs.
- XXVII. Præter primas ac fecundas rectè ftatuuntur aliæ , quæ
vocantur, Qualitates Occultæ.
- XXVIII. Colores permanentes funt accidentia diftincta à lumi-
ne modificato.
- XXIX. Rarefactio & Condensatio non fiunt per intromiffio-
nem, aut ejectionem corpusculorum.

- XXX. Sed per occupatum ab iisdem punctis jam majus,
jam minus spatium.
- XXXI. Causa Terræ Motuum communior est exhalatio ab
igne subterraneo accensa.
- XXXII. Luna est causa principalis, non verò unica Fluxûs
& Refluxûs Maris.
- XXXIII. Mundus non potuit existere ab æterno.
- XXXIV. Nec ulla creatura, vel successiva, vel permanens dura-
re ab æterno.
- XXXV. Cæli sunt corruptibiles & compositi ex materiâ ho-
mogeneâ cum materiâ sublunari.
- XXXVI. Falsum est Systema Mundi Copernicanum.
- XXXVII. Astra influunt immediatè in corpora sublunaria.
- XXXVIII. Indirectè verò in Animam rationalem.
- XXXIX. Proinde, sicut Astrologiam naturalem admittimus, ita
Judiciariam damnamus.
- XL. Motus Astrorum *producitur ab Intelligentijs*, licèt
possit partialiter esse ab intrinseco.
- XLI. Non datur Successio animarum.
- XLII. Nec sanguis vivit.
- XLIII. Formæ Partiales existunt.
- XLIV. Perfectio essentialis omnium animarum rationalium
est æqualis.

E X

THEOLOGIA NATURALI.

- XLV.
- E**xistentia DEI demonstratur, transmissio etiam processu in
infinitum.
- XLVI. Supremum Mundi regimen necessariò est Monar-
chicum.
- XLVII. DEUS influit immediatè in omnem actionem crea-
tam, etiam liberam.

XLVIII. Sed absque Prædeterminatione physica.

XLIX. Non potuit à DEO creari Mundus sine creatura Intellectuali.

L. Neque potest produci creatura omnium perfectissima.




A P P L A U S U S
P O E T I C U S

A D

ILLUSTRISSIMUM DOMINUM
D. ANTONIUM RUPERTUM
CHRISTOPHORUM FUGGER,
S. R. I. COMITEM IN KIRCKBERG,
ET WEISSENHORN, &c.
D E F E N D E N T E M.



AUSPICE TER PRIMO certas, Athleta Stagyræ,
Principium hoc tibi ter fausta coronis erit.



AD EVNDEM
ILLUSTRISSIMUM DOMINUM COMITEM,
VERÆ NOBILITATIS PROTOTYPON.

Altæ Theatrum gloriæ! magna Indoles!
Cujus canendis laudibus
Vocatus adsit carminum Præses Deus,
Omnesque Musæ. Seu Togam
Mutata Pallas induat, sive Sagum
Circumdet, utraque est tuæ
Figura Stirpis. Laurus at facili jugo
Decerpta, vel molimine
Quæ proprio non parta, meritò displicet;
Claroque nasci stemmate,
Et mutuatum efferre, in glorium est, genus.
Perita Virtus despicit,
Quidquid suo non debet sudori. Ipsamet
Sibi suæ est laudis faber.
Eja igitur, invictus subi scenam, dabit
Vires honor. Nec arduum
Bellum time, quod Regio ductu geris.
Lauro micabis triplici;
Sublime primam Stema, Virtus alteram,
Sophia supremam inferet.

Hæc DICat aMorIs ergò

Cyriacus Secundus Comes Troyer,
L. B. de Troyenstein & Strasfrid,
Dominus in Gisbach.



AD EVNDEM,
ILLUSTRISSIMÆ FAMILIÆ FUGGERIANÆ
MAXIMUM INCREMENTUM

Augusta nomen bis meruit suum,
Fuggeriani Stemmat̃is inclytum
Cum te Nepotem procreavit,
Dulce Decus Patriæ datura.
Ignosce linguæ. Nobilior Parens
Priore, Virtus extitit altera,
Illustriori Téque vitâ
Illa suis animavit astris.
Hæc tota vultus irradians tuos
Vivas Avorum reddit imagines,
Qui laude summâ transvolârunt
Ad meritas super Astra Sedes.
At consepultus funeribus dolor
In prisca sese gaudia transtulit,
Damna compensans, tantus almos
Dum cineres reparavit Hæres.

Ad

Ad alta surgens, qui pariter Togâ
Sagôque partis nominibus novum
 Afflare posset nomen, atque
 Multiplici decorare lauro.
Sic te secundis ergo Favonijs
Avita ducat prævia gloria,
Fuggerianum perge nomen
 Vindelicis celebrare campis.

Nec jam caducis arboribus tua
Stirps fulcietur, crescet at amplior
Moles Honorum, te futuro
Herculeis humeris Athlante.

*Ita amoris & cognationis affectu
aggratulatur*

Josephus Carolus Franciscus
S. R. I. Comes de Welsperg,
Primör & Langenstein.

~~~~~  
A D E V N D E M,  
UNIVERSITATIS OENIPONTANÆ  
SINGULARE ORNAMENTUM.

A T tandem triplici curriculo redux  
Quiescis solido in littore gloriæ,  
Immensumque laborem  
    Unus jam recoquet Dies.  
Sit ergo. Placidis pande jugalibus,  
Alter Phæbe, tuæ lumina gloriæ,  
Post noctes superatas,  
    Post tranata maris vada.  
Apis prome favos, quos sapientiæ  
Legisti Sophicæ sedula floribus,  
Et prodi sub apertum  
    Grandis Palladis Assecla.  
Effer fidereis ex adytis pedem,  
Terrestri gremio pande recondita,  
Acri lumine mentis  
    Spectatum satis est tibi;  
Quid natura suis servet in abditis,  
Quid cælum liquida gyret in orbita,  
Quidquid denique claudat  
    Vastus Pieridum sinus.

Jam non Anglipolis sola beatior  
Ernestum memoret, Curia quem sua  
Doctorum venerata est  
    Quondam magnificum Ducem.  
Hoc urbs Oenipotens Sidere splenduit,  
Quando Dux Sophici prævius agminis  
ANTONI redimendum  
    Ibas meritum caput.  
Sed nondum satis est, tempora laureis  
Coronasse, novam laudis adoream  
Tentas, atque triumphos  
    Quæris magnanimus Pugil.  
Adsis ergo novus victor ab exedra,  
Illustrémque tuam stemmatis Indolem,  
Quam virtute probasti,  
    Musis nunc iterum proba.

*Sic honoris, amoris, & consanguinitatis  
gratiâ accinuit.*

Maximilianus Maria Antonius Josephus  
S. R. I. Dapifer Hæreditarius, Comes de  
Wolfegg, Lib: Baro de Waldburg, Dominus  
in Zeyl, Wurzach, Waldsee & Marstetten.

AL



AL MERITO IMPAREGGIABILE  
DELL'ILLVSTRISSIMO SIGNOR CONTE  
ANTONIO &c.

D I F E N D E N T E


Sotto gl'Auspicii gloriosissimi della Maestà del Rè de  
ROMANI.

S O N E T T O.

**M**Entre l'Augusto Crin con reggio ferto  
Bellona inghirlandar brama, sfrondata  
Il Rodopeo Cantor al bell'inferto  
Mira la selva, e la sua reggia amata  
Dal Peripato fuol fratanto armata  
Anche la Dea di Pindo esce in concerto,  
Al Stagirita Heroe già destinata  
La palma, e verde allor'richiede al merto.  
Mà non ritrova più l'Aonie piante;  
Tutti l'Austriaco Crin cingon'gli allori,  
Tutti illustran le tempie à un Sol Regnante.  
ANTONIO che farai? se cerchi honori,  
Sotto l'Aquila Augusta corri volante;  
Questa è l'ombra, che dà novi splendori.

*A nome di tutta la Metafisica, edin  
segno d'umilissimo suo rispetto.*

Francesco Giuseppe Massimiliano di  
Coredo, in Kolbenthurn e Waldgriess.



A D E U N D E M,  
EPILOGUS ANAGRAMMATICVS.

ANTONIUS. STA IN UNO.  
JOSEPHUM resonas Primum. STA semper IN UNO,  
Sic tuus innumero tempore stabit honor.

O. A. M. D. G.



